

Kulu gba obhulɔ Titima gba Yesu Eli na kalanɔ

Kulu gba obhulɔ Titima gba Yesu ne bhuku na bhisi inde li Luka aye e-o.

Engú na ngbéngbé inde bhú bhuku inde-e, a ko nakpokpo lele maka li omakpata gba Yesu na kalanɔ adu adhuku bhú angu gba Bu Bhobua, u atsia adu akpokpo Bádha Ngali pindji Yesu inde adu ayangba abhú: «Yelusalema, ne bhú Yudaya, ne abhú Samalia nakolo makolo abhú dje doto» (1:8). A ko Ngali gba Kilisito inde akpo lita e agba omaYuda atsia akolo nabhuka pi ndu okpála na pála doto hana.

Engú na ngbéngbé inde bhú bhuku gba obhulɔ titima-a, a ko kulu gba Bu Bhobua inde ago ne angu pí omabhuka abhú Yelusalema li 'kpí na Patekote. Bu Bhobua ango-o, la di ngateteke ne naha angu pi Piga gba Ebhe ne okpála inde ngadjedjele, nakpata lele ongú inde u aye e bhú bhuku ango-o. Engú na kalanɔ inde atsia omakilisito akpokpo lie bhelé bhú eli gba Ebhe inde u adu aha e pi okpála-o. A la di ongú inde u aye e bhú bhuku gba obhulɔ titima gba Yesu ngasuno angu na ongú ango-o bhú mukobho gba omabhuka, la di bhú makpøtø inde bhú Piga gba Ebhe-o.

Ongbengbe onǵú inde bhú bhuku inde-e ngae inde:

Naleke lio ngú nakpokpo 'ngú pindji 'ngú mo ue ne bhe mo adje e 1:1-26

(1) Líli na soso ne engú inde li Yesu apa me ni amene e 1:1-14

(2) Kpála inde aha da Yuda-o 1:15-26

Okpála inde akpokpo 'ngú pindji 'ngú inde u au e ne bhe u adje e abhú Yelusalema 2:1 - 8:3

Okpála inde akpokpo 'ngú pindji 'ngú inde u au e ne bhe u adje e abhú Yudaya ne abhú Samalia 8:4 - 12:25

Kulu gba Polo 13:1 - 28:31

(1) Dholo gba Polo na kalanu ngubula nakpokpo Bádha Ngali 13:1 - 14:28

(2) Bula abhú Yelusalema 15:1-35

(3) Dholo gba Polo na bhisi ngubula nakpokpo Bádha Ngali 15:36 - 18:22

(4) Dholo gba Polo na bata ngubula nakpokpo Bádha Ngali 18:23 - 21:16

(5) Polo bhú tikpu abhú Yelusalema, ne bhú Sedjale a la di-e bhú Loma 21:17 - 28:31

Yesu apa me: «Yi asía Bu Bhobua»

¹ Ndai ma na mukunda Tiofile,

Bhú bhuku gba ma na kalanu-o,* ma akpokpo ndu 'ngú hana inde li Yesu amene e di ne bhende

* **1:1** 1:1 Bhuku na kalanu: A akunda napa me Bádha Ngali gba Yesu Kilisito maka li Luka aye lie ko. Kulu gba obhulu titima gba Yesu ne bhuku na bhisi gba ani-o.

ani asuno e ko. Ma akpokpo nayie li lilita[†] 2 akolo li 'kpí li Ebhe aha ani lie abhúlá ko. Kala nanu ka ani abhúlá-a, bhú angu gba Bu Bhobua-a , ani aha olíli gba e pí okpála inde ani alo nani o maka obhulu titima-o . 3 Pita nakpi ka ani-e, ani apana lie pí obhulu titima gba e-o. Ani asuno pí uo li okpadji bhelé me ni bhú mukobho. Ani asuno lie pí uo ngubula 'kpí ndjikpa badha. Ani atsia akpokpo di 'ngú pí uo pindji Nau gba Ebhe . 4 Ekpí bini, li ani adu azu 'he lie bhú dabilí bini ne uo-o, ani atsia aha líli inde-e pí uo me: «Yi ayie bhú Yelusalema de, engú bini, yi djeke ehe inde li 'Dyi ma apa me ni ahá e pí yi ko. A ko ehe inde ma apa 'ngú pí yi pindji e ko. 5 Padhá de, anga Djaa abatisa nani okpála ne engu. Engú bini ngayi-e, pita 'kpí masudha-a, yi asia batisimo na Bu Bhobua.»

Ebhe aha Yesu abhúlá

6 Li obhulu titima adu apo bhúla o lie de Yesu-o, ekpí koko-o, u atsia ayi ani me: «Ngámá, mo ogbége omafalaele bhú bali, mu tsia há ngámá pí uo mbia inde-e?» 7 Yesu atsia agie pí uo me: «A ko engú ka yi de ngú nambila nedhinga di ne oekpí ango-o. Padhá de, anga Ebhe ne angu gba e makpe, a'o oekpí ango-o maka ani akunda lie ko. 8 Engú bini, yi asia angu, li nedhinga li Bu Bhobua aké pí yi lie-o. Yi tsia kpókpo 'ngú gba ma inde yi au e ne bhe yi adje di e bhú gudhu na Yelusalema, bhú ndu doto na Yudaya

† 1:1 1:1 Lilita: A akunda napa me a ko nayie li lita kulu gba Yesu Kilisito li 'kpí ani asia batisimo lie ko.

libhomu, ne bhende na Samalia, akólo makolo ali dje doto.»

⁹ Li Yesu andjia nakpokpo 'ngú bhomu-o lie, Ebhe atsia aha ani abhúlá me ndu uo hana nde ngatsia ani. Abhomu-o, ndindi atsia abuku ani. U u matá ani de. ¹⁰ Nedhinga u adu nga bha lie atsia 'kpí abhúlá-a, li pápá li Yesu atapa lie, kolo me-e, okpála bhisi aze li uo. U adyidyí bubu bongo . ¹¹ U atsia apa pí uo me: «Ngayi okpála na Galilaya, yi alulu si ne natsia 'kpí abhúlá ka ni? Yesu inde li Ebhe aha e abhúlá bhomu-o, ani agié bhadi lie maka yi au ani lie anu abhúlá ko.»

Libi obhulu titima gba Yesu

¹² Abhomu-o, obhulu titima-a ayie pí eta u a'i e me eta na ondula na Olive, u atsia agie lio bhú gudhu na Yelusalema. Eta ango-o adu de Yelusalema masikpe de kilometele bini.† ¹³ U akolo lie bhú Yelusalema-a, u a'u bhú tina 'ti bhe abhúlá, bili inde u adu adulu lie-o. A adu nani: Piele ne Djaa , ne Djaki di ne Andili, ne Filipino di ne Tuma, ne Batelemi di ne Matié, ne Djaki ndili gba Alafayo, ne Simo kpála nakunda doto gba o, la di ne Djude ndili gba Djaki. ¹⁴ Ndu uo hana, adu apo bhúla o ne bua bini, ndu nedhinga hana ngú nayo Ebhe. U adu bhú dabili bini ne olisi koko, ne Malia 'hi Yesu, di ne ondaise Yesu.

U agbe kpála bhú dá Yuda

¹⁵ Bhú oekpí bhomu-o, ekpí bini, omabhuka apo bhúla o. U adu masikpe de kámá ne ndjikpa

† **1:12** 1:12 Masikpe de kilometele bini: U aye bhú obhuku koko me «maka enú na ekpí naguo gba omaYuda .»

bhisi. Abhomu-o, Piele ayie bhúlá bhú ká uo. Aní atsia apa pí uo me: ¹⁶ «Ondaise ma, engú inde u aye e bhú Bhuku gba Ebhe-e , a ayo me amene lie. Bu Bhobua apa 'ngú ango-o bhú 'li Davidi pindji Yuda, kpála inde ago nani ne okpála inde aholo Yesu-o. ¹⁷ Yuda nako ne saka ní. Ngámá abhu aní ngú namene kulu maka ní adu di ne di lie-o.»

¹⁸ (Aní akala edyi ne tia inde u aha e pí aní lí aní abhøø kpála lie-o. Bhú edyi ango-o, aní atí adji 'ndji e ne kuto. 'Bu aní aupa. 'Ndja aní atsia aze kuto. ¹⁹ Ndu okpála hana na Yelusalema ambila 'ngú ango-o ndjindji. Kaka-a, u a'o nani 'ili lí edyi ango-o bhú eli na gba o me «Akeledama», a akunda napa me «edyi na Ngute».)

²⁰ Pipita-a, Piele apa matá me: «Padhá de, anga u aye bhú bhuku na oEtsi gba omaYuda-a me:

<A ayo me kuti gba aní-e kolo mili bíli,
kpála bini adú bhúbhú de.>

U atsia aye matá me:

<A ayo me kpála koko ha kulu gba aní-o.†>

²¹⁻²² Kaka-a, a ayo me kpála bini lí bhú ká ní, amba aní du akpokpo ngali nazuku gba Ngámá Yesu-o. A ayo me kpála ango-o du saka okpála inde adhuku bhú dabili bini ne ní ndu nedhinga hana lí Ngámá Yesu adhuku lie ne ní píla doto ko. Kpála ango-o du kpála inde adhuku bhú dabili bini ne ní nayie lí nedhinga lí Djaa abatisa Yesu

† **1:20** 1:20 Tsia bhú Ets. 69:26, 109:8.

lie, § akolo li ekpí li Ebhe aha ani lie ngú nanu abhúlá-o.»

²³ Abhomu-o, u atsia agbe okpála bhisi. A adu 'li bhe bini-e me Djodjefu , inde u a'i e me Balasabasi. 'fli koko gba ani-e matá me Djusitusi. A adu 'li bhe koko me Matiasi. ²⁴ U atsia ayo Ebhe me: «Ngámá, mu mbila bua ndu okpála hana. Pana kpála inde mo obhu e bhú ká okpála bhisi inde-e pi ya. ²⁵ Ani adú bhulu titima gba Yesu. Ani ahá kulu inde li Yuda a'o ká e ngú nanu li bili gba e makpe ko.» ²⁶ Pita u ayo Ebhe lie, u agu gbanda.* Gbanda asuno Matiasi. Abhomu-o, u atsia ato ani bhú ká obhulu titima ndjikpa ne ká bini-o.

2

Bu Bhobua akè pí omabhuka

¹ Li ekpí na Patekote akolo lie, ndu omabhuka hana apo bhúla o li bili bini. ² Má gala kolo me-e, tolo ayie abhúlá maka anvi na kpekpeke. Tolo ango-o aha bili bhú 'ti inde u adu bhú e hana. ³ Abhomu-o, u au oehe maka dingidhi djua. Oehe ango-o agbogbo bhusu e, atsia adulu pí 'ndji ndu uo hana bini ne bini. ⁴ Ndu uo hana abedhe ne Bu Bhobua . U atsia aholo agama 'ngú bhú oeli koko, maka li Bu Bhobua adu ahaha pi uo lie ngú nagagama ko.

§ **1:21-22** 1:21-22 Nayie li nedhinga li Djaa abatisa Yesu lie: U aye bhú obhuku koko me «nayie li nedhinga inde li Djaa adu abatisa okpála lie-o.» * **1:26** 1:26 U agu gbanda: U du nani agu gbanda ango-o pi Ebhe, ngú nambila engú inde ani akunda e-o.

⁵ Bhú gũdhũ na Yelusalema-a, omaYuda inde ayie bhú ndũ okuti hana* p̄la doto libhomu adũ oo. A adũ okpála inde adũ akpe Ebhe. ⁶ Li u adje tolo ango-o lie, bhiti okpála ango-o ago apo bhúla o. U atsia adũ angamba naali. Padhá de, anga kpála ne kpála adũ adje omabhuka agama 'ngú bhú eli gba e makpe. ⁷ U abedhe ne nangamba, di ne nakiaka. U atsia adũ apa me: «Okpála i ngagama 'ngú inde-e, ndũ uo hana ne okpála na ndu doto na Galilaya adi? ⁸ Lele pi ndũ ní hana bini ne bini, ní ngadje uo lie ngagama 'ngú bhú eli gba ní makpe na kuti-e?

⁹⁻¹⁰ Bhú ká ní si-e, okpála koko ayie bhú doto na Palate. Okoko ayie bhú Media. Okoko ayie bhú Elama. Okoko ayie bhú Edjipeto. Okoko ne okpála na Medjopotami. Okoko ayie bhú ndu doto na Yudaya. Okoko ayie bhú Kapadose. Okoko ayie bhú Pote di ne Adjia. Okoko ayie bhú Filidjia. Okoko ayie bhú Pamifilia. Okoko ayie lingo gũdhũ na Silene inde bhú doto na Libi ko. Okoko ayie bhú gũdhũ na Loma . ¹¹ Okoko ayie bhú kp̄m̄o na Kelete. Okoko ayie bhú doto na Alabi. U azu okoko omaYuda. Okoko-o, a ko ogandji okpála inde abhuka Ebhe gba omaYuda-o. La-a, lele pi ní ngadje uo ngakpokpo 'ngú p̄ndji ongamba 'ngú gba Ebhe bhú eli gba ní na kuti lie bini ne bini-e!» ¹² Ndũ uo hana adũ ne nangamba naali. Mabhundja gba uo-o angbingi. Abhomũ-o, u atsia apa sũnda o me: «Engú inde-

* **2:5** 2:5 OmaYuda inde ayie bhú ndũ okuti hana: U adũ nani ago bhú Yelusalema ngú nadhögø Ebhe bhú anokomia na Patekote .

e akunda napa pi?» ¹³ Engú bini, okoko adu amu omabhuka. U atsia adu apa me: «Pandi aholo uo e-e ngae bha-a!»

Piele akpokpo eli gba Ebhe-e pi bhiti okpála

¹⁴ Piele ayie bhúlá bhú dabili bini ne obhulu titima ndjikpa ne ká bini koko-o. Aní aholo agama 'ngú kpekpeke pi bhiti okpála me: «Ngayi omaYuda, di ne ndu yi okpála hana inde ngadulu bhú gudhu na Yelusalema-a, yi dje ma ndjindji, amba yi mbila la di engú i ngakodho 'kpí inde.

¹⁵ Okpála inde-e, a holo uo ne pandi maka yi ngabhuhundja lie de. Padhá de, anga a ko nga bha saa na odukpabini na kèkpí. ¹⁶ Engú bini, engú i ngakodho 'kpí mbia inde-e, a ko engú inde li polofeta Djuele apa nani e-o. Engú inde me:

¹⁷ «Ebhe apa me: li sokpí-e,

ma atúko Bua† gba ma-a pí ndu okpála hana. Ongisi gba yi na obhosibhosi, di ne obhe na olisilisi akpókpo ongú inde ma akunda e-o. Omakombise gba yi-e aú ongú inde ma akunda nasuno e bhú loto. Ogbegbe okpála gba yi-e atsia alóto oloto inde ma atíma e pi uo ko.

¹⁸ Li oekpí ang-o-o, ma atúko belegu di Bua gba ma-a pí okpála na kulu gba ma na obhosibhosi, di ne obhe na olisilisi.

U tsia kpókpo ongú inde ma akunda e-o.

¹⁹ Ma améne ongamba 'ngú abhúlá.

Ma tsia méne ongamba 'ngú kuto píla doto.

† **2:17** 2:17 Bua: I du me u nde aye ne 'dhu balua na ngbéngbé-e (madjisikile), amba a ko Bu Bhobua.

Ngute atúko, li djua tsí, a adú di ne ndindi nguwa.

20 Kala me ekpí gba Ngámá-a kolo-o, ekpí na ngbéngbé,
di ne ekpí na asasaua-a,
ela adjí lie biti.

Li epe djí lie maka ngute.

21 Abhomu-o, kpála ne kpála inde abhu 'li Ngámá-a,
tsia sía mukobho.†»

22 Abhomu-o, Piele atsia apa me: «Ngayi okpála na Isalaele, yi dje nga engú ma adjí apa e pí yi inde: Ebhe apana pí yi mbámbá me ní atima Yesu, kpála na kuti na Nadjaleta-a, pí yi. Aní apana lí namene ongamba 'ngú sūnda yi bhú aní. Aní amene okiaka 'ngú , di ne oehe na tsulutsulu bhú aní. Ngayi makpe-e, yi mbila 'ngú tété ndjindji. 23 Kpála bhomu-o, u apu aní pí yi. Ebhe ambila nani 'ngú tété kalanu. Aní atsia akunda me amene lie moko. Yi abhøø aní. Padhá de, anga yi aha aní pí okpála na sisiti. U agí aní lí kulusi, u atsia abhøø aní. 24 Engú bini, Ebhe azuku aní, aní atsia a'e aní bhú likabhu na kuo. Padhá de, anga a ayo nani de me kuo to aní bhú tikpu gba e-e de. 25 Kaka-a, Davidi apa lí 'ngú gba aní-e me:

«Ma adu au Ngámá Ebhe kala ma ndu nedhinga hana.

Padhá de, anga aní lí pá 'kpa ma na kokpa, amba ma agúku de.

26 Kaka-a, bua ma abedhe ne djali bedhe.

† 2:21 2:17-21 Tsia bhú Djl. 3:1-5.

Ma la di ngali 'tsi ne djali hana.

Ekpí ma akpí lie,

ma adú ne 'to ma me ma akóbho makobho.

27 Padhá de, anga mụ 'ó ká ma de ma dụ li
bili gba okpála inde amu-o de.

Mụ kúnda de me kpála gba mụ na
ngbingbili-e zi bhú lata-a de.

28 Mo osuno mụma okpadji na mukobho.

Mo obédhe ma ne djali, anga ní ne mụ bhú
dabili bini.†»»

29 Piele apa matá me: «Ondaise ma, ma ti da
napa engú pi yi mbámbá pindji ogbi ní Davidi.
Ani akpi, u atsia azi ani. Lata ani bhú ká ní akolo
pi naki. 30 Engú bini, a ko nani polofeta. Ani
ambila me Ebhe apa nani ne natu silika me: <Ma
a'ó suka ongisi gba mụ-o bini ngámá bhú da mụ.>

31 Davidi au nani engú inde agó-o kalanu. Kaka-
a, ani atsia apa engú nazuku gba Masiya me:
<Ebhe 'o ká ani li bili gba okpála inde amu-o de.

Ani 'o la di de me ani zi bhú lata-a de.>

32 Yesu inde ma ngapa 'ngú gba e-e, Ebhe azuku
ani. Ndu ya hana, ya au engú ango-o ne djila
ya. 33 Pipita-a, Ebhe a'e ani abhúlá, ani atsia a'o
ani li pá 'kpa e na kokpa. 'Dyi ní Ebhe aha Bu
Bhobua pi ani maka ani apa nani lie kalanu ko.
Ani atsia atuko Bu Bhobua ango-o pí ya. A ko
bhende yi ngau e, di ne bhende yi ngadje e mbia
inde-e ko. 34 Padhá de, anga Davidi ngae makpe
'u nani abhúlá de. Engú bini, ani apa ngae me:
<Ngámá Ebhe apa nani pi Ngámá gba ma-a me:

Dụ li pá 'kpa ma na kokpa,

† 2:28 2:25-28 Tsia bhú Ets. 16:8-11.

35 akólo li 'kpí ma a'ó obhulú yala gba mụ-o lie sa 'dhụ mụ ko.†»

36 A ayo me ndụ okpála hana na Isalaele mbila engú inde-e ndjindji me: Yesu inde-e, inde yi abhөлө e li kulusi-e, Ebhe a'o ani Ngámá, ani atsia a'o di ani Masiya!»

37 Li u adje engú bhomụ-o lie, bua uo asia likabhu naali. U atsia ayi Piele di ne obhulú titima koko-o me: «Ondaise ya, a ayo me ya mene pi?» 38 Abhomụ-o, Piele atsia agie pi uo me: «Kpála ne kpála dji bua e, ani sia batisimo ne 'li Yesu Kilisito , amba Ebhe 'e siti 'ngú gba ani-o. Abhomụ-o, yi tsia sía la di Bu Bhobua padhá. 39 Padhá de, anga ani apa nani kalanụ me ni améne pi yi ne ongisi gba yi-e moko. Ani atsia apa me ni améne di pi okpála bhende ngadulú tsutsutsu,‡ di ne pi ndụ okpála hana bhende li Ngámá gba ni-e a'í o-o.»

40 Abhomụ-o, Piele atsia akpo 'ngú koko pi uo bhelé ngú naha pi uo gumụ me u bhuka, di me u dụ ne nalila lio malila. Ani adụ apa pi uo me: «Okpála na naki inde-e sisiti. Yi yie bhú ká uo mayie, amba Ebhe kobho yi.» 41 Okpála bhelé inde adje 'li Piele-e, aziba. U atsia asia batisimo. Li ekpí ango-o, okpála masikpe de kutu bata ali bhú ká omabhuka.

Omabhuka na kalanụ-o adụ nani lele o pi?

42 U adụ aha lio ndụ 'kpí hana ngú nadje nasuno gba obhulú titima gba Yesu-o. U adụ

† 2:35 2:34-35 Tsia bhú Ets. 110:1. ‡ 2:39 2:39 Okpála bhende ngadulú tsutsutsu: A akunda napa me ogandji okpála, okpála bhende ne omaYuda ade.

nadu sūnda o bhú mukunda maka ondaise. U adu azu 'he bhú dabili bini, § u atsia adu di ayo Ebhe bhú dabili bini. ⁴³ Ndu okpála hana adu ne tsalu. Padhá de, anga obhulu titima-a adu amene ongu na ngangamba, di ne okiaka 'ngú naali. ⁴⁴ Ndu omabhuka hana adu adulu bhú dabili bini. Ndu 'he gba uo-o hana adu bhadi bhú dabili bini. U atsia adu agbogbo bhusu bhusu li o. ⁴⁵ U adu atsendji oedyi gba o, di ne oehe koko gba o-o. U atsia adu agbogbo bhusu tia ango-o li ndu okpála hana, maka li gumu gba kpála bini ne bini adu lie ko. ⁴⁶ Ekpí bini ne bini hana, u adu apo bhúla o bhú dabili bini, u adu ali bhú 'ngbé 'ti Ebhe gba omaYuda. U adu agumu mapa bhú eti gba o, u atsia adu azu 'he ne djali, di ne bua na bhubhuku. ⁴⁷ U adu atoko Ebhe. Engú inde u adu amene e-e bhú bádha bhú 'bu gba Ebhe-e , a adu anga li okpála naali. Abhomu-o, ndu 'kpí hana, Ngámá atsia adu ato okpála koko bhende asia mukobho-o bhú ká uo.

3

Dukuto adhuku

¹ Ekpí bini, pita tulukpe, Piele ne Djaa adu anu bhú 'ngbé 'ti Ebhe gba omaYuda, ngu nayo Ebhe inde u adu ayo e bhú saa na bata-o. ² De 'bhé 'ngbé 'ti Ebhe gba omaYuda ango-o inde u a'i e me «Babadha-a», kpála bini inde i dhuku de nayie maka u azu ani lie adu oo. Ndu 'kpí hana, u adu ago a'o ani oo ngubula me ani du ayo tia

§ 2:42 2:42 Nazu 'he bhú dabili bini: A ko nazu komonyo. A ko la di nazu 'he bhú dabili bini.

ka okpála inde ngali bhú 'ti Ebhe ko. ³ Li ani au Piele ne Djaa lie me u nde adji ali bhú 'ngbé 'ti Ebhe-e, ani atsia ayo tia ka uo.

⁴ Piele ne Djaa abanga djila o li ani. Abhomu-o, Piele atsia apa pi ani me: «Tsia ya!» ⁵ Kpála ango-o atsia a'o mabhundja gba e-e hana pi uo. Padhá de, anga ani adu abhundja me ni asia 'he ka uo masia. ⁶ Abhomu-o, Piele atsia apa pi ani me: «Falanga ka ma ade. Olo la di ka ma ade. Engú bini, ma ahá pi mu ehe inde ka ma-o: ne 'li Yesu Kilisito na Nadjaleta-a, yie bhúlá, amba mu dhuku!» ⁷ Pipita-a, Piele aholo 'kpa ani na kokpa, ani atsia a'e ani bhúlá. Má gala kolo me-e, obiki na 'dhu ani akolo kpekpeke. ⁸ Ani a'ulu, aké má kprii! Ani atsia aholo nadhuku. Pipita-a, ani ali bhú 'ngbé 'ti Ebhe bhú dabili bini ne Piele ne Djaa. Ani adu adhuku. Ani adu a'u'ulu. Ani atsia adu adhögö Ebhe. ⁹ Ndu okpála hana au ani me ani nde ngadhuku, ani nde ngadhögö Ebhe. ¹⁰ U atsia ambila me, a ko kpála inde adu nadu li 'bhö 'ngbé 'ti Ebhe, li bhöbhö bhende u a'i e me «Babadha», ngubula nayo 'he. Abhomu-o, ndu uo hana angamba, u atsia akiaka naali ka engú inde akolo li kute dukuto-o.

Piele akpokpo 'ngú pi bhiti okpála bhú 'ngbé 'ti Ebhe gba omaYuda

¹¹ Abhomu-o, kpála ango-o du ayie de Piele ne Djaa de. Ndu okpála hana angamba naali ka engú inde akodho 'kpí-o. U ago ne holo, u atsia

apo bhúla o de uo sa basa inde u a'i e me «Sa ngba 'ti gba Salomo.*»

¹² Li Piele au lie mo-o, do aní pí bhiti okpála bhomu-o me: «Ngayi okpála na Isalaele, yi ngangamba li nakobho ka kpála inde-e ka ni? Li yi abanga djila yi lie li ya mụgito me ya amene ngaya ne angu gba ya makpe me kpála inde-e dhuku-o? La di mụgito me a ko anga ya ngakpata engú gba Ebhe-e? A mo-o ade. ¹³ Ebhe gba Abalahama, Ebhe gba Isaka, Ebhe gba Yakobho, Ebhe gba onguo ogbi ní amene me 'li bali gba ni Yesu-o adhөгө lie. La-a, ngayi makpe-e, yi apu aní pí ongámási. Yi atsia ayala aní kala Pilate me aní nde adu akunda la me ni tse 'kpa li aní-o.

¹⁴ Ngayi-e, yi ayala Kpála bhende bubu, inde di ngbingbili. Yi atsia ayo me Pilate suno bádha bhú 'bu pí kpála bhende ngabhili okpála-o. ¹⁵ Yi abhөлө kpála inde ngaha mukobho. Engú bini, Ebhe azuku aní bhú ká okpála bhende amu-o. Ya au engú angu-o ne djila ya makpe. ¹⁶ Mbia inde-e, yi ngau kpála inde, yi mbila la di hana me a ko nako dukuto. Aní akobho ka 'li Yesu. Padhá de, anga ya abhuka aní. A ko ka nabhuka bhú Yesu, aní atsia akobho hana maka yi ngau aní lie inde.

¹⁷ Engú bini, ondaise ma, ma ambila ndjindji me ngayi ne ongámási gba yi-e, yi amene li Yesu mo-o, anga yi mbila nani kukulu 'ngú-o de.

¹⁸ La-a, Ebhe ngae makpe amene mo-o ngubula nasuno mbámhá engú inde aní apa nani e kalanu bhú 'li ndu opolofeta hana ko. Aní apa nani me

* **3:11** 3:11 Sa ngba 'ti gba Salomo: A ko sa ngba 'ngbé 'ti Ebhe gba omaYuda-o.

Masiya gba ni-e azú likabhu. ¹⁹ Kaka-a, yi dji bua yi. Yi gie liyi li pápá gba Ebhe, amba ani 'e siti 'ngú gba yi-o. ²⁰ Abhomu-o, Ebhe ahá onedhinga naguo pi yi. Ani tsia tíma matá Masiya inde ani abhu nani e kalanu-o pi yi. A akunda napa me Yesu.

²¹ Engú bini, mbia inde-e, a ayo me Yesu Kilisito da ngaiza abhúlá. Ani da oo akólo li nedhinga inde li ndu 'ngú hana akólo lie na mbia-o. Nayie didili naali-e, Ebhe apa nani engú angoo bhú 'li obubu opolofeta-o. ²² Maka li Moidje apa la di nani lie me: <Ebhe Ngámá gba yi-e atíma polofeta pi yi maka ma. A adú saka ondaise yi. A ayo me yi dje ndu 'ngú hana inde ani apa e pi yi ko. ²³ La-a, kpála bhende i djé 'li ani de-e, u agbé ani bhú ká okpála gba Ebhe, u tsia bhólø ani.†>

²⁴ La di-e, ndu opolofeta hana inde akpokpo 'ngú gba Ebhe-e, nayie li Samuele, akpo engú ndu o hana bini ne bini pindji engú inde-e akolo li 'kpí angoo ko. ²⁵ Engú li Ebhe apa nani e kalanu bhú 'bhø opolofeta-a, a pi yi. La di-e, gandja inde li Ebhe akodho nani e kalanu-o ne onguo ogbi yi-e, a di pi yi. Ani apa nani kalanu pi Abalahama me: <Ma atúko bisagu pí ndu opiga hana píla doto li pápá gba ongisi gba mu-o.†> ²⁶ Kaka-a, Ebhe abhu bali gba e, ani atsia atima ngaiza ani pi yi omafsalaele. Ani atima ani me ani tuko bisagu pí yi. Ani agbé kpála ne kpála bhú siti 'ngú gba e-o.»

† **3:23** 3:22-23 Tsia bhú Det. 18:15, 18, 19. † **3:25** 3:25 Tsia bhú Dje. 22:18.

4

*Libi okpála natsia 'kpí lí 'ngú gba omaYuda
aholo Piele ne Djaa*

¹ Lí Piele ne Djaa adu akpo 'ngú lie pí okpála-a, odimandø gba Ebhe-e ago bhú dabilí bini ne ngámá gba okpála nalila 'ngbé 'tí Ebhe gba omaYuda di ne oSadukai . ² U adje siti bua naali. Padhá de, anga Piele ne Djaa adu asuno pí bhiti okpála. U adu akpokpo pí uo me okpála inde amu-o azúku di mazuku, maka lí Yesu azuku lie ko. ³ Abhomu-o, u aholo Piele ne Djaa. U atsia ato uo bhú tíkpú akolo pí kèkpí, anga adu me ekpí nde ngabi. ⁴ La-a, bhelé na okpála inde adje nani eli gba Ebhe-e , akolo omabhuka . Abhomu-o, omabhuka abe ndu o, u atsia akolo masíkpe de okpála kutu bhuluvue.

⁵ Lí ekpí aseke lie, ongámási gba omaYuda , ne obhelesi okpála di ne omusuno na líli gba Moidje , apo bhúla o bhú gudhu na Yelusalema. ⁶ A adu nani: bhele kpála gba odimandø Ana, ne Kaifa, ne Djaa , ne Alekidjandele di ne ndu okpála hana inde bhú piga gba bhele kpála gba odimandø gba Ebhe-o. ⁷ Abhomu-o, okpála inde aholo Piele ne Djaa, atsia agbe Piele ne Djaa kala uo. U atsia ayi uo me: «Yi akobho kpála inde ne mangua angu dho? La di ne 'lí da?»

⁸ Abhomu-o, Piele inde abedhe nani ne Bu Bhobua-a atsia apa pí uo me: «Ngayi ongámási, di ne yi obhelesi okpála-a, ⁹ ya amene bádha 'ngú pí dukuto inde. La naki-e, u ngayi ya me ani akobho lele pí. ¹⁰ A ayo me ndu yi hana, di ne ndu okpála na ísalaele hana, yi mbíla engú

inde-e ndjindji: kpála inde-e alu kala yi ne kute na angu ka angu gba Yesu Kilisito , kpála na Nadjaleta. A ko Yesu inde yi agi nani e li kulusi, Ebhe atsia azuku ani-o. ¹¹ Yesu ne kpála inde li Bhuku gba Ebhe-e apa nani engú gba e me Ebhe apa me:

«Ani ne teme inde li ngayi okpála nayiki 'ti-e abhike e-o.

La-a, teme ang-o akolo teme inde abi eti-e libhomu.†»

¹² Ani ti bha da nakobho okpála ngae kpi e kpi. Padhá de, anga pía doto libhomu, Ebhe ha 'li kpála koko bini de inde u ti da nakobho ka e.»

¹³ Li Libi okpála natsia 'kpí li 'ngú gba omaYuda au lie me Piele ne Djaa ngagama 'ngú ne tsulu ade-e, u angamba naali. Padhá de, anga u adu ambila ndjindji me Piele ne Djaa ne okpála na padhá. U mene balua bhelé de. La di-e, u adu ambila ndjindji me, u adu adhuku nani bhú dabili bini ne Yesu. ¹⁴ Engú bini, u adu di au kpála inde akobho-o alu de uo. U tsia du ne engú nagigie pi uo de. ¹⁵ Abhomu-o, ongámási aha líli me obhulu titima ze kilidjo. U atsia aholo nagama 'ngú sunda o. ¹⁶ U adu apa me: «Ní améne ngú okpála inde-e pi? Padhá de, anga ndu okpála hana na Yelusalema ambila ndjindji me, u amene ngamba 'ngú inde-e ngao. Ní ti la di da nayayala de. ¹⁷ Engú bini, ngubula me ngali ang-o ayángba naali sunda okpála de-e, a ayo me ní gbele 'dje uo kpekpeke me u apá matá engú ne 'li Yesu pi kpála belegu de bini.»

† 4:11 4:11 Tsia bhú Ets. 118:22.

18 Abhomu-o, u a'i matá obhulu titima-o. U atsia aha líli pi uo kpekpeke me, u agáma 'ngú di ne me u asúno ne 'li Yesu matá-a de. 19 Engú bini, Piele ne Djaa agie pi uo me: «Yi kodho 'ngú inde-e ngayi makpe. Bhú djila Ebhe-e, a ngbingbili ne bhedho? Ne me ya mene líli gba yi, ne me ya mene mangbo líli gba Ebhe! 20 La pi ya-a, ya ti da na'o nakpokpo ngali na engú inde ya au e ne bhende ya adje e de.» 21 Abhomu-o, Libi okpála natsia 'kpí li 'ngú gba omaYuda agama matá engú pi uo kpekpeke. Pipita-a, u atsia atse 'kpa li uo. La-a, u u nani engú inde u ti da namene uo sisiti ka e de. Padhá de, anga ndu okpála hana adu adhøgø Ebhe ka engú inde akodho 'kpí-o. 22 Dukuto li nakobho gba e adu ngangamba bhomu-o, adu nani ne kalanga nane ndjikpa badha mane.

Omabhuka ayo Ebhe

23 Li u atse 'kpa li Piele ne Djaa lie, u anu abhaka obi o. U atsia akpokpo ndu 'ngú hana inde li ongbengbe odimandø gba Ebhe di ne obhelesi okpála apa e-e pi uo. 24 Pita u adje engú bhomu-o lie, omabhuka ayo Ebhe ne bua bini me: «Ngámá, mo obho ekpí ne ndu 'he inde bhúbhú-o hana ngamu. Mo obho doto ne ndu 'he inde bhúbhú-o hana ngamu. Mo obho la di 'ngbé 'ngu ne ndu 'he inde bhúbhú-o hana ngamu. 25 Mo opa nani ngamu bhú angu gba Bu Bhobua, bhú 'li ogbi ya Davidi, bali gba mu-o, me:
 <Opiga inde ne omaYuda ade-e abedhe ne siti bua ka ni?

Okpála na kuti koko adje lio ngú namene
ongú na padhá padhá ka ni?

²⁶ Ongbengbe ongámási na doto aleke lio ngú
egú.

Ongámási apo bhúla o bhú dabili bini
ngú nagn Ngámá Ebhe,

di ne kpála inde li Ebhe abhú e-o.* >

²⁷ Padhá de, anga a na paká me ngámá Elode
Atipasi ne Pose Pilatè apo nani bhúla o bhú
gudhú inde, bhú dabili bini ne opiga inde ne
omaYuda ade, di ne opiga na Isalaele. U apo
bhúla o ngubula me o gú Yesu, bali na bubu gba
mú, inde mo obhú e maka Masiya-o . ²⁸ U amene
bhómú-o ndú 'ngú hana inde mo opa nani e
didili ne angu gba mú-o me améne lie mamene
ko. ²⁹ La mbia inde-e, Ngámá, tsia nga maka u
ngato mbolo li ya lie-o. Kaka-a, ha angu pi ya,
obalise gba mú, amba ya akpókpo eli gba mú-o
ne tsulú de. ³⁰ Ha angu gba mú-o pi ya, ngubula
me ya akobho okpála, amba ya mene ongamba
'ngú di ne okiaka 'ngú ne 'li Yesu, bali gba mú
na bubu-o.» ³¹ Li u andjia nayo Ebhe lie, bili inde
u apo bhúla o lie adyiki má djigi djigi! Ndú uo
hana abedhe ne Bu Bhobua. U tsia dú akpokpo
eli gba Ebhe-e ne tsulú de.

Omabhuka abu 'he gba o bhú dabili bini

³² Ndú omabhuka hana adú ne bua bini. U adú
di ne nabhundja bini. Bhú ká uo-o, kpála bini dú

* **4:26** 4:25-26 Kpála inde li Ebhe abhú e-o: A akúnda napa me
Kilisito. Tsia bhú Ets. 2:1-2.

abhundja de me ehe gba ni-e bha pi ni kpi ni kpi-e de. Engú bini, oehe gba uo-o adu bha pi ndu uo hana. ³³ Obhulu titima gba Yesu adu akpokpo ne angu hana me Ngámá Yesu azuku. Abhomu-o, bádha bhú 'bu gba Ebhe-e atsia adu pí ndu uo hana. ³⁴ Bhú ká uo-o, kpála bini du aneke 'he de. Padhá de, anga ndu okpála hana inde adu ne oedyi di ne oeti-e adu atsitsindji, u adu ago ne tia angu-o. ³⁵ U atsia adu ahaha pi obhulu titima. Pipita-a, u atsia adu agbogbo bhusu tia angu-o li kpála bini ne bini maka li gumu gba ani adu lie ko.

³⁶ Kpála bini adu nani bhú ká uo, a adu 'li ani me Djodjefu . Ani adu kpála na piga gba Levi. U azu nani ani bhú kpeme na Sipele. Obhulu titima agisila nani 'ili koko li ani me Balanabasi (inde akunda napa me «Kpála inde ngato masi»). ³⁷ Ani atsindji edyi gba e. Ani ago ne tia angu-o, ani atsia a'o kala obhulu titima.

5

Siti 'ngú gba Anania ne Safila

¹ Abhomu-o, kpála bini inde adu 'li e me Anania, adje lie ne wala e Safila. U atsindji edyi gba o-o. ² Ani aha té tia angu-o, a'o pi e. Ani atsia anu a'o dudu-o kala obhulu titima gba Yesu-o . Wala ani adu ambila 'ngú tété ndjindji. ³ Abhomu-o, Piele apa pi ani me: «Anania, mo oziba me Satana pite ni ngú ni? Mo opa eu pi Bu Bhobua , anga mo oha té tia na edyi-e, mo o'o pi mu. ⁴ Kala me mu tsindji edyi angu-o, a ko nako naamu di? La di-e, mo otsindji lie, tia

ango-o, a ko nako naamu di? Mo oziba me ni mene ngua 'ngú inde-e ka ni? Mu pite okpála de, engú bini, mo opite bhomu-o Ebhe.» ⁵ Bha li nedhinga inde li Anania adje engú bhomu-o lie, ani ati, ani atsia akpi. Ndu okpála hana inde adje engú ango-o, adu ne tsulu naali. ⁶ Abhomu-o, omakombise ago. U agala kuo ani ne bongo , u a'e, u atsia anu azi.

⁷ Masikpe de pita saa bata-a, wala Anania ago ali oo me ani nde mbila engú inde akodho 'kpí-e de. ⁸ Piele ayi ani me: «Pa nga mu, yi atsendji bha ndju edyi gba yi-e bhú mase inde-e?» Òlò-o agie me: «A moko, ya atsendji bhú mase bhomu-o.» ⁹ Abhomu-o, Piele atsia apa pi ani me: «Yi adje liyi ne 'ko mu ngú nale Bua gba Ngámá-a ngú ni? Djedje nga! Okpála inde i kolo nazi 'ko mu-o, u alulu li bhoti bhomu. U abí bhadi mu moko!» ¹⁰ Bha li nedhinga bhomu-o, òlò-o ati kuto bhú li 'dhu Piele, ani atsia akpi. Omakombise ali, u abhaka me ani nde akpi. Abhomu-o, u a'e kuo ani, u atsia anu azi ani dengo 'ko e. ¹¹ Ndu okpála na Piga gba Ebhe-e hana, di ne ndu okpála hana inde adje engú inde akodho 'kpí-e, adje tsulu naali.

Obhulu titima gba Yesu-o amene ongamba 'ngú bhelé

¹² Obhulu titima gba Yesu-o adu amene nani ongamba 'ngú di ne okiaka 'ngú bhelé bhú ká okpála. Ndu omabhuka hana adu apo bhúla o sa basa inde u a'i e me «Sa ngba 'ti gba Salomo.» ¹³ Kpála bini bhú ká okpála bhende i bhuka de-e le nani nali bhú ká uo de, abana li ndu

okpála hana adu apa 'ngú gba uo-o lie ndjindji-o. ¹⁴ Obhosi bhelé naali di ne oliṣi bhelé naali inde abhuka Ngámá-a, adu ali bhú ká omabhuka, u atsia adu abe ndu o. ¹⁵ U aholo belegu apandja okpála na kuo li okpadji. U adu aseke uo pí okalagba di ne pí otsala. U adu amene mo-o, anga u adu abhundja me i du me Piele nde akodho 'kpí oo, kulu ani de pu mbo pí suka uo, amba ani kobho. ¹⁶ Okpála bhelé adu di ayie bhú okuti na ngo Yelusalema, u adu ago ne okpála na kuo di ne okpála inde adu ne osisiti bua bhú o-o. Ndu uo hana atsia adu akobho.

U aholo obhulu titima gba Yesu

¹⁷ Abhomu-o, bhele kpála gba odimandø gba Ebhe-e di ne ndu okpála hana inde adu bhú dabili bini ne ani-e, a akunda napa me libi oSadukai, adje siti bua naali pindji obhulu titima gba Yesu. U atsia apa me, a ayo namene uo sisiti. ¹⁸ U aholo obhulu titima-o, u atsia ato uo bhú tikpu bhe na ngbéngbé-o. ¹⁹ La sukpe-e, andjelu bini gba Ngámá a'u obhe bhoti na tikpu-o. Ani apandja obhulu titima-o. Ani atsia apa pi uo me: ²⁰ «Yi nu bhú 'ngbé 'ti Ebhe gba omaYuda. Oo, yi kpokpo pi okpála ndu 'ngú hana inde atsia mukobho na mbia-o.» ²¹ Obhulu titima-a amene bhadi mo-o. Kekpi naali-e, u anu bhú 'ngbé 'ti Ebhe, u atsia aholo nasuno pi okpála.

Li nedhinga bhomu-o, bhele kpála gba odimandø gba Ebhe-e bhú dabili bini ne okpála gba e-e, u a'i Libi okpála natsia 'kpí li 'ngú gba omafala-ele-o. U atsia atima okpála me u nu ha obhulu titima-a bhú tikpu, amba u go ne uo.

²² Engú bini, li okpála ango-o anu lie, u bhaka uo bhú tikpu de. U agie lio, u atsia apa pi Libi okpála natsia 'kpí li 'ngú gba omaYuda-a me: ²³ «Ya abhaka me 'bhø tikpu-o nde ani lie ndjindji. Okpála nalila tikpu-o nde adulu li obhøbhø. La-a, ya a'u bhoti-e lie, ya abhaka kpála bhúbhú oo belegu de bini!» ²⁴ Li ngámá gba okpála nalila 'ngbé 'ti Ebhe-e, di ne ongbengbe odimandø gba Ebhe, adje engú ango-o lie-e, mabhundja gba uo angbingi naali. U mbila de me a akolo li obhulu titima-a ne mangua 'ngú dho-ie de. ²⁵ Pipita-a, kpála bini ago, ani apa pi uo me: «Yi djedje nga! Okpála inde yi abu nako o bhú tikpu-o, uo mbia inde-e bhú 'ngbé 'ti Ebhe. U alulu malulu, u ngasuno pi okpála.»

²⁶ Abhomu-o, ngámá gba omulila-a anu ne osudha gba e-o. Ani aha obhulu titima-a, ani ago ne uo. Engú bini, u mene uo sisiti de. Padhá de, anga u adu akpe me okpála abhili o ne teme de. ²⁷ Pita ani ago ne uo lie, ani a'o uo kala Libi okpála natsia 'kpí li 'ngú gba omaYuda-o. Abhomu-o, bhele kpála gba odimandø gba Ebhe-e aholo nayiyi uo me: ²⁸ «Ya aha nako líli pi yi kpekpeke me yi asúno ne 'li kpála bhomu-o de. La-a, nasuno gba yi-e aha Yelusalema libhomu! Yi ngakunda me ngute kpála bhomu-o tuko pi ya!»

²⁹ Piele di ne obhulu titima koko agie me: «A ayo me ya mene líli gba Ebhe ane líli gba okpála. ³⁰ Ngayi-e, yi abhølo Yesu li kulusi. Engú bini, Ebhe gba ogbi ní-e azuku ani bhú ká okpála inde amu. ³¹ Ebhe a'e'e ani abhúlá li pá 'kpa e na

kokpa, aní a'ò aní Ngámá di ne Mùkobho . Aní amene mo-o ngubula me okpála na Isalaele dji bua o, amba Ebhe 'e siti 'ngú gba uo-o. ³² Ya au ongú bhomu-o ne djila ya makpe. Bu Bhobua, inde lí Ebhe ngaha e pí okpála inde ngamene lílí gba aní-e, au di.»

³³ Lí Libi okpála natsia 'kpí lí 'ngú gba omaYuda adje engú ango-o lie, u abí 'gú naali. U di me bhili obhulu titima gba Yesu-o. ³⁴ Engú bini muFalisi bini inde adu 'lí e me Gamaliele, a adu bhú ká uo. A adu musuno na lílí . Ndu okpála hana adu amanga aní ndjindji. Aní ayie bhúlá. Aní ayo me u pandja nga obhulu titima-a kilidjo. ³⁵ Pipita-a, aní atsia apa me: «Ngayi okpála na Isalaele, yi lila liyi ndjindji lí 'ngú inde yi adji amene e lí kute okpála inde-o! ³⁶ Padhá de, anga ane nga ekpí bhelé de, kpála bini akoto nako, a adu 'lí aní me Teudasi. Aní adu apa me ní ne 'ngbé kpála. Okpála masikpe de kámá badha adu akpata aní. Engú bini, u abhòò aní lie, ndu okpála hana inde adu akpata aní-e atsia atsambala. Abhomu-o, engú gba aní-e atsia andjia.

³⁷ Pita aní-e, lí nedhinga u adu atanga okpála lie, Yuda, kpála na Galilaya, akoto. Aní agbele okpála nganda e bhelé. Ngaani di-e, u abhòò aní. Abhomu-o, okpála inde adu akpata aní-e atsia atsambala. ³⁸ Kaka mbia inde-e, ma apa pí yi me yi adhdhe lí okpála inde-e de. Yi 'ò uo. Padhá de, anga i du me mabhundja di ne ongú gba uo nde ayie ka okpála-a, i kólo padhá. ³⁹ Engú bini, i du la me ongú bhomu-o nde ayie

ka Ebhe-e, yi tí da nabhøbhøle de. 'E-e! Yi agú gbele ne Ebhe de.»

Abhomu-o, Libi okpála natsia 'kpí li 'ngú gba omaYuda atsia aziba mabhundja gba Gamaliele-o. ⁴⁰ U a'i obhulu titima-o. U aha líli me u bhi uo ne fimbo. U aha di líli pi uo kpekpeke me u akpó 'ngú matá ne 'li Yesu belegu de bini. Pipita-a, u atsia atse 'kpa li uo. ⁴¹ Abhomu-o, obhulu titima-a akoto me u nde abedhe ne djali bedhe. Padhá de, anga Ebhe au ndjindji me u zu likabhu ngubula 'li Yesu. ⁴² Ekpí bini ne bini hana, u adu bha nasuno di ne nakpokpo Bádha Ngali gba Yesu Masiya bhú 'ngbé 'ti Ebhe di ne bhú oti gba o-o.

6

U alo okpála mananika ngú nateteke obhulu titima gba Yesu

¹ Li nedhinga ango-o, omukpata adu akolo bhelé. Engú bini, omaYuda inde adu nadi eli na giliki-e, atsia aholo nadi mutokono li obhende adu nadi eli na ebele-o. U adu apa me: «Ndu 'kpí hana nedhinga nagapa 'zu-o, u ngaha ezú pi oekesi na libi gba ya-a ndjindji ade.» ² Abhomu-o, obhulu titima ndjikpa ne ká bhisi gba Yesu-o apøkøbhø bhúla ndu omabhuka hana. U atsia apa pi uo me: «A ayo de me ya 'o ká nakpokpo eli gba Ebhe-e ngú nagapa 'zu-o de. ³ Kaka-a, ondaise ya, yi gili okpála mananika inde li okpála ngaziba o ndjindji, inde abedhe ne Bu Bhøbua di ne imbilangu bhú ká yi, amba ya ha kulu bhomu-o pi uo. ⁴ Abhomu-o ngaya-a, ya tí da

naha ndu nedhinga gba ya-a hana ngubula nayo di ne nakpokpo Bádha Ngali gba Ebhe-o.»

⁵ Ndu okpála hana aziba engú inde li obhulu titima apa e ko. Abhomu-o, u alo Etieni, kpála inde abedhe ne nabhuka di ne Bu Bhobua, ne Filipo, ne Polokole, ne Nikanola, ne Timoni, ne Palamenasi, ne Nikola, kpála na kuti na Atiokia inde abhuka nani Ebhe gba omaYuda ko.* ⁶ U anu ne uo kala obhulu titima. Abhomu-o, obhulu titima a'o 'kpa o pí uo, u atsia ayo Ebhe pi uo.

⁷ Eli gba Ebhe-e adu bha naya ne kalanu. Abhomu-o, alo gba omabhuka atsia adu a'u ne bhú lá naali bhú Yelusalema. Odimandø gba Ebhe bhelé atsia abhuka di.

U aholo Etieni

⁸ Etieni abedhe nani ne angu ka bádha bhú 'bu gba Ebhe . Abhomu-o, ani atsia adu amene ongbengbe 'ngú di ne ongu na ngangamba bhú ká okpála. ⁹ Okpála koko ago ngu namene kpekebhe ne Etieni. Bhú ká uo-o, okoko adu okpála inde adu apo bhú la o bhú eti nadjé líli gba Moidje , inde u a'i e me «Eti nadjé líli gba okpála inde aze bhú bali-o.» Okoko ayie nani bhú gudhu na Silene, ne bhú gudhu na Alekidjandili, ne bhú ndu doto na Silisia di ne bhú ndu doto na Adjia. ¹⁰ Engú bini, imbilangu gba uo ti nani da nakolo li bhe gba ani-e de. Padhá de, anga ani adu agama 'ngú ne imbilangu di ne angu inde li Bu Bhobua adu aha e pi ani ngae ko.

* **6:5** 6:5 Nabhuka Ebhe gba omaYuda: A akunda napa me okpála koko, inde ne omaYuda ade-e, adjí nani bua o, u atsia abhuka Ebhe gba omaYuda-o. Nikola inde-e, atsia abhuka di nani Yesu.

¹¹ Abhomu-o, u aha tia pi okpála, amba u pa eu li ani me: «Ya adje ani me ani nde ngasobho Moidje di ne Ebhe!» ¹² U amene moko ngabula me okpála, ne obhelesi okpála di ne omusuno na líli-e , bi 'gú ngú Etieni. Pipita-a, u aze li Etieni, u aholo ani. U atsia anu ne ani kala Libi okpála natsia 'kpí li 'ngú gba omaYuda ko. ¹³ Oo, u anu di ne okpála inde adu apa 'ngú li Etieni ne eu. Okpála ango-o atsia adu apa me: «Kpála inde-e, ndu 'kpí hana, ngapa bha bini 'ngú sisiti li kute 'ngbé 'ti Ebhe na bubu gba ní, di ne li kute líli gba Moidje-o . ¹⁴ Ya adje ani me ani nde ngapa me: <Yesu ango-o, kpála na Nadjaleta, abhéle 'ngbé 'ti Ebhe inde, ani tsia djí di odasundu inde ya asia e ka Moidje ko.>» ¹⁵ Ndu okpála inde adu bhú 'ti oo hana abanga djila o li Etieni. U atsia au me bhúla ani adu asu maka bhúla andjelu .

7

Etieni akpokpo 'ngú kala okpála

¹ Abhomu-o, bhele kpála gba odimandø ayi Etieni me: «Engú inde u ngapa e li mu bhomu-o, a ko bha ndju kukulu 'ngú?» ² Etieni atsia agie me: «Odyi ma di ne ondaise ma, yi djedje nga! Ebhe na sangu akoto nani li ogbi ní Abalahama bhú ndu doto na Medjopotami kala me ani nu nasi kuti bhú ndu doto na Alana. ³ Ani atsia apa pi ani me: <O ká doto gba mu di ne piga gba mu-o, amba mu nu bhú doto inde ma asúno e pi mu ko.†>

† 7:3 7:3 Tsia bhú Dje. 12:1.

⁴ Abhomu-o, Abalahama ayie bhú doto gba oKaladea, ani atsia anu nasi kuti bhú Alana. Pita li 'dyi ani akpi lie, Ebhe a'e ani bhú Alana, ani atsia ago a'o ani bhú doto yi nde bhú e mbia inde-e ko. ⁵ Ebhe ha nga nani edyi pi ani sii de, belegu de mboye bili na'o 'dhu e ka ani tété. La-a, ani atsia apa nani pi ani kalanu me: <Ma ahá doto inde-e pi mu, li ongisi gba mu-o* tsia tígala ne di pita mu-o ngao.> La-a, li nedhinga bhomu-o, ndili du nga nani ka ani de.

⁶ Ebhe apa pi ani bhomu-o me: <Ongisi gba ongisi gba mu-o anu adulu bhú doto na gandji gandji. Oo, u akólo obalise gba okpála na doto ango-o. Li okpála ango-o méne uo sisiti ngabula kalanga kámá badha.> ⁷ La-a, Ebhe apa matá di me: <Ma akódho 'ngú gba okpála inde u akólo obalise pi o-o ngama. Pipita-a, u zé oo, u tsia gó dú adhøø ma li bili inde.†> ⁸ Abhomu-o, Ebhe atsia akodho gandja ne Abalahama. Li Abalahama azu Isaka lie, ani atsia ato ani bhú gandja bhú 'kpí na madjina nayie li 'kpí u azu ani lie-o. Isaka amene bhadi moko pi Yakobho. Yakobho atsia amene bhadi moko pi onguo ogbi ní ndjikpa ne ká bhisi-o.

⁹ Pipita-a, onguo ogbi ní ango-o adje siti bua naali pi Djodjefu , ndindili pita o-o. Abhomu-o, u atsia atsindji ani me u nu ne ani bhú bali bhú Edjipeto. La-a, Ebhe adu bhú dabili bini ne ani. ¹⁰ Ebhe agbegbe Djodjefu bhú likabhu gba e hana. Ani asuno bádha bhú 'bu gba e pi ani

* **7:5** 7:5 Ongisi gba mu: A akunda napa me ongisi gba ani na obhosibhosi. † **7:7** 7:6-7 Tsia bhú Dje. 15:13-14.

ne imbilangu, ani atsia amene di me engú gba ani-e d̩u anga li Falao, 'ngbé ngámá na doto na Edjipeto-o naali. Abhom̩-o, Falao atsia a'o ani ngámá pí 'ndji Edjipeto di ne pí 'ndji eti gba e libhomu.

¹¹ Pipita-a, adyindi atsia ali bhú Edjipeto libhomu di ne bhú doto na Kanana. Likabhu ad̩u naali. Kaka-a, onguo ogbi ní d̩u asia ehe naz̩u maz̩u de. ¹² Li Yakobho adje lie me ehe naz̩u maz̩u bhú Edjipeto-o, ani atsia atima ongisi gba e, onguo ogbi ní oo bh̩tsibh̩tsi na bini. ¹³ U an̩u lie bh̩tsibh̩tsi na bhisi-e, Djodjef̩u atsia asuno lie pí ondaise e. Abhom̩-o, Falao atsia ambila piga gba Djodjef̩u-o. ¹⁴ Pipita-a, Djodjef̩u atima okpála me u n̩u ha 'dyi ni Yakobho ne piga gba e hana. U ad̩u nani nd̩u o hana okpála ndjikpa mananika ne ká bhuluvue. ¹⁵ Abhom̩-o, Yakobho an̩u bhú dabili bini ne ongisi gba e, onguo ogbi ní, bhú Edjipeto. U atsia amu oo. ¹⁶ U abha kuo uo an̩u ne di bhú g̩d̩h̩u na Sikeme. Abhom̩-o, u atsia azi bhú lata inde li Abalahama akala nani e ka ongisi gba Emola bhú Sikeme-o.

¹⁷ Li nedhinga akolo lie masakpe ng̩bula me Ebhe mene engú inde ani apa nani e kalan̩u me ni améne e pí Abalahama, piga gba ní-e abe nd̩u e. Okpála atsia akolo bhelé bhú Edjipeto. ¹⁸ Pipita-a, ngámá koko aholo na̩u bhú Edjipeto. Ngámá ango-o mbila nani engú gba Djodjef̩u-o de. ¹⁹ Ani apite okpála gba ní-o, ani atsia amene onguo ogbi ní sisiti. Ani aholo uo ne kpéke me u 'o ká ongisi na ndjendje gba o-o, amba ongisi ango-o mu. ²⁰ Li nedhinga bhom̩-o, u azu

Moidje . Aní adu babadha naali bhú djila Ebhe. U aku aní epe bata bhú 'bu 'ti gba 'dyi e. ²¹ Li u a'o ká aní lie, ndili na øelø gba Falao aha aní, aní atsia aku aní maka ndili gba e makpe. ²² U asuno ndu imbilangu hana gba okpála na Edjipeto pi Moidje. Aní atsia akolo kpekpeke bhú nagama 'ngú di ne namene 'he.

²³ Li Moidje akolo lie ne kalanga ndjikpa badha-a, aní atsia abhundja li bua e me ni nu tsia ondaise ni, omafsalaele. ²⁴ Oo, aní au me maEdjipeto bini ngamene suka omafsalaele sisiti. Abhomu-o, ngú nagie siti 'ngú bhomu-o, aní atsia abhøelø maEdjipeto ango-o. ²⁵ Moidje adu abhundja naae me ondaise ni omafsalaele ambila me Ebhe alo ni ngú nakobho o. Engú bini ngauo-o, u mbila la mo-o de. ²⁶ Li ekpí aseke lie, Moidje abhaka me omafsalaele bhisi nde ngagu gbele sunda o. Abhomu-o, aní akunda nayoko uo. Do aní de-e: <Wai, yi ne ondaise. Yi ngamene liyi sisiti ka ni?> ²⁷ Engú bini, kpála bhende adu amene kilí e sisiti-e andjimba Moidje, aní atsia apa me: <A ko da inde a'o mu ngamá di ne kpála nakodho 'ngú gba ya-a?> ²⁸ Mo okunda nabhøelø ma, maka mo obhøelø lili maEdjipeto lie?†> ²⁹ Li Moidje adje eli bhomu-o lie, aní ayie bhú Edjipeto, aní akpe, aní atsia anu adu bhú doto na Madiana. Oo, aní azu ongisi na obhosibhosi bhisi.

³⁰ Pita kalanga ndjikpa badha-a, andjelu bini akoto li Moidje bhú mili bili denge eta na Sinai. Andjelu ango-o akoto li aní bhú djua me a nde

† 7:28 7:27-28 Tsia bhú Eki. 2:14.

ngatsi bhú tsá 'pó. ³¹ Aní angamba naali ka engú inde aní au e-o. Nedhinga aní adu adyudyo lie lie masikpe ngú natsitsia-a, aní atsia adje 'li Ngámá apa me: ³² <Ma ne Ebhe gba onguo ogbi mu, Ebhe gba Abalahama, Ebhe gba Isaka, Ebhe gba Yakobho.†> Moidje aholo naguku ka tsulu, aní le natsitsia de. ³³ Abhomu-o, Ngámá atsia apa pi aní me: <Pandja maloké bhú 'dhu mu, anga bili mo olu lie inde-e, a ko bili na bubu. ³⁴ Ma au maka u ngato mbolo li okpála gba ma bhú Edjipeto lie au. Ma atsia adje la di maka u ngalopolo lio lie adje. Ma ago ngú nagbegbe uo bhú bali angoo-o. Mbia inde-e, ma ngatima mu bhú Edjipeto, nunu.†>

³⁵ A ko Moidje inde li omafalaale ayala e, inde u apa pi e me: <A'o mu ngámá di ne kpála nakodho 'ngú gba ya-a da?> Ebhe atima aní me aní du ngámá di ne mukobho. Andjelu apa pi aní li nedhinga inde aní akoto li aní lie bhú tsá 'pó inde adu atsi ko. ³⁶ Moidje agbegbe omafalaale bhú doto na Edjipeto ngae. Aní amene ongu na ngbengbengbe di na ngangamba bhú doto angoo-o, bhú 'ngbé 'ngu na Mbembe di ne bhú 'gu. Aní amene ongu angoo-o bhú kalanga ndjikpa badha. ³⁷ A ko matá bhadi Moidje inde apa pi omafalaale me: <Ebhe agbé polofeta pi yi maka ma bhú ká ondaise yi.†> ³⁸ Li onguo ogbi ní apokobhe bhúla o lie bhú 'gu-o, Moidje adu oo. Aní adu bhú dabili bini ne onguo ogbi ní. Aní adu la di bhú dabili bini ne andjelu inde adu agama 'ngú pi aní apí 'ta na Sinai-o. Aní asia

† **7:32** 7:32 Tsia bhú Eki. 3:6. † **7:34** 7:33-34 Tsia bhú Eki. 3:5, 7, 8, 10. † **7:37** 7:37 Tsia bhú Det. 18:15, 18.

eli na mukobho-o ngú nakpokpokpo pi ní ngae.

³⁹ Engú bini, onguo ogbi ní dũ amene líli gba ani-e de, u adũ ayala ani. Abhomũ-o, u adũ akunda nagie lío bhú doto na Edjipeto. ⁴⁰ U apa pi Alona me: <Bho oebhe pi ya, amba u dũ adholo kala ya. Padhá de, anga Moidje inde-e, inde apandja ya bhú doto na Edjipeto-o, ya mbila engú inde akolo li ani-e de.>† ⁴¹ Abhomũ-o, u abho kulu ndili bagala, bhú oekpí bhomũ, u atsia atsulu enũ pi ani. U amene anokomia kabula ehe inde u abho e ne 'kpa o-o. ⁴² Engú bini, Ebhe adji 'ngbũ e li uo, ani atsia a'o uo me u dhөгө oikupala, maka u aye lie bhú bhuku gba opolofeta me:

<Ngayi okpála na Isalaele-e, yi atsulu nani oenũ mũma uu?

Yi aha la di oehe koko mũma uu sũnda kalanga ndjikpa badha bhú 'gũ-o?

A mo-o ade.

⁴³ Yi abi mangbo wema gba ebhe Moloko, di ne kulu ikupala gba ebhe gba yi Lefana-o. A bhomũ-o kulu oehe na padhá padhá, inde yi abho o ngubula nadhөгө o-o.

Kaka-a, ma ambá yi tsutsu nane Babilona mane.†>

⁴⁴ Onguo ogbi ní, bhú 'gũ-o, adũ nani ka uo ne 'ti ngbangbali li Ebhe adũ asuno lie bhú e-o. Moidje abho nani maka bhende li Ebhe asuno nani e pi ani-o. ⁴⁵ Abhomũ-o, u atsia aha 'ti ngbangbali ango-o pi ongisi gba onguo ogbi ní, inde adũ li nedhinga li Djodjue adũ lie ngámá-o.

† **7:40** 7:40 Tsia bhú Eki. 32:1. † **7:43** 7:42-43 Tsia bhú Ams. 5:25-27.

U atsia adu ali ne di bhú odoto gba opiga inde li Ebhe ato nani holo bhú 'dhu o kala uo-o. U adu oo akolo bhú nedhinga gba 'ngbé ngámá Davidi.

⁴⁶ Engú gba Davidi inde asia nani bádha bhú 'bu gba Ebhe-e , adu bhú djila Ebhe ndjindji. Ani atsia ayo nani kpadji me ni yiki eti pi Ebhe gba Yakobho. ⁴⁷ Engú bini, Salomo, ndili gba Davidi-e, ayiki mangbo nani eti pi ani ngae. ⁴⁸ La-a, Ebhe Apí 'Kpí dudu bhú 'ti inde li okpála ayiki e ne 'kpa o-o de. Maka li polofeta apa lie me:

⁴⁹ <Ngámá apa me: ekpí ne dabili na ngámá gba ma-o.

Doto ne dabili na sa 'dhu ma.

Mangua 'ti dho yi ayiki e mama?

Bili ma agúo lie su?

⁵⁰ Ma bho ndu 'he bhomu-o hana ngama di?†»

⁵¹ Pipita-a, Etieni atsia apa me: «Ngayi-e, yi ne okpála na kpekpeke 'ndji! Bua yi agbigbite lie, 'dje yi atsia anini! Ndu 'kpí hana yi ngamene kpekebhe ne Bu Bhobua maka onguo ogbi yi! ⁵² A ko polofeta bhedho inde li onguo ogbi yi to mbolo li e de-e? U abhelo belegu obhende akpokpo 'ngú pindji nago ka Kpála na Ngingbili-o. Mbia inde-e, kpála ango-o, yi apu ani, yi atsia abhelo ani. ⁵³ Ngayi okpála inde asia líli gba Ebhe-e ka oandjelu-o, engú bini, yi mene la líli ango-o de!»

U abhelo Etieni

⁵⁴ Li okpála inde adu li bili nakodho 'ngú-o adje engú li Etieni apa e lie, u abi 'gú li bua o. U atsia aholo nazu tate o ngubula ani. ⁵⁵ Engú

† **7:50** 7:49-50 Tsia bhú Isa. 66:1-2.

bini, Etieni inde adu me ani nde abedhe ne Bu Bhobua-a, atsia 'kpí ne abhúlá, ani au zi Ebhe. Ani atsia au di Yesu me ani nde alu li pá 'kpa na kokpa gba Ebhe-o. ⁵⁶ Ani atsia apa me: «Yi djedje nga! Ma au kokpí abhulu lie, Ndili gba kpála alu li pá 'kpa na kokpa gba Ebhe!»

⁵⁷ Ndu okpála hana inde adu oo adje engú bhomu-o lie, u asula ne 'ue kpekpeke, u anini 'dje o. U anu ndu o hana bhú dabili bini, u atsia atuko pí Etieni. ⁵⁸ U agbe ani bhú gudhu-o, u atsia aholo natutulú ani ne oteme ngú nabhøø ani. Okpála inde adu apa 'ngú li ani ne eu-o, abhu nani makombi bini. U atsia abu obongo gba o-o bhú li 'dhu ani ngú nalilila. A adu 'li makombi angoo me Saulo.† ⁵⁹ Nedhinga u adu atutulú Etieni lie ne teme ngú nabhøø ani-e, ani atsia ayo Ebhe me: «Ngámá Yesu, ha bua ma haha!» ⁶⁰ Abhomu-o, ani akikita lipuku e kuto, ani asula kpekpeke me: «Ngámá, mo otsia siti 'ngú gba uo-o de!» Pita ani apa 'ngú bhomu-o lie, ani atsia andala 'kpa li bua e.

8

¹ Abhomu-o, Saulo atsia aziba me u bheø Etieni.

U aholo nato mbolo li okpála na Piga gba Ebhe

Bha li 'kpí angoo, u aholo nato mbolo naali li okpála na Piga gba Ebhe na gudhu na

† **7:58** 7:58 Saulo: A ko 'ili na ebele. Polo: a ko 'ili na giliki. U aholo na'i ani me Polo li nedhinga ani aholo nakpokpo Bágha Ngali lie pi ogandji okpála ko.

Yelusalema. Ndu omabhuka hana akpe, naneke bha bini obhulu titima gba Yesu-o . U atsia atsambala bhú ndu doto na Yudaya ne bhú ndu doto na Samalia. ² Okpála koko bhende adu akpe Ebhe-e aku 'gbá Etieni naali. U aha kuo ani, u atsia anu azi. ³ La-a, Saulo aholo nato mbolo li Piga gba Ebhe-e ngú nabhøbhøle. Ani adu nali bhú 'ti bini ne bini. Ani adu napandja omabhuka, olisi di ne obhosi, ani atsia adu namba uo bhú tikpu.

Filipo akpokpo Bádha Ngali bhú Samalia

⁴ Omabhuka inde atsambala adu anu ne ndu bili hana me u nde ne kpokpo Bádha Ngali . ⁵ Abhomu-o, Filipo anu bhú suka gudhu bini na Samalia. Oo-o, ani atsia akpokpo ngali gba Masiya-o . ⁶ Okpála bhelé ne bua bini abhuka 'li Filipo. Padhá de, anga u adu adje ngali ongu na ngangamba inde ani adu amene e-o. U atsia adu la di auu ne djila o. ⁷ Osisiti bua bhelé aze bhú okpála. Osisiti bua angoo adu aze me u nde ngatuu 'ue kpekpeke. Okpála bhelé inde adu odukuto, di ne obhende adu ne eze li 'dhu o-o, atsia akobho. ⁸ Abhomu-o, djali atsia adu naali bhú gudhu angoo.

⁹ Kpála bini adu nani bhú gudhu angoo, a adu 'li ani me Simo. Nayie didili naali, ani adu amene 'ngú na mambengu mambengu. Ndu okpála hana na ndu doto na Samalia adu angamba ka ani naali. Ani atsia adu apa me ni ne 'ngbé kpála. ¹⁰ Ndu okpála hana adu aha lio ngú nadje ani, nayie li okpála na padhá, akólo li okpála na ngbengbengbe. U adu napa me: «Kpála inde-e,

a ko angu gba Ebhe, angu inde u a'i e me <Angu na ngbéngbé.>» ¹¹ U adu nakpata ani, anga nayie didili naali, ongu na mambengu gba ani-e adu angamba uo naali. ¹² Engu bini, li Filipo adu akpokpo Bádha Ngali Nau gba Ebhe , di ne Yesu Kilisito lie pi uo-o, olisi ne obhosi abhuka. Pipita-a, u atsia asia batisimo. ¹³ Simo abhuka belegu di ngae, ani atsia asia batisimo. Ani du matá nayie de Filipo de. Ani adu nangamba naali li oehe di ne ongamba 'ngu na ngbéngbéngbé inde li Filipo adu namene e-o.

¹⁴ Obhulu titima gba Yesu abhu gudhu na Yelusalema adje me okpala na ndu doto na Samalia asia eli gba Ebhe-o . Abhomu-o, u atima Piele di ne Djaa pi uo. ¹⁵ U akolo lie bhú ndu doto na Samalia oo, u atsia ayo Ebhe pi uo ngubula me u sia Bu Bhobua . ¹⁶ Padhá de, anga Bu Bhobua ke nga nani pi saka uo bini de. U asia nga bha nani batisimo ne 'li Ngamá Yesu. ¹⁷ Abhomu-o, Piele ne Djaa a'o 'kpa o pi 'ndji uo, u atsia asia Bu Bhobua.

¹⁸ Simo au me Bu Bhobua ake pi okpala inde li obhulu titima a'o 'kpa o pi 'ndji o-o. Abhomu-o, ani ago ne tia me ni ngaha makiso pi Piele ne Djaa. ¹⁹ Do ani de me: «Yi ha di angu angoo muu, amba kpala bhende ma a'ó 'kpa ma pi 'ndji e, ani de sia Bu Bhobua.» ²⁰ Engu bini, Piele agie pi ani me: «Siti de bhaka bhado bha mu bhú dabili bini ne tia gba mu-o! Padhá de, anga mo obhundja me mu ti da nakala ehe inde li Ebhe ngaha e padhá-a ne tia. ²¹ Ndu 'ngu inde ngakodho 'kpi inde-e hana, a pi mu ade. Mu ti

la di da nali bhúbhú de. Padhá de, anga bua m̄ kala Ebhe ngbingbili ade. ²² La-a, dji bua m̄ ka siti 'ngú inde mo obhundja e li bua m̄ ko. Yo ka Ngámá ngubula me, i d̄ me ani nde akunda-a, ani de 'e siti 'ngú ango-o. ²³ Padhá de, anga ma au me mo obedhe bhú m̄ ne ḡm̄ 'he. M̄ la di bhú 'kpú gba siti.» ²⁴ Abhom̄-o, Simo apa pi Piele ne Djaa me: «Ngayi makpe-e, yi yo mangbo Ngámá ngú ma ngayi, ngubula me ngua 'ngú yi apa e bhom̄-o, akólo li ma de.»

²⁵ Pipita-a, Piele ne Djaa akpokpo ongú inde li Ngámá Yesu amene e li djila uo-o. U asuno eli gba ani-e pi okpála. Abhom̄-o, u atsia agie lio bhú Yelusalema. Li kpadji-e, u akpokpo Bádha Ngali bhú okuti bhelé na ndu doto na Samalia.

Kpála bini na Etiopi adji bua e

²⁶ Pipita-a, andjelu bini gba Ngámá-a apa pi Filipino me: «Yie bhúlá, amba m̄ k̄ li pápá na yoyoko, li kpadji inde ayie bhú ḡdh̄ na Yelusalema, atsia ak̄ bhú Gadjá ko. Kpadji ango-o ap̄ bhú mili bili.» ²⁷ Abhom̄-o, Filipino ayie bhúlá, ani atsia aholo ne enú li kpadji ango-o. Li kpadji-e, bhoko bini akoto. A ad̄ nani eniki,* 'ngbé kpála na doto na Etiopi. Ani ad̄ nalila nd̄ tia hana gba Kandase, ngámá na øeø na Etiopi-o. Ani an̄ nani bhú Yelusalema ngú nadhøø Ebhe, ²⁸ ani atsia ad̄ nagie lie agba e. Ani ad̄ kuto bhú kpulukpulu gba e-o. Ani atsia ad̄ natanga bhuku gba polofeta Isaya.

* **8:27** 8:27 Eniki: A ko bhoko inde i ti da nakunda øeø de, anga angu na bhoko bhú ani ade. Tsia bhú Mat. 19:12.

29 Bu Bhobua apa pi Filipino me: «Nɔ de kpulukpulu bhomɔ, amba yi nɔ ne bhɔbhɔlɔ-o.» 30 Filipino anɔ bhɔ holo, ani atsia adje kpála na Etiopi bhomɔ-o ngatanga bhɔ bhuku gba polofeta Isaya. Abhomɔ-o, Filipino ayi ani me: «Engú inde mɔ ngatanga e bhomɔ-o, mɔ ngadje tata-a uu?» 31 Kpála ango-o agie me: «Ma ambála la tata-a lele pi, i dɔ me kpála nde kpokpo kúkú mɔma de-e?» Abhomɔ-o, ani a'i Filipino me ani 'ɔ bhɔ kpulukpulu-o, amba ani dɔ de ni. 32 Eli inde ani adɔ atanga e bhɔ bhuku gba Isaya ngae inde: «U adɔ nanɔ ne ani maka kandɔlɔ inde u adji nabhɔlɔ e,
maka ndili kandɔlɔ inde agbite 'bhɔ e li nedhinga u ngaka su ani lie-o.

Ani 'ɔ 'bhɔ e de.

33 U akɔ ani ne kuto, u kodho 'ngú gba ni-e ngbingbili de.

A ko da inde i ti da napa 'ngú gba ongisi gba ani-e?

Padhá de, anga u a'e makobho gba ani-e pɔla doto a'e.†»

34 Bhoko na Etiopi ango-o ayi Filipino me: «Ma ayo ka mɔ me pa nga mɔma: polofeta ngapa 'ngú bhomɔ-o li da? Ne me ani ngapapa li e, ne me ani ngapapa li kpála koko?» 35 Abhomɔ-o, Filipino aholo na'o'o tata pi ani li Bádha Ngali gba Yesu-o nayie li Eli inde ani adɔ atanga e-o.

36 U adɔ anɔ lie li kpadji-e, u akolo li bili bini, adɔ oo ne engu. Abhomɔ-o, 'ngbé kpála ango-o apa pi Filipino me: «Tsia nga engu ii! Nasia batisimo ka ma-a, a adha mbia inde-e li ni?»

† 8:33 8:32-33 Tsia bhɔ isa. 53:7-8.

[³⁷ Filipo atsia apa pi ani me: «I da me ma nde abhuka ne bua ma hana-a, ma ti da nasia batisimo.» Kpála angoo agie pi ani me: «Ma abhuka me Yesu Kilisito ne Ndili gba Ebhe.»] ³⁸ Abhomu-o, ani atsia apa me kpulukpulu-o lulu. Pipita-a, ndu uo bhisi hana, Filipo ne kpála angoo, akə bhú 'ngu. Filipo atsia abatisa ani. ³⁹ Li u aze lie bhú 'ngu-o me-e, Bua gba Ngámá-a atsia adhepe Filipo. Kpála na Etiopi u matá ani de. Kpála na Etiopi angoo aholo bha ibili enú kpi e kpi me ani nde ngakpi djali. ⁴⁰ La pi Filipo-o, u anu au bha ibili ani bhú gudhu na Adjota. Pipita-a, ani apu bhú ndu ogudhu hana me ani nde ngakpokpo Bádha Ngali akólo bha bini li nedhinga ani akolo lie bhú Sedjale ko.

9

Saulo adjí bua e

(Tsia bhú Kul. 22:6-16, 26:12-18.)

¹ Li nedhinga bhomu-o, Saulo adu nagili omukpata gba Ngámá Yesu ngu nabhili uo. Ekpí koko ani anu nabhaka bhele kpála gba odimandə gba Ebhe-o. ² Ani anu nayo balua me ni nu ne di ngu nali bhú oti nadjé líli gba Moidje inde bhú gudhu na Damasi. Ni nu oo, amba i da me ni nde abhaka okpála inde ngakpata 'ngu gba Yesu-o, obhosi di ne olisi, ni de holo uo, amba ni nu ne uo bhú gudhu na Yelusalema.

³ Nedhinga ani adu anu lie, ani akolo lie de Damasi masikpe-e, má gala kolo me-e, zi 'kpí bini ayie abhúlá, a ago asa ngo ani ngbalina. ⁴ Ani atsokodho ati kuto má ngbi! Ani atsia adje eli

bini apa pi ani me: «Saulo, Saulo, mụ ngato mbolo li ma ngú ni?» ⁵ Abhomụ-o, Saulo atsia ayi me: «Ngámá, a ko mụ da?» Eli atsia akoto matá pi ani me: «A ko ma Yesu, mụ ngato mbolo e li ma. ⁶ La-a, yie bhúlá yiyie, amba mụ nụ bhú gụdhụ. Engú inde ayo me mụ mene e-e, u apá pi mụ oo ko.»

⁷ Okpála inde adụ anụ ne ani bhú dabili bini-e alulụ. Bhú 'bhø uo akpina má ndje ka tsulụ. U adụ adje eli, engú bini, u dụ au kpála inde adụ agama 'ngú-o de. ⁸ Abhomụ-o, Saulo ayie bhúlá, ani abhulu djila e, engú bini, ani u la 'kpí de. U atsia aholo 'kpa ani ngú nanụ ne ani bhú Damasi. ⁹ Oo, ani amene ngbolo 'kpí bata. Ani u 'kpí de, ani zụ 'he de, ani ndji la di ehe nandji mandji de.

¹⁰ Mụkpata bini adụ bhú Damasi oo, a adụ 'li ani me Anania. Ngámá a'i ani bhú ehe maka loto me: «Anania!» Anania atsia abhuka me: «Ma ii, Ngámá!» ¹¹ Abhomụ-o, Ngámá atsia apa pi ani me: «Mbia inde-e, a ayo me mụ nụ li kpadji inde u a'i e me Ngbili kpadji bhú 'ti gba kpála bini inde u a'i e me Yuda. Yi Saulo, kpála na gụdhụ na Talasi. Li nedhinga inde-e, ani ngayo Ebhe. ¹² Ani atsia au bhú 'he maka loto kpála bini, inde 'li e me Anania, ali bhú 'ti nganda ni. Kpála angoo atsia a'o 'kpa e pí 'ndji ani ngú napa me ani u matá 'kpí.»

¹³ Anania atsia agie me: «Ngámá, okpála bhelé apa 'ngú mụma pindji bhoko bhomụ. Ma mbila la di ndụ siti 'ngú hana inde ani amene e li kute okpála na bububu gba mụ bhú Yelusalema-o. ¹⁴ Ongbengbe odimandø aha la di kpadji pi ani

me ani go ei ngú naholo ndu okpála hana inde ngabhuka ma-o.» ¹⁵ Engú bini, Ngámá apa pi ani me: «Nunú, anga bhoko bhomu-o, ma abhu ani ngú kulu gba ma-o. Ani anú nakpokpo engú gba ma-a pi opiga inde i mbila ma de, pi ongbengbe ongámási gba uo, di ne pi omaɪsalaele. ¹⁶ Ma asúno pi ani, ngama makpe, ndu likabhu hana inde a ayo me ani zu e kabula 'li ma-o.»

¹⁷ Abhomu-o, Anania anu, ani ali bhú 'ti oo, ani abhaka Saulo, ani a'o 'kpa e pi ani. Ani atsia apa me: «Ndai ma Saulo, Ngámá atima ma ngae. A ko Yesu inde akoto li mu li kpadji nedhinga mo odu nago lie-o. Ani atima ma, ngubula me mu u matá 'kpí, amba mu bedhe di ne Bu Bhobua .»

¹⁸ Kolo má gala me-e, ehe maka kudhu 'he ayie bhú djila Saulo, abala kuto. Ani atsia aholo nau matá 'kpí. Abhomu-o, ani ayie bhúlá, ani atsia asia batisimo. ¹⁹ Pipita-a, ani azu 'he, ani atsia asia angu.

Saulo akpokpo Bádha Ngali bhú gudhu na Damasi

Saulo amene mbo ekpi bhú dabili bini ne omakpata na Damasi. ²⁰ Kolo má gala me-e, ani aholo nakpokpo pi omaYuda bhú oeti nadje líli gba Moidje me Yesu ne Ndili gba Ebhe. ²¹ Ndu okpála hana inde adu nadje ani-e adu angamba naali. U adu nayi me: «A inde-e bhulu nato mbolo li okpála inde ngabhuka Yesu abhu gudhu na Yelusalema di? Ani go nako e ngú naholo uo, di ne nanu ne uo pi ongbengbe odimandø gba Ebhe di?»

²² Engú bini, Saulo adu akolo ne angu bhú nasuno. Aní adu asuno mbámhá pí omaYuda na Damasi me Yesu ne Masiya . Kaka-a, u du nambila matá engú inde u agíe e pí aní-e de.

²³ Pita ekpí bhelé, omaYuda adje lio me o bhøø Saulo. ²⁴ Engú bini, Saulo ambila siti mabhundja gba uo-o. U atsia adu di nalila obhoti na gudhu-o sukpe ne ngbikpi ngubula nato aní, amba o bhøø aní. ²⁵ Sukpe bini-e, ngaani ne omakpata gba e, u anu li malilisa na aga na gudhu-o. U ato aní bhú kili, u atsia akø aní ne di kuto akilidjo.

Saulo bhú gudhu na Yelusalema

²⁶ Li Saulo akolo lie bhú Yelusalema-a, aní adu nale nagbite lie li omakpata, engú bini, ndu uo hana adu nadje tsulu. Padhá de, anga u du nabhuka de me a ko ndju kukulu mukpata-a de. ²⁷ La-a, Balanabasi anu aha Saulo, aní atsia anu ne aní pí obhulu titima gba Yesu-o . Oo, Balanabasi akpokpo pí uo maka li Saulo au Ngámá Yesu lie li kpadji, di ne maka li Ngámá agama 'ngú lie pí aní-o. Aní atsia akpokpo di maka li Saulo du nasuno 'ngú lie ne tsulu de ne 'li Yesu bhú Damasi-o. ²⁸ Abhomu-o, obhulu titima atsia aziba Saulo. Nayie li nedhinga bhomu-o, Saulo du matá na'o ká obhulu titima-a de. U adu adhuku bhú Yelusalema bhú dabili bini. Aní tsia du nasuno ne 'li Yesu ne tsulu de. ²⁹ Aní adu di nasuno pí omaYuda inde adu nadi eli na giliki-o, aní atsia adu namene kpekebhe ne uo. Engú bini, ngauo-o, u adu agili nabhøø aní. ³⁰ Li ondaise Saulo, omabhuka adje lie, u anu na'o

Saulo bhú Sedjale. Oo, u atsia atima ani bhú Talasi.

³¹ Abhomu-o, omabhuka bhú ndu doto na Yudaya, bhú ndu doto na Galilaya, di ne bhú ndu doto na Samalia libhomu adu bhú guo 'ngú . U adu akolo kpekpeke bhú nabhuka. U adu amanga Ngámá mamanga. U atsia adu nabe ndu o, ka angu gba Bu Bhobua.

Piele akobho Ene

³² Piele adu naru ne ndu bili hana. Abhomu-o, ekpí bini, ani anu natsia omabhuka inde adu bhú gudhu na Lida-o. ³³ Oo-o, ani abhaka bhoko bini, a adu 'li ani me Ene. Sunda kalanga madjina, ani adu me ani nde asi kuto pí kalagba gba e-o. Padhá de, anga adu nani dukuto. ³⁴ Li Piele au ani lie, ani atsia apa pi ani me: «Ene, Yesu Kilisito akobho mu mbia inde akobho! Yie bhúlá, amba mu leke dabili gba mu-o, ngamu makpe.» Kolo má gala me-e, Ene ayie bhúlá. ³⁵ Ndu okpála hana na Lida, di ne egu na Salona au lie mo-o, u adji bua o, u atsia abhuka Ngámá

Piele azuku Tabita

³⁶ Li nedhinga bhomu-o, mukpata bini na eole adu nani bhú gudhu na Djope, a adu 'li ani me Tabita (bhú eli gba oGiliki-e me «Dolokasi», a akunda napa me «gbelende»). Ani adu amene obabadha 'ngú, ani atsia adu ateteke di obhulu ndibhili ndu 'kpí hana. ³⁷ Ekpí bini, ani asi kuo, ani atsia akpi. U avulu kute kuo ani, u atsia a'o bhú tina 'ti bini abhúlá.

³⁸ Gudhu na Lida masikpe de gudhu na Djope. Kaka-a, li omukpata adje lie me Piele bhú Lida-a,

u atsia atima okpála bhisi ngú napa pi ani me: «Kikiliako, ya ayo ka ma me go nga gba ya ei má gala!» ³⁹ Piele ayie bhúlá kolo má gala, ani atsia anu bhú dabili bini ne okpála inde u atima o-o. Ani akolo lie oo-o, u anu na'o ani bhú tina 'ti inde abhúlá-o. Ndu oekesi hana na gudhu angoo ago de Piele me u nde ngaku 'gbá. U adu asuno obongo na mbulu, di ne okoti inde li Tabita adu amene e nedhinga ani adu lie bhú mukobho-o pi ani.

⁴⁰ Piele apandja ndu okpála hana kilidjo, ani akikita lipaku e kuto, ani atsia ayo Ebhe. Pipita-a, ani adji bhúla e ne apí kuo-o, ani atsia apa me: «Tabita, yie bhúlá!» Abhomu-o, Tabita a'u djila e. Li ani au Piele lie, ani atsia adu madu. ⁴¹ Piele aholo 'kpa ani, ani atsia a'e ani bhúlá. Pipita-a, Piele a'i omabhuka koko di ne oekesi na olisilisi, ani atsia asuno ani pi uo me ani nde u. ⁴² Ndu okpála hana na Djope adje engú inde akodho 'kpí-o. Abhomu-o, okpála bhelé atsia abhuka Ngámá. ⁴³ Piele amene bhú Djope ekpí bhelé. Ani adu nadu gba kpála bini inde li 'li e adu me Simo. Kpála angoo adu namene kulu na kó 'nu.

10

Koloneli a'i Piele agba e

¹ Kpála bini adu nani bhú gudhu na Sedjale, a adu 'li ani me Koloneli. Ani adu ngámá pí 'ndji osudha kámá bini. Libi osudha angoo inde u a'i e bhú dabili bini ne osudha koko-o me «Libi osudha na Itali.» ² Kpála angoo adu amanga

Ebhe di ne nakpe Ebhe bhú dabili bini ne piga gba e libhomu. Aní adu ateteke obhulá ndibhili inde adu bhú ká omaYuda-a naali. Aní atsia adu ayo Ebhe piko.

³ Ekpí bini, masikpe de saa na bata pita tulukpe-e, aní au mbámbá bhú 'he maka loto me andjelu bini gba Ebhe-e nde ngali agba aní. Andjelu ango-o a'i aní me: «Koloneli!» ⁴ Aní atsia andjelu ango-o ne tsulá hana. Aní atsia apa pí aní me: «A ko mangua 'ngú dho, Ngámá?» Andjelu-o agie pí aní me: «Ebhe adje nayo gba mu-o adje. Aní aziba di oehe inde mu ngaha e pí obhulá ndibhili-o. Kaka-a, 'to aní 'ili li mu de. ⁵ Mbia inde-e, tima okpála bhú Djope ngabula na'i kpála bini inde u agisila 'li e me Simo Piele-o. ⁶ Aní ngasi agba kpála bini inde 'li e me Simo, kpála namene kulu na kó 'nu. Kutí gba aní-e a de 'ngbé 'ngu.» ⁷ Pipita-a, andjelu inde agama 'ngú pí aní-e atapa. Abhomu-o, Koloneli atsia a'i okpála na kulu gba e bhisi, di ne sudha bini. Sudha ango-o adu kpála nakpe Ebhe. Aní atsia asi di nani bhú kulu gba aní-e naali. ⁸ Koloneli akpokpo ndu 'ngú inde akodho 'kpí-e hana pí uo. Pipita-a, aní atsia atima uo bhú Djope. Abhomu-o, u atsia agbida.

Piele anu agba Koloneli

⁹ Li ekpí aseke lie, okpála u atima o-o adu nga bha lie li kpadji-e, u akolo de gudhu na Djope. A abhaka me Piele nde a'u apí 'ngbu 'ti ngú nayo Ebhe masikpe de tulukpe. ¹⁰ La-a, gumu aholo amene aní, aní adu akunda nazu 'he. Nedhinga u adu alu 'zu-o lie pí aní-e, aní atsia au engú maka

loto. ¹¹ Aní au kokpí abhulu lie. Aní au ehe bini maka 'ngbé 'kpá bongo . U ahoholo lí odjedje badha. A ayie abhúlá, atsia adu akò kuto.

¹² Bhú 'ngbé 'kpá bongo ang-o, ndu djua onu hana na 'dhu badha, ne ndu djua onu inde ngagbele lio ne 'bu o kuto, di ne ndu djua odhu hana adu bhúbhú. ¹³ Abhomu-o, aní adje eli bini inde apa pí aní me: «Piele, yie bhúlá! Bhòbhòlò, amba mu zu!» ¹⁴ Engú bini, Piele agie me: «A mo-o ade, Ngámá! Padhá de, anga ma zu nga ezú inde lí líli gba Moidje ayala e, di ne bhende na sisiti kala Ebhe belegu de bini.* » ¹⁵ Aní adje matá eli ang-o bhútsibhútsi na bhisi-e me: «Ehe inde lí Ebhe adji e akolo bubu-o, mo opá de me a sisiti-e de.» ¹⁶ Engú ang-o amene lie bhútsibhútsi bata. Pipita-a, má gala kolo me-e, bongo ang-o atsia agie lie abhúlá.

¹⁷ Abhomu-o, mabhundja gba Piele atsia angbingi ka engú inde aní au e-o. Aní adu ayi bua e me: «Tata-a pí?» Bha lí nedhinga lí Piele adu ayi bua e lie bhomu-o, okpála inde lí Koloneli atima o akolo lí bhoti gba Simo-o. A adu me u nde ayi okpála me eti gba Simo-o su. ¹⁸ U a'i kpála bini, u atsia ayi aní me: «A inde-e bili lí Simo u agisila 'lí e me Piele asisi lie?» ¹⁹ Lí nedhinga bhomu-o, Piele adu nga bha nabhundja pindji engú inde aní au e-o. Abhomu-o, Bu Bhobua atsia apa pí aní me: «Tsitsia nga, okpála bata†

* **10:14** 10:14 Líli gba omaYuda adu nani nayala nazu onu koko maka pame mayala. † **10:19** 10:19 U aye bhú obhuku koko me «kpála bini.» U aye bhú okoko me «okpála bhisi.» U atsia aye bhú okoko me «okpála.»

ngagili mɔ. ²⁰ Yie bhúlá, kə akuto, amba yi nɔ bhú dabili bini ne uo. Mo odjídji limɔ de. Padhá de, anga ma atima uo ngama.»

²¹ Abhomɔ-o, Piele akə, ani abhaka okpála angoo. Do ani pi uo me: «Kpála inde yi ngagili e-e, a ko ma. Yi ago la ngú ni?» ²² U agie pi ani me: «Ngámá gba osudha, inde 'li e me Koloneli-e atima ya ngae. A ko kpála na ngbingbili, inde di ngadhəgə Ebhe. Ndɔ omaYuda hana ngapa 'ngú gba ani-e ndjindji. Andjelu bini gba Ebhe-e akoto li ani, ani atsia apa pi ani me: <Tima okpála ngú na'i Piele, amba mɔ dje engú inde ani akpókpo e pi mɔ ko.» ²³ Abhomɔ-o, Piele ato okpála angoo abhú 'ti. Ani atsia asuno dabili u asi lie pi uo. U atsia asi tété.

Li ekpí aseke lie, Piele anɔ bhú dabili bini ne uo. Abhomɔ-o, omabhuka koko na Djope atsia anɔ na'o Piele. ²⁴ Pita 'kpí bini-e, u atsia akolo bhú Sedjale. A abhaka me Koloneli nde apo bhúla omaha e di ne obi e na mukunda. Ani atsia adu adjeke uo oo. ²⁵ Li Piele akolo lie, Koloneli ago nakə lio ne ani. Ani ati bhú li 'dhu ani. Ani atsia atɔ bhúla e ne kuto ngú namanga ani. ²⁶ Engú bini, Piele a'e ani bhúlá. Ani atsia apa pi ani me: «Lɔ malɔ! Padhá de, anga ngama-a, ma bhadi ne kpála na padhá!» ²⁷ Ani adu agama 'ngú lie ne Koloneli-e, ani atsia ali abhú 'ti. Oo, ani abhaka me bhiti okpála nde apo bhúla o. ²⁸ Ani apa pi uo me: «Yi ambila ndjindji me líli ziba de me maYuda bini dɔ bhú dabili bini ne gandji kpála-a de. A ziba la di de me ani nɔ agba ani-e de. Engú bini, ngama-a, Ebhe asuno mɔma

me ma a'í kpála bini de me a ko kpála na sisiti kala Ebhe-e de. ²⁹ Kaka-a, mo o'i ma lie, ma yala de. Mbia inde-e, ma akúnda nambila ta 'ngú inde mo o'i ma ngú e-o.»

³⁰ Abhomu-o, Koloneli agie pi ani me: «A ane nga ekpí bata, masakpe de li ngua nedhinga inde, bhú saa na bata pita tulukpe, ma adu nayo Ebhe bhú 'ti gba ma-o. Kolo me-e, kpála bini alu kala ma. Aní adyi bongo inde adu li e ne zizi. ³¹ Aní atsia apa muma me: <Koloneli, Ebhe adje nayo gba mu-o adje. Aní atsia abhundja di maka mu ngateteke obhulu ndibhili lie ko. ³² Mbia inde-e, tima okpála bhú Djope ngú na'i Simo inde u agisila 'li e me Piele. Aní ngadu gba Simo, inde adudu dengo 'ngbé 'ngu, kpála namene kulu na kó 'nu.> ³³ Abhomu-o, ma atima bha kolo okpála ngú na'i mu má gala! Heni naali! A ndjindji maka mo ogo lie-o. Mbia inde-e, ndu ní hana ní kala Ebhe si ngú nadje ndu 'ngú hana inde li Ngámá akpokpo e pi mu me mu pa e pi ya-o.»

Piele akpokpo Bádha Ngali pi ogandji okpála

³⁴ Abhomu-o, Piele aholo nakpokpo me: «Mbia inde-e, ma ambila ndjindji me Ebhe gbogbo bhusu okpála de. ³⁵ Engú bini, bhú ká ndu opiga hana, kpála inde ngamanga Ebhe, inde di ngamene engú na ngbingbili-e, kpála ango-o bhú djila Ebhe ndjindji. ³⁶ Yi mbila ndjindji me Ebhe atima eli gba e pi omafsalaele. A ko Bádha Ngali na guo 'ngú inde ní asia e ka Yesu Kilisito-o . Ngaani-e, a ko Ngámá gba ndu okpála hana. ³⁷ Yi mbila ndu 'ngú hana inde akodho 'kpí nayie

bhú ndu doto na Galilaya, akolo bhú ndu doto na Yudaya libhomu, pita li Djaá akpokpo eli gba Ebhe , di ne nabatisa okpála lie ko.

³⁸ Yi mbíla hana me Ebhe abhú nani Yesu, kpála na Nadjaleta-a kalanu. Aní atsia aha Bu Bhobua di ne angu pí ani ngú namene kulu gba e-o. Aní apu ne ndu bili hana me aní nde ngamene bádha 'ngú. Aní atsia adu di nakobho ndu okpála hana inde li Djabulu agbigbite o-o. Padhá de, anga Ebhe adu bhú dabili bini ne ani. ³⁹ Ngaya makpe, obhulu titima gba Yesu-o , ya au ndu 'ngú hana inde aní amene e bhú kuti gba omaYuda di ne bhú Yelusalema ne djila ya. U abhelo aní me u nde agi ani li kulusi. ⁴⁰ Engú bini, Ebhe azuku aní bhú 'kpí na bata. Aní aha angu pí ani ngú napana lie pí okpála me ni uu.

⁴¹ Aní pana lie pí ndu okpála hana de. Engú bini, aní apana bha lie pí ya okpála inde li Ebhe abhú o kalanu, inde au 'ngú angoo ne djila o-o. Pita aní azuku lie, ya azu 'he, ya atsia andji di ehe bhe nandji mandji ne uo bhú dabili bini.

⁴² Abhomu-o, aní atsia atima ya me ya nu ne kpokpo Bádha Ngali pí okpála. Aní atima ya me ya apa pí okpála me, a ko kpála inde li Ebhe a'o e ngú nakodho 'ngú gba okpála inde uu di ne okpála bhende amu-o. ⁴³ Ndu opolofeta hana akpokpo 'ngú gba ani-o. U akpokpo me kpála ne kpála inde abhuka Yesu-o, Ebhe a'é siti 'ngú gba ani-e ka Yesu.»

Gandji okpála asia Bu Bhobua

⁴⁴ Bha li nedhinga li Piele adu akpokpo 'ngú bhomu-o lie, Bu Bhobua atsia aké pí ndu okpála

hana inde adu adje ani-o. ⁴⁵ OmaYuda koko inde abhuka Yesu-o, ago bhú dabili bini ne Piele. U angamba naali, anga u au me Ebhe atuko di Bu Bhobua pí ogandji okpála. ⁴⁶ Padhá de, anga u adu adje uo ngagama 'ngú bhú odikongu koko. U adu adhөгө Ebhe maka ani nde lie ngbéngbé-o. Abhomu-o, Piele atsia apa me: ⁴⁷ «Mbia inde-e, li okpála inde asia di Bu Bhobua lie maka ní-e, kpála bini ti da nayoko me u abátisa uo ne engu di?» ⁴⁸ Aní aha líli me u batisa uo ne 'li Yesu Kilisito. Abhomu-o, u atsia ayo ka ani me ani du nga mbo ne o ngubula mbo 'kpí bedi.

11

Piele akpokpo maka li ogandji okpála asia Bu Bhobua lie ko

¹ Obhulu titima gba Yesu , di ne omabhuka inde bhú ndu doto na Yudaya-a, adje me ogandji okpála asia di eli gba Ebhe , u atsia abhuka Yesu Kilisito . ² Li Piele agie lie lie bhú gudhu na Yelusalema-a, omaYuda inde abhuka* aholo namene kpekebhe ne ani. ³ U adu apa me: «Lele pi ngamu kpála inde ali gandja mo oli lie bhú 'ti gba okpála inde i li gandja de-e, mo otsia azu belegu di 'he ne uo bhú dabili bini-e?†»

⁴ Abhomu-o, Piele atsia aholo akpokpo kúkú pi uo nayie li lilita. Aní pi uo me: ⁵ «Ngama-a, ma adu bhú gudhu na Djope. Nedhinga ma adu

* **11:2** 11:2 Okpála koko na imbilangu adu nabhundja me té omaYuda bedi adu apa me a ayo me ogandji okpála li bhú gandja ngú nakolo omakilisito. † **11:3** 11:3 Líli gba omaYuda ziba nani de me u du bhú dabili bini ne ogandji okpála de.

ayo Ebhe lie, ma au engú maka loto. Ehe bini ayie abhúlá maka 'ngbé 'kpá bongo . U ahoholo li odjedje badha. A ayie abhúlá, atsia akø kuto li bili ma adu lie-o. ⁶ Ma atsia 'kpí bhúbhú ne kpéke djila. Ma au onu na kuti, ma au onu na bili, ma au onu bhende ngagbele lio ne 'bu o kuto di ne odhu. ⁷ Ma atsia adje di eli bini inde apa muma me: <Piele, yie bhúlá! Bhøbhøø amba mu zu!> ⁸ Abhomu-o, ma atsia apa me: <A mo-o ade, Ngámá! Padhá de, anga ezu inde li líli gba Moidje ziba e de-e, di ne bhende na sisiti kala Ebhe li nga bhú 'bhø ma belegu de bini.> ⁹ Bhutsibhutsi na bhisi, ma adje matá eli ayie abhúlá, a apa muma me: <Ehe inde li Ebhe apa li e me a bubu-o, mo opá de me a sisiti-e de.> ¹⁰ Engú angoo-o, amene lie bhutsibhutsi bata. Pipita-a, bongo angoo-o ne ndu 'he inde bhúbhú-o hana atsia agie lie abhúlá.

¹¹ Bha li nedhinga bhomu-o, obhosi bata akolo li bili inde ya adu li e-o. Kpála bini na gudhu na Sedjale atima uo me u go bhaka ma. ¹² Abhomu-o, Bu Bhobua apa muma me: <Nu bhú dabili bini ne uo, mo opá de me a ko ogandji okpála-a de.> Ondaise ma madhia inde-e atsia anu bhú dabili bini ne ma. Ndu ya hana, ya ali bhú 'ti gba kpála inde a'i ya-o. ¹³ Abhomu-o, ani akpokpo pi ya maka li andjelu akoto li ani lie abhú 'ti gba ani-o. Andjelu angoo-o atsia apa pi ani me: <Tima okpála bhú gudhu na Djope ngú na'i Simo inde u agisila 'li e me Piele-o. ¹⁴ Ani akpókpo pi mu, ngamu di ne okpála inde bhú 'ti gba mu-o, eli gba Ebhe inde akóbho mu-o.>

¹⁵ Li nedhinga li ngama Piele, ma aholo

nagama 'ngú lie, Bu Bhobua atsia akø pí uo maka ani akø nani di lie pí ní li 'kpí na Patekote ko. ¹⁶ Abhomu-o, ma atsia abhundja eli gba Ngámá inde apa me: <Djaa abatisa nani okpála ne engu, engú bini ngayi-e, yi asía batisimo na Bu Bhobua.> ¹⁷ Ma au mbámá me Ebhe aha Bu Bhobua pi ogandji okpála bhomu-o, maka ani aha di nani koli Bu Bhobua bini bhomu-o pi ní, li nedhinga inde ní abhuka Ngámá Yesu Kilisito lie-o. La-a, ngama-a, ma ne da me ma yoko Ebhe li engú inde ani akunda namene e?» ¹⁸ Li omaYuda inde abhuka bhomu-o adje lie, u adhege Ebhe, u atsia apa me: «A na paká me Ebhe aha di nadjí bua o pi ogandji okpála, amba u sia di mukobho na duduma.»

Lita Dadjua gba Ebhe na gudhu na Atiokia bhú ndu doto na Silia

¹⁹ Pita u abhele Etieni lie, u aholo namene omabhuka sisiti. Abhomu-o, omabhuka bhelé atsia atsambala.‡ Okoko bhú ká uo agbida bhú ndu doto na Fenisia, di ne bhú kpemø na Sipele, di ne bhú gudhu na Atiokia. U atsia adu nakpokpo Bádha Ngali gba Yesu-o bha bini pi omaYuda. ²⁰ Okoko bhú ká uo adu okpála na kpemø na Sipele, di ne gudhu na Silene. U anu bhú gudhu na Atiokia. Abhomu-o ngauo, u atsia aholo nakpokpo Bádha Ngali gba Ngámá Yesu di pi ogandji okpála. ²¹ Angu gba Ngámá-a adu bhú

‡ **11:19** 11:19 Pita nabhele Etieni-e, u adu ato mbolo li omabhuka ane kalanga ndjikpa mane. Kaka-a, omabhuka bhelé atsia atsambala.

dabili bini ne uo. Kaka-a, ogandji okpála bhelé abhuka, u atsia adji lio pi Ngámá.

²² Omabhuka na Yelusalema adje engú angó-o. Abhomu-o, u atsia atima Balanabasi bhú Atiokia. ²³⁻²⁴ Balanabasi nani ne bádha kpála. Aní abedhe nani ne Bu Bhobua di ne nabhuka bedhe. Aní akolo oo, aní atsia au me Ebhe atuko bisagu pi omabhuka. Abhomu-o, aní akpi djali, aní atsia ato masi bhú ndu uo hana me u ha lio pi Ngámá ne bua o bini. Abhomu-o, okpála bhelé atsia abhuka Ngámá.

²⁵ Pipita-a, Balanabasi anu nagili Saulo bhú gudhu na Talasi. ²⁶ Li aní au aní lie, u atsia agie lio ne aní bhú gudhu na Atiokia. Ndu uo bhisi hana amene kalanga bini libhomu bhú ká omabhuka angó-o. U atsia adu asuno pi okpála bhelé. U agisila nani 'ili na omakilisito li omabhuka bhutsibhutsi na bini bhú gudhu na Atiokia.

²⁷ Li nedhinga bhomu-o, opolofeta koko ayie bhú gudhu na Yelusalema, u atsia ago bhú gudhu na Atiokia. ²⁸ Abhomu-o, suka uo bini, a adu 'li aní me Agabusi ayie bhúlá. Aní akpokpo bhú angu gba Bu Bhobua me: «Adyindi na ngbéngbé alí píla doto libhomu.» (Atsia amene lie bhú nedhinga li Kolode adu lie 'ngbé ngámá-o.) ²⁹ Omabhuka atsia apa me kpála ne kpála ha tia bhende li angu aní akólo lie, ngubula natitima me ateteke omabhuka inde bhú ndu doto na Yudaya ko. ³⁰ Abhomu-o, u amene bhadi mo-o. U atsia atima tia angó-o pi obhelesi okpála bhú Yelusalema sa 'kpa Balanabasi ne uo ne Saulo.

12

Elode abhøle Djaki, ani atsia abhike Piele bhú tikpɛ

¹ Bhú nedhinga bhomɛ-o, 'ngbé ngámá Elode Agilipa aholo amene okpála koko na Piga gba Ebhe-e sisiti. ² Ani aha lílí me u bhøle Djaki, ndai Djaá , ne mbotia. U atsia abhøle ani. ³ Li ani au lie me engú angó-o anga li omaYuda naali-e, ani atsia aha matá lílí me u holo Piele. (A adu masakpe de nedhinga na anokomia na Pasika , di ne anokomia nazɛ mapa inde li levile nde bhú e ade ko.) ⁴ Li ani aholo Piele lie, ani abhike ani bhú tikpɛ. Abhomɛ-o, ani atsia a'ó osudha badha badha bhú libi badha ngú nalila ani. Ani adu akunda nakodho 'ngú gba ani-e bhú ká djila ndu okpála hana pita anokomia na Pasika-o. ⁵ Li Piele adu lie bhú tikpɛ-o, okpála na Piga gba Ebhe-e adu ayo Ebhe ne bua o hana ngubula ani.

Piele akoto bhú tikpɛ maka ndjombe

⁶ Sukpe kala me Elode kodho 'ngú gba Piele, Piele adu ala sɔnda osudha bhisi. A adu me u nde agbigbite ani ne ogbindjili bhisi. Omulila atsia adu alila obhoti na tikpɛ-o. ⁷ Má gala kolo me-e, andjelu bini gba Ngámá-a akoto. Zi djua aha bili bhú tina 'ti angó-o hana. Andjelu-o adula Piele li kala e, ani azukɛ ani. Ani atsia apa pi ani me: «Yie bhúlá má gala!» Abhomɛ-o, ogbindjili-e abhulu bhú 'kpa ani, atsia abala kuto.

⁸ Pipita-a, andjelu-o apa pi ani me: «Gbite 'kpú ludu mɛ, mɛ toto la di maløkø gba mɛ-o bhú

'dhu mu.» Piele amene bhadi moko. Andjelu-o atsia apa matá pi ani me: «To koti gba mu-o, amba mu kpata ma.» ⁹ Piele aholo nakpata andjelu-o, ani atsia akoto bhú tina 'ti inde ani adu bhú e ko. Ani du ambila de me engú inde li andjelu ngamene e-e, a ko kukulu 'ngú-o de. Ani adu abhundja naae me a ko ehe maka loto. ¹⁰ U ane libi osudha na bini inde adu nalila tikpu-o. Pipita-a, u ane libi osudha bhende na bhisi-o. U akolo li 'ngbé bhoti na kalase inde nakoto bhú gudhu-o. Bhoti angoo a'u bha lie kala uo ne titi e, u atsia aze. U aholo 'nú, u akolo li kpadji bini. Má gala kolo me-e, andjelu-o angita li ani má pele!

¹¹ Abhomu-o, Piele ambila me engú inde amene lie-e, a ko kukulu 'ngú. Ani atsia apa me: «Mbia inde-e, ma ambila na paká me Ngámá atima andjelu gba e, ani atsia akobho ma sa 'kpa Elode di ne ndu osisiti 'ngú hana inde li omaYuda adu akunda namene e ngú ma ko.»

¹² Li imbilangu gba Piele abhulu lie lie, ani atsia anu bhú 'ti gba Malia , 'hi Dja , kpála u agisila 'li e me Maloko-o. Oo, okpála bhelé apokobho nani bhúla o, u atsia adu ayo Ebhe.

¹³ Piele abhi bhoti na ngbéngbé-o. Abhomu-o, saka kpála bini na kulu na eole adu oo, a adu 'li ani me Lode. Ani atsia ago ngú na'u bhoti-o.

¹⁴ Li ani ambila 'li Piele lie, ani tsia 'u bhoti-e de ka djali. Engú bini, ani agie lie ne holo abhú 'ti, ani atsia apa pi okpála inde adu bhú 'ti oo me: «Piele alu li bhoti akilidjo!»

¹⁵ Okpála angoo atsia agie pi ani me: «Mu ne

bhulu pele!» Engú bini, ani azi bha kekele tété me a ko kukulu 'ngú. Abhomu-o, u atsia apa pi ani me: «A ko andjelu gba ani ko.» ¹⁶ La-a, Piele adu bha nabhi bhoti-o. U a'u lie, u au ani, u atsia angamba naali. ¹⁷ Abhomu-o, Piele amene 'kpa e pi uo me u ndjili nga má bulu! Ani atsia akpokpo pi uo maka li Ngámá agbe ani lie bhú tikpu-o. Ani atsia apa matá me: «Yi kpokpo pi Djaki* di ne pi ondaise ní koko-o.» Pipita-a, ani akoto, ani atsia atapa li bili koko.

¹⁸ Li ekpi aseke lie, osudha inde adu alila tikpu-o, aholo nazi tolo naali sunda o. Abhomu-o, u atsia adu ayi lio me: «A akolo li Piele ne mangua 'ngú dho?» ¹⁹ Elode atima okpála me u gili ani. Engú bini, u u ani de. Ani ayiyi osudha inde adu alila ani-o. Abhomu-o, ani atsia aha líli me u bhili uo. Pipita-a, Elode ayie bhú Yudaya, ani atsia anu bhú gudhu na Sedjale. Oo, ani adu mbo ngubula nedhinga.

'Ngbé ngámá Elode Agilipa akpi

²⁰ La-a, Elode adu adje siti bua naali pi okpála na gudhu na Tile di ne Sidona. Okpála ango-o adje lio. Pipita-a, u atima okpála ngú nanu nagama 'ngú ne 'ngbé ngámá Elode. Okpála ango-o adje ngaiza lio ne Balasitusi, kpála natsia 'kpi li oehe gba 'ngbé ngámá Elode-o. U adu nayo ka 'ngbé ngámá guo 'ngú, anga ndu ezu gba uo-o hana adu nayie bhú doto gba ani-o.

* **12:17** 12:17 Djaki: A ko Djaki bhende ndai Yesu, nani akolo bhele kpála na Piga gba Ebhe na Yelusalema ko. Tsia bhú Kul. 15:13.

²¹ Abhomu-o, Elode a'o 'kpí ngú nagama 'ngú pí uo. Li 'kpí ango-o, aní adyi bongo na ngámá, aní atsia adu pí kiti na ngámá gba e-o. Aní atsia aholo agama 'ngú pí uo bhú ká djila ndu okpála hana. ²² Ndu okpála hana asula me: «A ngagama 'ngú inde mboye ebhe, a ko kpála-kuti de!» ²³ Li Elode adje lie mo-o, aní atsia aziba, aní dhøge Ebhe de. Bha li nedhinga bhomu-o, andjelu bini gba Ngámá-a asu aní. Padhá de, anga aní dhøge Ebhe de. Obangili aholo nazu aní, aní atsia akpi.

²⁴ Li nedhinga bhomu-o, eli gba Ebhe-e adu ayangba naali. ²⁵ Li Balanabasi ne Saulo andjia kulu gba o-o lie bhú gudhu na Yelusalema-a, u atsia agie lio bhú Atiokia bhú dabili bini ne Djaa inde u agisila 'li e me Maloko-o.

13

U alo Balanabasi ne Saulo ngú kulu

¹ Opolofeta di ne omusuno inde adu nani bhú Piga gba Ebhe na Atiokia, a ko nani Balanabasi, Simeo (inde u a'i e me Negele*), Lukiusi (kpála na Silene), Manaene inde abhele bhú dabili bini ne ngámá Elode Atipasi, di ne Saulo. ² Ekpí bini, nedhinga u adu nayo Ebhe lie di ne natse 'zu-o, Bu Bhobua atsia apa pí uo me: «Yi 'o Balanabasi ne Saulo muma kpi ngubula namene kulu inde ma a'i uo ngú e ko.» ³ Abhomu-o, pita natse 'zu di ne nayo Ebhe-e, u a'o 'kpa o pí 'ndji uo, u atsia aha kpadji pí uo me u nunu.

Balanabasi ne Saulo anu bhú Sipele

* **13:1** 13:1 Negele: U aye bhú obhuku koko me «Bibili.»

⁴ Li Bu Bhobua atima uo lie, u atsia anu bhú gudhu na Selusia. Oo, u a'u bhú 'ngbé zabu, u atsia atapa bhú Sipele. ⁵ U akolo lie bhú Salamine-e, u aholo nakpokpo eli gba Ebhe-e bhú oeti nadje líli gba omaYuda-o . Dja Maloko adu bhú dabili bini ne uo ngú nateteke uo. ⁶ U agulu kpomø-o hana, u atsia akolo bhú Pafosi. Oo, u abhaka maYuda bini, bhulu mambengu inde adu 'li e me Bale-Yesu. Ani adu apa me ni ne polofeta. ⁷ Ani adu nadu agba Selugio Polo, kpála na imbilangu, inde adu ngámá na ndu doto ango-o. Ngámá ango-o a'i Balanabasi ne Saulo, anga ani akunda nani nadje 'li Ebhe. ⁸ Engú bini, bhulu mambengu Elimasi (anga 'ili bhomu-o akunda napa bhú eli gba oGiliki moko) ayala. Ani adu agili me ni yoko ngámá na ndu doto ango-o me ani abhúka de.

⁹ Abhomu-o, Saulo, inde li 'li e adu di me Polo-o,† abedhe ne Bu Bhobua, ani atsia ani ne kpéke djila. ¹⁰ Ani atsia apa me: «Ngamu siti kpála na kali inde ngapite okpála, ndili gba Djabulu, kpála nayala ndu 'ngú na babadha hana, mu 'ó nasiti okpadji na ngbingbili gba ngámá-a di! ¹¹ Tsitsia, mbia inde-e, Ebhe asú mu. Djila mu aní. La di-e, mu ú matá zindjila de ngubula mbo oekpí.» Kolo me-e, ndindi ani djila Elimasi. Biti atsia abuku ani hana, ani adu abubudha bili de e ngbalina nagili me kpála holo 'kpa ni ngú nateteke ni. ¹² Li

† **13:9** 13:9 Polo: 'li na Saulo bhú eli gba omaYuda, bhende na Polo bhú eli gba oGiliki. U agisila nani 'ili na Polo li ani nedhinga inde ani abhu ka nakpokpo Bádha Ngali gba Yesu Kilisito lie pi oGiliki ko.

ngámá na ndu doto au engú akodho 'kpí-e lie me-e, ani atsia abhuka di ne nangamba naali ka nasuno inde u asuno e ne 'li Ngámá ko.

Polo ne Balanabasi bhú Atiokia inde abhú Pisidia

¹³ Polo di ne okpála inde adu adhuku bhú dabili bini ne ani-e, ayie bhú Pafosi ngú nanu bhú Peledje bhú ndu doto na Pamifilia. Engú bini, Djaa Maloko a'o ká uo oo, ani atsia agie lie abhú Yelusalema. ¹⁴ Ngauo-o, u akpata bha kpadji gba o-o. U ayie bhú Peledje, u atsia akolo bhú Atiokia inde bhú Pisidia ko. Bhú 'kpí naguo gba omaYuda-a , Polo ngauo ne Balanabasi ali bhú 'ti nadge líli gba Moidje , u atsia adulu kuto. ¹⁵ Pita natanga líli di ne obhuku gba opolofeta-a, ongámási na eti nadge líli-e atsia atima eli pi uo me: «Ondaise ya, i du me yi nde ne engú ngú nateteke okpála ne di-e, yi de pa!»

¹⁶ Polo ayie bhúlá, ani amene 'kpa e pi okpála, ani atsia apa me: «Ngayi okpála na Isalaele di ne yi okpála inde ngakpe Ebhe-e,‡ yi dje nga ma! ¹⁷ Ebhe gba okpála inde omaIsalaele, abhu nani onguo ogbi ní. Ani abe ndu uo bhú nedhinga u adu lie bhú bali bhú Edjipeto-o. Pipita-a, ne angu gba e-e, ani atsia agbe uo bhú doto na Edjipeto. ¹⁸ Ani akibila uo bhú mili bili ngubula kalanga masikpe de ndjikpa badha. ¹⁹ Pipita-a, ani abhili opiga mananika bhú doto na Kanana. Ani atsia aha doto gba uo-o pi onguo ogbi ní

‡ **13:16** 13:16 Okpála inde ngakpe Ebhe: A ko ogandji okpála inde abhuka Ebhe gba omaYuda ko.

²⁰ ngubula kalanga masikpe de kámá badha ne ndjikpa bhuluvue.

Pipita-a, ani aha okpála nakodho mangimbo pi uo akolo bhú nedhinga gba polofeta Samúele.

²¹ Pipita-a, u ayo me o okunda 'ngbé ngámá. Abhomu-o, Ebhe atsia aha Saulo pi uo, ndili gba Kisi, bhú piga gba Bendjamé. Ani au nani pi 'ndji uo ngubula kalanga ndjikpa badha. ²² Pita li Ebhe ayala Saulo lie, ani atsia agbe 'ngbé ngámá Davidi pi uo. Ani atsia apa li 'ngú gba ani-e me: <Ma au Davidi, ndili gba Yese. A ko kpála na babadha bhú djila ma. Ani améne ndu 'ngú hana maka ma akunda lie.> ²³ Bhú piga gba Davidi-e, Ebhe agbe pi omafalaele Mukobho Yesu maka ani apa nani lie kalanu ko. ²⁴ Kala nago ka ani-e, Djaa akpokpo Bádha Ngali pi ndu okpála na Isalaele hana. Ani adu ayo ka uo me u dji bua o, amba u sia batisimo. ²⁵ Li Djaa akolo lie li 'so kulu gba e, ani adu apa me: <Yi ngabhundja me ma ne da? Ma ne kpála inde yi ngadjeke e ade! Engú bini, yi djedje, a ngago pita ma ne kpála. Ma ne tetele kpála ade ngubula me ma gbe malokéŝ bhú 'dhu ani.>

²⁶ Ondaise ma, ngayi okpála na piga gba Abalahama di ne yi okpála inde si-e, inde ngakpe Ebhe-e, Ebhe atima nani ngali na mukobho inde-e pi ní. ²⁷ A na paká me okpála na Yelusalema di ne ongámási gba o-o mbila nani Yesu de. Bhú

† **13:22** 13:22 Tsia bhú 1 Sam. 8:5, 19, 10:21, 13:14, 16:12.

§ **13:25** 13:25 Nagbe maloké: Nani agba omaYuda-a, kulu nagbe maloké bhú 'dhu ogomago ne navulu 'dhu uo-o, a ko nani kulu ka obalise di ne okpála na padhá.

oekpí nagueo gba omaYuda bini ne bini hana-a, u adu atanga obhuku gba opolofeta. La-a, u du ambimbila de. Engú bini u akodho 'ngú gba Yesu lie me u bhelè ani-e, u amene bhomu-o engú inde li opolofeta apa e ko. ²⁸ Belegu u u nani engú bini inde u ti da nabhelè Yesu ka e lie de-e, u ayo ka Pilatè me u bhelè ani. ²⁹ Pita u amene ndu 'ngú hana maka li 'li Ebhe apa lie li 'ngú gba ani-e, u a'e ani li kulusi, u atsia anu ato ani bhú lata.

³⁰ Engú bini, Ebhe atsia azuku ani bhú ká okpála inde amu-o. ³¹ Yesu asuno lie pi okpála inde adu adholo ne ani bhú dabili bini nayie bhú Galilaya akólo bhú Yelusalema ngubula 'kpí bhelé. Mbia inde-e, okpála ango-o ngakpokpo 'ngú gba ani-e pi okpála na Isalaele ngao. ³² Ngaya makpe-e, ya ago ngú nakpokpo Bádha Ngali inde-e pi yi, Bádha Ngali inde li Ebhe apa nani kalanu me ni apa e pi onguo ogbi ní-o. ³³ Ani amene mbia inde-e pi ní ongisí gba uo-o, li kpadji nazuku Yesu bhú ká okpála inde amu, maka u aye nani lie bhú Etsi na bhisi gba omaYuda-a me: <Mu ne ndili gba ma na bhobhoko,

Ma azu mu naki ngama makpe.†>

³⁴ Ebhe apa nani me ni azúku Yesu bhú ká okpála inde amu-o mazuku, ngubula me ani akpí matá-a de. A ko engú inde ani apa nani e me:

<Ma ahá obisagu na bububu inde di na kakulu-o pi mu,

inde ma apana nani e pi Davidi ko.†>

³⁵ Kaka-a, ani apa matá li bili koko me:

† **13:33** 13:33 Tsia bhú Ets. 2:7. † **13:34** 13:34 Tsia bhú Isa. 55:3.

«M̄u 'ó de me kpála na ngbingbili gba m̄u-o zi
bhú lata-a de.†»

³⁶ Padhá de, anga Davidi bhú nedhinga gba e, amene líli gba Ebhe-e hana. Pipita-a, aní akpi, u azi aní de onguo ogbi e, aní atsia azi. ³⁷ Engú bini, kpála inde lí Ebhe azuku e, aní zí naae de. ³⁸⁻³⁹ Ondaise ma, yi mbila ndjindji me u apa pi yi me u a'e osisiti 'ngú gba yi-e ka Yesu. Yi tí da nakobho ka namene líli gba Moidje-e de. Engú bini yi akóbho bha me yi nde abhuka Yesu. ⁴⁰ 'E-e! Yi lila liyi uu me engú inde lí opolofeta apa e akólo lí yi de, engú inde me:

⁴¹ «Yi tsitsia nga, ngayi okpála na 'ngbé 'ndji, yi ngamba naali, amba yi ngingita má pele pele!

Padhá de, anga bhú nedhinga gba yi-e, ma améne engú bini inde

yi tí da naziba e de,

abana i d̄u me kpála bini nde apa nani engú
ango-o pi yi kalan̄.†»»

⁴² Lí Polo ne uo ne Balanabasi akoto lie bhú 'tí nadje líli-e, u atsia ayo ka uo me u go bhú 'kpí naguo na sidi, amba u kpokpo matá engú bini bhom̄u-o. ⁴³ U atsambala lie bhú bula-a, bhelé na omaYuda ne ogandji okpála inde ad̄u akpe Ebhe-e, akpata Polo ne uo ne Balanabasi. Abhom̄u-o, Polo ne uo ne Balanabasi, bhú nagama 'ngú gba o ne uo-o, u ato masi bhú uo me u holo lío lí bádha bhú 'bu gba Ebhe-e kpekpeke.

⁴⁴ Ekpí naguo na sidi-e, masikpe de nd̄u okpála na gud̄hu hana apo bhúla o ngú nadje 'lí Ebhe.

† **13:35** 13:35 Tsia bhú Ets. 16:10. † **13:41** 13:41 Tsia bhú Abk. 1:5.

⁴⁵ Li omaYuda au bhiti okpála ango-o lie, u asia siti bua , u atsia adu asobho Polo ka eli inde ani adu apa e ko. ⁴⁶ La-a, Polo ne uo ne Balanabasi du nani nagama 'ngú pi uo ne tsulu de. U adu apa me: «A ayo nani me ya kpo ngaiza nakpokpo eli gba Ebhe-e kalanu pi yi. Engú bini, maka yi ayala lie, yi au la di me yi ti da nasia mukobho na duduma de. Kaka mbia inde-e, ya anu ibili agba ogandji okpála. ⁴⁷ Padhá de, anga líli inde ya asia e ka Ngámá-a ngae inde:

«Ma a'o mu eke pi opiga,
ngubula me mu gapa ngali na mukobho akólo bha bini ali 'dje doto!†»

⁴⁸ Li ogandji okpála adje lie mo-o, u akpi djali, u atsia aholo nadhege 'li Ngámá. Ndu okpála hana li Ebhe alo o ngú nasia mukobho na duduma atsia abhuka.

⁴⁹ Abhomu-o, 'li Ngámá atsia adhuku bhú ndu doto ango-o libhomu. ⁵⁰ Engú bini, omaYuda ato 'ngú bhú 'ndji olisi na tia inde adu adhege Ebhe di ne obhelesi okpála na kuti-o. Abhomu-o, u aholo amene Polo ne uo ne Balanabasi sisiti, u atsia agbe uo bhú doto gba o-o. ⁵¹ Abhomu-o, okpála bhisi ango-o apulu doto na kuti gba uo inde adhedhe li 'dhu o, ngubula nasuno pi uo me u amene siti 'ngú. U atsia agbida bhú Ikoniomu. ⁵² Engú bini, pi omukpata-a, u abedhe ne djali di ne Bu Bhobua bedhe.

14

Polo ne Balanabasi bhú Ikoniomu

† 13:47 13:47 Tsia bhú Isa. 49:6.

¹ Bhú Ikoniomɔ-o, a amene bhadi lie moko. Polo ne uo ne Balanabasi ali bhú 'ti nadjé líli gba omaYuda . OmaYuda bhelé di ne okpála inde ne omaYuda ade-e, akolo omabhuka ka engú inde u agama e ko. ² Engú bini, omaYuda bhende i bhuka nani de-e, a ato bhú ogandji okpála mabhundja na sisiti pindji ondaise ní, omabhuka. ³ La-a, Polo ne uo ne Balanabasi abhue mbo nani bhú Ikoniomɔ naali. U du agama 'ngú ne tsulu de anga u adu ne nabhuka bhú Ngámá, inde adu asuno me eli inde u adu akpokpo e pindji bádha bhú 'bu gba ni-e, adu kukulu 'ngú. Padhá de, anga ani adu aha angu pi uo ngú namene okiaka 'ngú di ne ongú na ngangamba. ⁴ Kaka-a, okpála na gudhu angoo atsia agbo bhusu o: okoko adu pi omaYuda, okoko atsia adu pi obhulu titima gba Yesu .

⁵ Abhomɔ-o, omaYuda di ne ogandji okpála bhú dabili bini ne ongámási gba o-o, atsia aleke lio ngú namene Polo ne Balanabasi sisiti, ngú nabhili uo ne teme. ⁶ Li okpála bhisi bhomɔ-o ambila 'ngú angoo lie, u atsia akpe agbida bhú ogudhu na Lisitele ne Delebe, la di ne bhú okuti na ngongo, bhú ndu doto na Likaonia. ⁷ Oo di-e, u aholo akpokpo Bádha Ngali pi okpála.

Polo ne Balanabasi bhú Lisitele

⁸ Bhú Lisitele-e, kpála inde li eze adu li 'dhu e adu oo. Ani dhuku de nayie maka nani u azu ani lie-o. ⁹ Ani adu adje engú inde li Polo adu apa e ko. Polo atsia ani ne kpéke djila. Ani au me kpála angoo abhuka me ni ti da nasia makobho. ¹⁰ Abhomɔ-o, Polo atsia apa pi ani ne

kpéke 'li me: «Yie bhúlá, ɔ ngbingbili!» Kpála ango-o ayie bhúlá, aní a'ulu aké má kprii! Aní atsia aholo nadhukɔ. ¹¹ Li okpála bhelé au engú li Polo amene e lie, u asula bhú eli na kúti gba okpála na ndu doto na Likaonia me: «Oebhe akolo maka okpála-kúti, u atsia ago gba ní!» ¹² U a'o 'ili li Balanabasi me Djeusi,* u atsia a'o 'li Polo me Elemesi, anga aní adu agama 'ngú-o ngae. ¹³ Dimandé gba ebhe Djeusi, inde li 'ti ebhe gba e adu li 'bhé gúdhɔ-o, ago ne obagala na obhosibhosi li 'bhé bhoti na gúdhɔ-o. Aní aha di 'i felele, bhú dabili bini ne okpála na kúti-o, aní atsia adu akunda me ní bhéle onɔ ango-o ngú nahaha pí Balanabasi ne uo ne Polo.

¹⁴ Li obhulu titima gba Yesu adje engú bhomɔ-o lie, u asidha obongo li kúte o má tsɛ tsɛ!† U anɔ ne holo bhú ká okpála ne nasusula me: ¹⁵ «Ondaise ya, yi ngamene bhomɔ-o ní? Ya bha ne okpála maka yi. Ya ago pí yi ne Bádha Ngali me yi 'o ká oebhe inde na padhá padhá bhomɔ-o, inde li mbinimbini nde bhú o ade ko. La di me yi ha liyi pí Ebhe na mukobho inde abho ekpí, abho doto, abho 'ngbé 'ngu ne ndu 'he inde bhúbhú-o hana ko. ¹⁶ Bhú nedhinga gba okpála na kalanɔ-o, aní a'o me u kpata kpadji gba o makpe ko. ¹⁷ Engú bini, aní 'ili 'to e li napana lie ne namene babadha 'ngú pí uo de. Padhá de, anga aní ngatima pí yi ebha di ne onguwa bhú

* **14:12** 14:12 Djeusi: Bhú mabhundja gba oGiliki-e, Djeusi nani ne ngámá gba oebhe na eu. Elemesi atsia adu bhulu titima gba uo ko. † **14:14** 14:14 Li bili inde-e, nasidha bongo li kúte akunda nasuno me nayala 'ngú.

nedhinga gba o-o. Aní ngaha ezụ pí yi. Aní la di ngabedhe yi ne djali.» ¹⁸ Abana u adụ apapa lie mo-o, da me u yoko bhiti okpála adụ kpekpeke me u abhélè onụ pí o de ko.

¹⁹ Lí nedhinga bhomụ-o, omaYuda inde ayie bhú Atiokia, bhú ndu doto na Pisidia, di ne bhú Ikoniomụ, apite bhiti okpála bhomụ-o me, u tụtulụ Polo ne teme ngú nabhèlè aní. U agbe aní alí ngo gụdhụ anga u adụ abhundja me aní akpí. ²⁰ Engú bini, lí omabhuka ago asa lío lie deno aní-e, aní ayie bhúlá, aní atsia agie matá lie bhú gụdhụ. Lí ekpí aseke lie, ngauo ne Balanabasi-e, u atsia atapa bhú Delebe.

Polo ne Balanabasi agie lío bhú Atiokia bhú ndu doto na Silia

²¹ Bhú gụdhụ na Delebe, u akpokpo Bádha Ngali pí okpála, u atsia asia omụkpata bhíbhiti. Pípita-a, u agie lío bhú Lisitele, bhú Ikoniomụ di ne bhú Atiokia bhú ndu doto na Pisidia. ²² U a'e tsulụ lí bua uo, u ato masi bhú uo me u lụ kpekpeke bhú nabhuka. U adụ apa pí uo me: «A ayo me ní dje líkabhu naali ngú nali bhú kúti na Nau gba Ebhe ko.» ²³ Bhú Dadjua gba Ebhe bini ne bini hana, u adụ alo obhelesi okpála . Pita u atse ezụ ngú nayo Ebhe lie, u atsia a'o uo sa 'kpa Ngámá inde u abhuka e ko.

²⁴ U agulu Pisidia lie, u atsia akolo bhú Pamifilia. ²⁵ Pita u akpokpo 'li Ebhe lie pí okpála bhú Peledje-e, u atsia anụ bhú Atalia. ²⁶ U ayie lie oo, u alí bhú zabụ, u atsia anụ bhú Atiokia. A bhomụ-o bíli inde u a'o nani uo lie me u sia

bádha bhú 'bu gba Ebhe ngubula kulu inde u amene e mbia inde-e ko.

²⁷ U akolo lie oo, u apo bhúla okpála na Dadjua gba Ebhe-o. U atsia akpokpo pi uo ndu 'ngú hana inde li Ebhe amene e bhú dabili bini ne uo-o. U atsia akpokpo di pi uo maka li Ebhe abhulu kpadji pi ogandji okpála lie ngú nabhuka di ani Ebhe ko. ²⁸ Polo ne Balanabasi asi nani mbo ekpi bhelé bhú dabili bini ne omakpata na Atiokia.

15

Kpekebhe pindji nakodho gandja

¹ Okpála koko inde ayie bhú Yudaya-a, akolo bhú Atiokia. U adu asuno pi omabhuka me: «Yi ti da nasia mukobho de, i du me u nde kodho yi bhú gandja maka li líli gba Moidje apa lie de ko.» ² Abhomu-o, Polo ne Balanabasi agbe bhayiki, u atsia aholo amene kpekebhe ne uo naali pindji engú ango-o. U atsia adje lio me Polo ne Balanabasi, la di ne okpála koko na Atiokia, nu bhú Yelusalema, amba u kpokpo 'ngú pindji 'ngú ango-o bhú dabili bini ne obhulu titima gba Yesu di ne obhelesi okpála .

³ Abhomu-o, ndu okpála hana na Dadjua gba Ebhe atsia anu a'o uo li kpadji. U apu bhú ndu doto na Fenisia di ne bhú Samalia. U adu akpokpo maka li ogandji okpála akolo omakilisito lie ko. Ngali ango-o aha djali naali pi ndu omabhuka hana. ⁴ U akolo lie abhú Yelusalema, ndu okpála hana na Dadjua gba Ebhe, ne obhulu titima gba Yesu di ne obhelesi okpála-a, atsia asia uo. U atsia akpokpo pi uo ndu 'ngú

hana inde li Ebhe amene e bhú dabilì bini ne uo-o. ⁵ Engú bini, okpála bini bini bhú ká omuFalisai , obhende akolo omabhuka-a, ayie bhúlá, u atsia apa me: «A ayo me omabhuka inde ne omaYuda de-e, u to uo bhú gandja, amba u pa pi uo me u mene líli gba Moidje ko.»

⁶ Abhomu-o, obhulu titima gba Yesu di ne obhelesi okpála apo bhúla o ngú natsia 'kpí li engú ango-o. ⁷ Pita u amene kpekebhe lie naalie, Piele ayie bhúlá, ani atsia apa me: «Ondaise ma, yi mbila hana me Ebhe abhu nani ma bhú ká yi bhutode ngubula me ma akpokpo Bádha Ngali pi okpála inde ne omaYuda ade ko. U dje, amba u bhuka di Ngali ango-o. ⁸ La di-e, Ebhe inde ambila bua okpála-a, asuno me ni aziba uo anga ani aha Bu Bhobua pi uo maka ani aha nani di lie pi ní ko. ⁹ Ani gbo bhusu ní ne uo de. Ani avulu bua uo anga u abhuka. ¹⁰ Mbia inde-e, ka ni yi ngale Ebhe lie ne na'o tili 'ngú pí omabhuka? Engú inde li onguo ogbi ní, abana nganí makpe, ní ti nani da nabi e de-e! ¹¹ A mo-o ade! Engú bini, ní abhuka mangbo me ní akobho maka uo ka bádha bhú 'bu gba Ngámá Yesu.»

¹² Abhomu-o, ndu okpála hana andjili má bulu! U atsia adu adje engú inde li Balanabasi ne Polo adu akpokpo e ko. U adu adje okiaka 'ngú di ne ongú na ngangamba inde li Ebhe amene e bhú dabilì bini ne uo bhú ká ogandji okpála ko. ¹³ U andjia nagama 'ngú lie, Djaki atsia apa me: «Ondaise ma, yi dje nga ma! ¹⁴ Simo akpokpo maka li Ebhe amene nani lie nayie li lilita pi okpála inde naao ne omaYuda ade-e, maka ani

alo piga bini lie bhú ká uo ngú nakolo piga gba e-o.† 15 La di-e, engú inde li opolofeta apa e aviti bini ne di, anga u aye bhú Bhuku gba Ebhe-e me: 16 <Pita bhobhomu-o, ma agó matá, Ngámá apa moko,

ngú nayiki eti gba Davidi inde atuko-o.

Ma aléke obili bhende asisiti-e,
ma atsia líli ngbingbili.

17 Ndu okpála koko hana agíli ma, Ngámá,
bhú dabili bini ne ndu okpála hana inde nani
ma alo o-o.

18 A bhomu-o eli inde li Ngámá apa nani e ko.
Ngaani inde i ngamene engú inde ani apa
nani e didili-o.†>»

19 Djaki atsia apa matá me: «Kaka-a, ma abhundja me, a ayo nani kpadji pi ogandji okpála inde ngabhuka Ebhe-e de. 20 Engú bini, ní ye mangbo balua pi uo amba ní yo ka uo me, u 'o nazu so 'nu inde u abhøø e pi oebhe na padhá padhá-a ma'o. U 'o nakunda olisi di ne obhosi ngangá ma'o. U 'o di nazu so 'nu inde akpi ne ngute bhú e hana, amba u 'o di nazu ngute ma'o.†

21 Padhá de, anga nani bhutode, bhú ogudhu bini ne bini hana, okpála ngasuno líli gba Moidje. U la di ngatatanga bhú oti nadjie líli-e ndu 'kpí naguo hana.»

Balua pi omabhuka inde naao ne omaYuda ade

22 Abhomu-o, obhulu titima gba Yesu ne obhesi okpála, bhú dabili bini ne ndu okpála na

† 15:14 15:14 Tsia bhú Kul. 10:34-48. † 15:18 15:16-18 Tsia bhú Ams. 9:11-12. † 15:20 15:20 Tsia bhú Eki. 34:15-16; di ne bhú Lev. 18:6-20, 17:10-14.

Dadjua gba Ebhe hana, atsia aziba me u gbe okpála koko bhú ká o. U tima uo bhú Atiokia bhú dabili bini ne Polo ne Balanabasi. U atsia alo Djude inde u a'i e me Balasabasi, di ne Sila, okpála bhisi inde li ndu okpála koko hana adu amanga o ko. ²³ Balua u atima uo ne e, a ngae inde:

«Obhulu titima gba Yesu di ne obhelesi okpála na Dadjua gba Ebhe, ondaise yi-e, u apa me o yi ondaise o inde naao ne omaYuda ade inde ngadulu bhú Atiokia, bhú Silia di ne bhú Silisia mayi. ²⁴ Ya adje me okpála koko inde ayie bhú ká ya ei-e, ato kpekebhe bhú ká yi ne 'li o, u atsia angbingi bua yi. Engú bini, yi mbila ndjindji me ya tima uo ngaya de. ²⁵ Kaka-a, ya adje liya ne bua bini me ya alo okpála, amba ya tima uo gba yi oo. U anú bhú dabili bini ne ondaise ya na mukunda, Balanabasi ne Polo. ²⁶ Okpála inde aha lio libhomu ngubula kulu gba Ngámá gba ní Yesu Kilisito ko.

²⁷ Kaka-a, ya atima pi yi Djude ne uo ne Sila, u akpókpo ndu 'ngú hana inde ya aye e si-e pi yi ndjindji. ²⁸ Padhá de, anga Bu Bhobua di ne ya makpe-e, ya abhundja me, a ayo na'o tili 'ngú koko pí yi de, bha bini bhende a ayo me yi mene e ko: ²⁹ yi azú so 'nu inde u abhelo e pi oebhe na eu-o de. Yi azú ngute de. Yi azú so 'nu inde akpi ne ngute bhú e hana-a de. Yi adú akunda olisi di ne obhosi ngangá de. I du me yi nde alila liyi makpe ne ndu 'ngú bhomu-o hana-a, bhobhomu-o dú ndjindji. Yi

du ndjindji.»

³⁰ Abhomu-o, u aha kpadji pi uo, u atsia agbida bhú Atiokia. Oo, u apo bhúla omabhuka hana, u atsia aha balua pi uo. ³¹ U atanga balua-o. Ndu uo hana akpi djali naali ka masi inde li balua ango-o ato e bhú uo ko. ³² La-a, li Yuda ne Sila adu di lie ngao makpe opolofeta-a, u agama 'ngú pi omabhuka ngengele ngubula nato masi bhú uo, di ne naha angu pi uo. ³³ Mbo pita 'kpí bedi-e, omabhuka atsia a'o uo me u gie lio ne guo 'ngú agba okpála inde atima uo ko. [³⁴ *] ³⁵ Abhomu-o, Polo ne Balanabasi atigala bhú Atiokia. U atsia adu asuno di ne nakpokpo Bádha Ngali gba Ngámá-a bhú dabili bini, di ne okpála koko bhelé.

Polo ne Balanabasi agbo bhusu o

³⁶ Pita mbo 'kpí masudha, Polo apa pi Balanabasi me: «Ní gie liní bhú ndu okuti hana inde ní akpokpo nako eli gba Ngámá-a bhú e-o, amba ní mbila maka li omabhuka nde lie oo ko.» ³⁷ Balanabasi adu akunda me o nu bhú dabili bini ne Djaa inde u agisila 'li e me Maloko-o. ³⁸ Engú bini, Polo tsia ziba naha ani de, anga ani a'o nani ká uo bhú Pamifilia. Ani tsia du di matá namene kulu ne uo bhú dabili bini de. ³⁹ U amene kpekebhø sunda o naali. Kaka-a, u atsia agbogbo bhusu o. Abhomu-o, Balanabasi aha Maloko, u a'u bhú zabu, u atsia agbida bhú Sipele. ⁴⁰ Pita li omabhuka ayo lie me Polo sia bádha bhú 'bu gba Ebhe-e , ani aha Sila, ani

* **15:34** 15:34 Lukuluku inde-e, a bhú obhuku koko na didili u aye e bhú eli na giliki ade. [Engú bini, Sila atsia au ndjindji me ni tigala ne ani oo.]

atsia atapa. ⁴¹ Ani apu bhú ndu doto na Silia di ne Silisia. Ani atsia adu nateteke omabhuka na oDadjua gba Ebhe-o.

16

Timoté anu bhú dabilì bini ne Polo di ne Sila

¹ Abhomu-o, Polo akolo bhú Delebe, pipita-a, bhú Lisitele. Mukpata bini adu nani oo, a adu 'li ani me Timoté. 'Hi ani adu ne maYuda inde abhuka Ebhe. Engú bini, 'dyi ani nani naae ne Giliki. ² Omabhuka na Lisitele di ne Ikoniomu adu apa 'ngú gba ani-e ndjindji naali. ³ Polo adu akunda me ni ha ani ngú nadhuku bhú dabilì bini ne ani. Ani aha ani, ani atsia ato ani bhú gandja. Ani amene nani mo-o ka omaYuda inde adu oo, anga ndu okpála hana adu ambila ndjindji me 'dyi Timoté nani ne Giliki.* ⁴ Bhú ndu ogudhu inde u adu apu bhú e hana-a, u adu akpokpo pi omabhuka líli inde li obhulu titima gba Yesu di ne obhelesi okpála na Yelusalema aha e-o. U atsia adu ayo ka uo me u mene líli ango-o ko. ⁵ ODadjua gba Ebhe-e adu akolo kpekpeke bhú nabhuka . Alo gba omabhuka atsia adu abe ndu e ndu 'kpí hana.

Polo apu bhú Adjia

⁶ La li Bu Bhobua ayoko uo lie me u akpokpo 'ngú gba Ebhe bhú ndu doto na Adjia de-e, u atsia apu bhú ndu doto na Filidjia di ne Galatia. ⁷ U akolo lie de ndu doto na Misia-a, u adu ale nanu bhú Bitinia. Engú bini, Bua gba Yesu atsia ayoko

* **16:3** 16:3 'Dyi Timoté nani ne maYuda ade. Kaka-a, Timoté li nga nani bhú gandja kalanu de.

uo. ⁸ Abhomu-o, u agulu Misia, u atsia akə bhú gúdhú na Tuluasi. ⁹ A akolo lie sukpe-e, Polo au engú maka loto: kpála bini na Makedonia alu kala ani. Ani atsia adu akikiliki lie pi ani me: «Kodho 'ngbé 'ngu-o, nu bhú Makedonia, amba mu teteke ya!» ¹⁰ Pita engú inde li Polo au e, ya agili bha kolo má gala me ya anu bhú Makedonia. Padhá de, anga ya ambila na paká me Ebhe a'i ya ngú nakpokpo Bádha Ngali pi okpála na kuti ang-o.

U akolo bhú gúdhú na Filipoi

¹¹ Ya a'u bhú zabu bhú Tuluasi, ya anu ngbingbili bhú Samutalasi. Li ekpí aseke lie, ya atsia anu bhú Neapolisi. ¹² Ya ayie lie oo, ya atsia akolo bhú gúdhú na Filipoi, gina kuti na ndu doto na Makedonia inde adu sa oLoma-o. Ya amene mbo ekpí bhelé bhú gúdhú ang-o. ¹³ Bhú 'kpí nago gba omaYuda-a, ya akoto bhú gúdhú ngú nanu ali ngo 'ngu. Padhá de, anga ya adu abhundja me dabili gba omaYuda ngú nayo Ebhe oo. Ya adulu kuto, ya atsia akpokpo 'ngú pi olisi inde apəkəbhə bhúla o oo. ¹⁴ A adu 'li saka olisi ang-o me Lidia. Ani ayie nani bhú gúdhú na Tiatile. Ani adu nani atsindji ombembe obongo na mase naali. Ani adu nani adhəgə Ebhe. Maka ani adu adje ya lie, Ngámá atsia abhulu bua ani ngú nabhuka engú inde li Polo adu apa e-o. ¹⁵ Abhomu-o, ani atsia asia batisimo bhú dabili bini ne piga gba e-o. Pipita-a, ani atsia ayo ka ya me: «I du me yi nde au me ma abhuka Ebhe kukulu-o, yi de go du gba ma.» Ani atsia agbite ya ne kpéke ngú naziziba.

U aholo Polo ne Sila

¹⁶ Ekpí bini, ya adu anu lie li bili nayo Ebhe-e, ndili na eelə bini na kulu ago abhaka ya. Bua na madhoko adu bhú ani. Ani atsia adu asia tia pi omakulasi e naali. ¹⁷ Ngaya ne Polo-o, ani aholo akpata ya. Ani atsia adu asusula me: «Okpála inde-e, a ko okpála na kulu gba Ebhe Apí 'Kpí! U ngasuno pi yi kpadji na mukobho.» ¹⁸ Ani amene engú angoo ngubula ekpí bhelé. Li engú angoo andala Polo lie naali-e, ani adji lie, ani atsia apa pi bua angoo me: «Ne 'li Yesu Kilisito, ma apa pi mu me: koto bhú ani!» Abhomu-o, bua na madhoko angoo atsia akoto bha kolo bhú ani bhú nedhinga angoo. ¹⁹ Li omakulasi ani au lie me o sía matá tia ka ani de-e, u aholo Polo ne Sila, u atsia agbele uo bhú mbadhasu kala okpála nakodho 'ngú. ²⁰ U atsia anu ne uo kala ongámási na Loma, do uo de-e: «Okpála inde-e, a ko omaYuda. U ngato mbedhembedhe bhú gudhu gba ya-o. ²¹ U ngasuno ongú. La-a, líli gba ní okpála na Loma ziba nasia ongú angoo ne namemene de.»

²² Abhomu-o, ndu okpála hana atsia abi di 'gú ne uo. Ongámási aha líli me u pandja bongo li kute uo, amba u bhi uo ne fimbo. ²³ Pita u abhi uo lie ne fimbo naali-e, u atsia abhike uo bhú tikpu. U atsia aha líli pi mulila na tikpu-o me ani lila uo ndjindji. ²⁴ Li mulila asia líli angoo lie, ani ato uo bhú tina tikpu bhe na tutu-o. Ani atsia atoto 'dhu uo bhú kpokpe.

Polo ne Sila aze bhú tikpu

²⁵ Masikpe de tutu sukpe-e, Polo ne Sila adu ayo Ebhe di ne nadhøøe ani bhú etsi. Okpála koko na tikpu-o adu adje uo. ²⁶ Má gala kolo me-e, doto adyiki ne adjigidjo na ngbéngbé má djigi djigi, masikpe de me tikpu-o tuko kuto! Ndu obhoti na tikpu-o hana akolo abhubhulu lie. Ogbindjili inde u agbigbite ndu okpála hana na tikpu-o ne e-e, atsia abhubhulu di lie.

²⁷ Li mulila agbungbua lie lie tila-a, ani au me ndu obhoti-e hana baba. Abhomu-o, ani agbe mbotia me ni ngabhøøe lini ne di, anga ani adu abhundja me ndu okpála na tikpu-o hana akpekpe. ²⁸ Engú bini, Polo atsia asula pi ani kpekpeke me: «Mo oméne limu sisiti de, anga ndu ya hana bha si!» ²⁹ Abhomu-o, mulila-a ayo eke, ani ali kolo má gala abhú 'ti me ani nde ngaguku ka tsulu má kpi kpi kpi! Ani atsia ati bhú li 'dhu Polo ne Sila. ³⁰ Pipita-a, ani apandja uo kilidjo. Ani atsia ayi uo me: «Odyi ma, a ayo me ma mene pi ngubula me ma kobho?»

³¹ U atsia agie pi ani me: «Bhuka Ngámá Yesu, amba mu kobho, ngamu di ne piga gba mu-o hana.» ³² Abhomu-o, u atsia akpokpo eli gba Ngámá Ebhe-e pi ani, di ne pi ndu okpála hana inde adu bhú 'ti gba ani-o. ³³ Bha sukpe bhomu-o, mulila na tikpu-o abha uo, ani atsia avulu oeka gba uo-o. Pipita-a, ani asia bha kolo batisimo má gala, bhú dabili bini ne okpála gba e hana. ³⁴ Pipita-a, ani anu ne uo agba e. Ani atsia aha ezu pi uo. Ngaani ne piga gba e-e, u akpi djali naali, anga u abhuka Ebhe.

³⁵ Li ekpi aseke lie, ongámási gba okpála na

Loma atima okpála me u nɛ pa pi mɔlila na tikpɛ-o me: «Pandja okpála bhomɛ-o bhú tikpɛ-o, amba mɛ 'o uo, u gbida.» ³⁶ Abhomɛ-o, mɔlila atsia ago apa pi Polo me: «Ongámási atima eli me ma apandja yi bhú tikpɛ papandja. Yi zeze, amba yi nɛ ne guo 'ngú .» ³⁷ Do Polo pi okpála ango-o me: «Ya ne okpála na Loma! U aha lílí me u bhi ya bhú ká djila okpála me u nde kpokpo 'ngú lí 'ngú gba ya-a de. U abhike ya bhú tikpɛ. La mbia inde-e, u ngakunda napandja ya bhú pepe? Belegɛ de bini, u go gbege bha ya ngao makpe!» ³⁸ Okpála ango-o atsia anɛ apa eli ango-o pi ongámási na Loma. Lí ongámási na Loma adje lie me Polo ne Sila a ko okpála na Loma-a, u atsia adje tsulɛ. ³⁹ Abhomɛ-o, ongámási ago nakikiliki lío pi uo. U atsia ayo ka uo me u yie bhú kuti ango-o yiyie. ⁴⁰ Lí Polo ne Sila aze lie bhú tikpɛ-o, u atsia anɛ agba Lidia. Pita u au omabhuka lie, u ato masi bhú uo, u atsia agbida.

17

Polo ne Sila bhú gɔdɔɔ na Tesalonike

¹ Lí Polo ne Sila agulu gɔdɔɔ na Afipolisi ne Apolonia lie, u atsia akolo bhú gɔdɔɔ na Tesalonike. A bhomɛ-o bilí inde lí omaYuda adɛ ne etí nadje lílí gba Moidje lie ko. ² Polo amene maka aní amemene lie-o. Aní adɛ anɛ abhaka uo bhú 'tí nadje lílí-e ngɔbula poso bata bhú 'kpí nago gba omaYuda-o . Aní atsia adɛ amene kpekebhe ne uo pɔndji Bhuku gba Ebhe-o . ³ Aní adɛ abhulu tata pi uo mbámábá, di ne nasuno pi uo me bhuku apa me a ayo me Kilisito

zu likabhu, amba ani zuku. Ani adu apa pi uo me: «Yesu inde ma ngakpokpo 'ngú gba e pi yi-e, a ko Kilisito ngae.» ⁴ Okpála koko bhú ká uo abhuka, u atsia akpata Polo ne Sila. OGiliki bhelé, inde adu adhøgø Ebhe-e, amene bhadi moko bhú dabili bini ne bhiti olisi inde adu ne tia naali-o.

⁵ Engú bini, omaYuda abi 'gú naali. U abha okpála koko na sisiti inde adu adjakadha li okpadji, u apøkøbhø bhúla uo. U agbe tolo bhú ká okpála, u atsia ato mbedhembedhe bhú 'ndji okpála bhú gudhu. U anu nagili Polo ne Sila bhú 'ti gba Djasone ngubula me o gbe uo kala okpála na kuti bhomu-o. ⁶ U bhaka la uo lie de-e, u aha Djasone di ne omabhuka koko, u atsia anu ne uo kala ongámási. U aholo asusula me: «Okpála inde angbingi 'ndji okpála píla doto libhomu. Mbia inde-e, u akolo ibili si! ⁷ Djasone asia uo agba e! Ndu uo hana ngayala namene líli gba 'ngbé ngámá Kaisala . U ngapa me ngámá koko uu! A 'li ani me Yesu.» ⁸ Li bhiti okpála di ne ongámási na kuti ango-o adje eli ango-o lie, bua uo atsia ake. ⁹ Pita li Djasone di ne okpála koko akakala lio lie ka uo, u atsia atse 'kpa li uo.

Polo ne Sila bhú gudhu na Beloya

¹⁰ A akolo lie sukpe-e, omabhuka anu a'o bha kolo Polo ne Sila bhú Beloya má gala! U akolo lie oo, u atsia ali bhú 'ti nadje líli gba Moidje-o. ¹¹ Okpála ango-o adu ne bádha bua nane okpála na Tesalonike. U asia eli gba Ebhe-e ne gugumu naali. Ndu 'kpí hana, u adu atsia 'kpí bhú Bhuku gba Ebhe ngú nambila me ongú ango-o, a ko 'ngú

na paká. ¹² Abhomu-o, okpála bhelé bhú ká uo atsia abhuka. Olisi na Giliki inde adu ne tia naali-e abhuka. Bhati obhosi inde adu oo atsia abhuka di. ¹³ Engú bini, li omaYuda na Tesalonike adje lie me Polo ngakpokpo eli gba Ebhe-e di bhú Beloya-a, u atsia ago di oo. U ato mbedhembedhe bhú ká okpála bhomu-o, u atsia angbingi di 'ndji uo. ¹⁴ Abhomu-o, omabhuka anu bha kolo a'o Polo me ani nu ali ngo 'ngbé 'ngu. Engú bini, Sila ne Timoté atsia atigala naao abhú Beloya. ¹⁵ Obhende anu na'o Polo-o, u akolo ne ani bhú gudhu na Atene. Pipita-a, u adu agie lio lie, Polo atsia atima eli me Sila ne Timoté kpata ni má gala! U atsia agbida.

Polo akolo bhú gudhu na Atene

¹⁶ Bhú nedhinga li Polo adu adjeke Sila ne Timoté lie bhú Atene-e, ani au me gudhu angoo abedhe ne oebhe na eu bedhe. Kaka-a, bua ani adu ne likabhu naali. ¹⁷ Abhomu-o, ani adu amene kpekebhe ne omaYuda di ne okpála koko inde adu adhoghe Ebhe bhú 'ti nadge líli gba Moidje-o. Ndu 'kpí hana, ani adu amene bhadi moko ne okpála inde ani adu akhe lie ne o oo. ¹⁸ Okpála na imbilangu koko oEpikulo* ne oSatua† adu di agama 'ngú ne ani. Okoko adu ayi me: «Bhulu agelø inde-e ngapa-e pi?» Li okpála

* **17:18** 17:18 OEpikulo: A ko nani omukpata gba Giliki bini inde adu 'li e me Epikulo. Ani adu asuno me engú na ngbéngbé bhú mukobho gba kpála, a ko nadu ndjindji, nadu ne likabhu de.

† **17:18** 17:18 OSatua: A ko nani omukpata gba Giliki bini inde adu 'li e me Djeno. U adu nani nau engú nadu bhú djali bhú djila o padhá. U atsia adu bha bini akpata 'ngú pindji imbilangu inde bhú kpála.

koko adje Polo ngakpokpo 'ngú pindji Yesu di ne nazuku ka ani-e lie, u atsia adu apa me: «A amana mugito me ani ngasuno bhomu-o oebhe na gandji gandji.»

¹⁹ Abhomu-o, u aholo ani, u anu ne ani kala okpala inde adu atsia 'kpí li 'ngú na gudhu na Atene-o. U adu a'i uo me Aliopadje.‡ U atsia apa pi ani me: «Ya ti da nambila engú na mbia inde mu ngasuno e uu? ²⁰ Ya akunda nambila tata-o. Padhá de, anga mu ngandala 'dje ya ne ndu 'ngú na gandji gandji.» ²¹ (Ndu okpala na Atene hana di ne okpala na gandji gandji inde adu nadu oo, adu abhelo nedhinga gba o-o bha li nakpokpo 'ngú di ne nadje engú na mbia.)

²² Abhomu-o, Polo ayie bhúla tu Aliopadje-o, ani atsia apa me: «Ngayi okpala na Atene, ma au me yi kpekpeke li engú gba oebhe ane ndu 'ngú hana. ²³ Padhá de, anga ma adu aduku lie bhú gudhu gba yi-e, ma atsia okulu oebhe gba yi-o. Ma au belegu bili bini inde u ngatsulu enu lie pi Ebhe. U aye tété me: <PI EBHE INDE YA AMBILA E DE.> A moko, ma ago asuno pi yi ebhe inde yi ngadhogo e me yi nde mbila e de ko. ²⁴ Ebhe inde abho doto di ne ndu 'he inde bhúbhú-o hana-a, a ko Ngámá na abhúla di ne Ngámá na doto. Ani dudu bhú oeti inde li okpala ayiki e ne 'kpa o-o de. ²⁵ Ani ne gumu ade me okpala mene ehe pi ni-e de, anga ani ne gumu 'he bini ade. Ani ngaha mukobho, ewo di ne ndu 'he koko pi ndu okpala hana ngae. ²⁶ Ani abho kpala bini inde li

‡ 17:19 17:19 Aliopadje: A adu nga nani kalanu 'li eta inde li okpala ang-o adu apekebhe bhúla o pí e-o.

ndu opiga hana aze bhú e-e ngae. Ani atsia abu uo pála doto libhomu. Ani agbo bhusu kalanga ne gbokokpi. Ani atsia akokodho okozie li bili inde ayo me u sili kuti lie ko.

²⁷ Ebhe amene mo-o ngubula me okpála gili ni amba u le nau ni, i du me u nde ti da nau ni uu ko. A na paká me Ebhe de ní bini ne bini tsutsu ade. ²⁸ Padhá de, anga ani ngaha mukobho ne angu ngú namene ehe di ne maka ní nde lie pi ní ngae. La di maka li okpála koko na etsi gba yi-e apa lie me: «Ní di ne ongisi gba ani.» ²⁹ La-a, ka ní nde lie ne ongisi gba Ebhe-e, a ayo nabhundja de me Ebhe maka ebhe na padhá u abho e li olo, li aladja di ne teme-e de. A ayo la di nabhundja de me Ebhe maka ebhe inde akoto li kulu di ne mabhundja gba kpála-a de.

³⁰ Nani-e, okpála du ambila Ebhe de. Ani tsia matá 'kpí li nedhinga ang-o de. Engú bini mbia inde-e, ani nga'i ndu okpála hana ne ndu bili hana me u dji bua o. ³¹ Padhá de, anga ani a'o ekpí bini inde ani akódho 'ngú gba okpála na doto libhomu lie ngbingbili ko. Ani abhu kpála bini inde akódho 'ngú ang-o. Ani asuno engú ang-o pi ndu okpála hana li nedhinga inde ani azuku kpála ang-o lie ko!»

³² U adje Polo lie apa me okpála inde amu-o azúku mazuku-o, u aholo amu ani. Okoko atsia apa me: «Ya adjé nga matá mu pindji 'ngú ang-o li 'kpí koko.» ³³ Abhomu-o, Polo atsia a'o ká uo. ³⁴ Abana mo-o, okpála koko aziba ani, u atsia abhuka. Bhú ká uo adu nani Denisi, saka

okpála na Aliopadje, ne ọlọ bini inde adu 'li e me Damalisi di ne okpála koko.

18

Polo akpo lita Dadjua na gudhu na Kolito

¹ Pipita-a, Polo ayie bhú gudhu na Atene, ani atsia atapa bhú gudhu na Kolito. ² Oo, ani abhaka maYuda bini, a adu 'li ani me Akuila, kpála na ndu doto na Pote. Ngaani-e, ani ayie nani bhú Itali, bhú dabili bini ne wala e Pilisila, anga 'ngbé ngámá Kolode aha nani líli me ndu omaYuda hana ze bhú Loma maze. Abhomu-o, Polo atsia anu nabhaka uo. ³ Ani adu la lie amene ngua kulu bini ne uo (u adu abho eti inde u a'i e me 'ti ngbangbali), ani adu nadu agba uo, u atsia adu amene kulu bhú dabili bini. ⁴ Polo adu nasuno eli gba Ebhe-e bhú ndu 'kpí naguo gba omaYuda hana bhú eti nadje líli gba Moidje-o . Ani atsia adu di namene ne kpeke me omaYuda di ne oGiliki ziba 'li ni.

⁵ Li Sila ne uo ne Timoté ayie lie bhú ndu doto na Makedonia, u atsia akolo bhú gudhu na Kolito. Polo aha nedhinga gba e hana ngu nakpokpo Bádha Ngali gba Ebhe-e pi okpála. Ani adu asuno pi omaYuda me Yesu ne Masiya . ⁶ Engu bini, omaYuda adu ayayala, u atsia adu di nasobho Ebhe. Abhomu-o, ani apulu doto li bongo gba e, ani atsia apa pi uo me: «A ayo me ngute gba yi-e, tuko pí 'ndji yi. A ko matá naama 'ngu de. Nayie pi mbia inde-e, ma anu ibili agba ogandji okpála .» ⁷ Abhomu-o, Polo ayie oo, ani atsia anu agba kpála bini inde li 'li e adu me Tito

Djusitusi. Kpála ango-o adu kpála nadhøge Ebhe. Kutì gba anì-e adu de eti nadje lílì gba Moidje-o. ⁸ Kilisipisi, ngámá na eti nadje lílì-e, abhuka Ebhe di ne piga gba e libhomu. Okpála bhelé na gũdhũ na Kolito adje Polo lie, u abhuka, u atsia asia di batisimo.

⁹ Ekpí bini sukpe-e, Ebhe apa pi Polo bhú ehe maka loto me: «Mo odjé tsulũ de. Engú bini, dũ bha nagama 'ngú, mo ondjìli má bulu de.

¹⁰ Padhá de, anga ma bhú dabilì bini ne mũ. Kpála bini bú 'kpa e li mũ ngú namene mũ sisiti de, anga okpála gba ma bhú gũdhũ inde-e bhelé.»

¹¹ Abhomũ-o, Polo asi bhú gũdhũ na Kolito oo kalanga bini ne epe madhia. Anì adu asuno eli gba Ebhe-e pi ndu okpála hana.

OmaYuda asungula Polo pi ongámási

¹² Bhú nedhinga inde li okpála na Loma a'o Galio lie ngámá na ndu doto na Akai-e, omaYuda adje lio bhú dabilì bini me o mene Polo sisiti. Abhomũ-o, u atsia agbe anì kala okpála nakodho 'ngú. ¹³ Do uo de me: «Kpála inde ngagilì nagbele okpála ngú nadhøge Ebhe li kpadji bhende li lílì ziba e de.»

¹⁴ Li Polo di me gama 'ngú lie, Galio atsia apa pi omaYuda me: «Ngayi omaYuda-a, i dú igini me kpála inde-e bhéle kpála, anì méne di engú na sisiti naali-e, ma de adje yi ndjindji. ¹⁵ La-a, i nde lie me yi nde ngamene kpekebhe pindji oeli ne o'ili di ne lílì gba yi makpe-e, atsia bha-a yi! Ma akũnda naama nakodho 'ngú li ngua 'ngú bhomũ-o

de!» ¹⁶ Anì atsambala uo li bìli nakodho 'ngú-o. ¹⁷ Abhomu-o, ndu uo hana aholo Sosetene, ngámá na eti nadje líli gba Moidje, u atsia aholo nabhi anì bhú mbadhasu li bìli nakodho 'ngú-o. Engú bini, Galio adu bha au 'ngú ango-o bhú djila e padhá.

Polo agie lie bhú gudhu na Atiokia

¹⁸ Polo adu matá mbo ngengele bhú gudhu na Kolito. Pipita-a, anì a'o ká omabhuka , anì a'u bhú zabu, anì atsia atapa bhú ndu doto na Silia bhú dabili bini ne Pilisila di ne Akuila. Kala me anì 'u bhú zabu-o, u aka ngaiza 'ndji anì bhú gudhu na Sekele, anga anì asili nani ndjinga me ni aha lini pi Ebhe. ¹⁹ U akolo bhú gudhu na Efeso. Oo, Polo a'o ká Pilisila ne Akuila. Anì ali bhú 'ti nadje líli gba Moidje, anì atsia adu akpokpo 'ngú ne omaYuda.

²⁰ La-a, u ayo ka anì lie me o du nga matá mbo ne anì ngengele-e, anì atsia ayala. ²¹ Engú bini, nedhinga inde anì adu a'e ne enú lie, anì atsia apa me: «I du me Ebhe nde akunda-a, ma agó matá agba yi mago.» Anì a'u bhú zabu. Anì ayie bhú gudhu na Efeso, ²² anì atsia atapa bhú gudhu na Sedjale. Oo, anì a'u bhú gudhu na Yelusalema ngú nabhana lie pi omabhuka. Pipita-a, anì atsia aké bhú gudhu na Atiokia. ²³ Anì abhue oo mbo ekpí bedi, abhomu-o, anì atsia atapa. Anì agulu ndu doto na Galatia ne ndu doto na Filidjia me anì nde ngato masi bhú omabhuka.

Apolosi anu bhú gudhu na Efeso, di ne bhú gudhu na Kolito

24 MaYuda bini akolo bhú gúdhú na Efeso, a adú 'lì anì me Apolosi, kpála na gúdhú na Alekidjandìlì. Anì mbìla nani nagama 'ngú ndjindjì. Anì mbìla di nani Bhuku gba Ebhe-e ndjindjì. 25 U asuno nani kpadjì gba Ngámá pì anì ndjindjì. Anì adú ne bua na masi, anì atsia adú akpokpo di ne nasuno engú pìndjì Yesu ngbingbili. Engú bini, anì ambìla bha nani naae batisimo gba Djaa-o .

26 Abhomú-o, anì aholo nakpokpo 'ngú angoo bhú 'tì nadjè lílì gba Moidje. Anì dú ne tsulú de. Lì Pilisila ne Akuila adje engú anì apa e lie, u aha anì, u anú ne anì. U atsia asuno kpadjì gba Ebhe-e pì anì ndjindjì. 27 Pìpita-a, Apolosi adú akúnda nanú bhú ndu doto na Akai. Abhomú-o, omabhuka ato masi bhú anì, u atsia aye balú pì omabhuka na ndu doto angoo me, u sia anì ndjindjì. Anì akolo lie oo, anì ateteke okpála inde abhuka ka bádhà bhú 'bu gba Ebhe-e ndjindjì naali. 28 Padhá de, anga anì adú asuno mbámhá ne angu hana bhú ká djila ndú okpála hana me omaYuda lì ngbili kpadjì ade. Anì atsia adú apana pì uo bhú Bhuku gba Ebhe-e me Yesu ne Masiya.

19

Polo akpokpo 'ngú gba Ebhe-e bhú gúdhú na Efeso

1 Nedhinga lì Apolosi adú lie bhú gúdhú na Kolito-o, Polo agulu ndu doto na ndú ká eta na Adjia, anì atsia akolo bhú gúdhú na Efeso. Anì abhaka omukpata koko oo. 2 Anì atsia ayi uo

me: «Yi akolo omabhuka lie, yi asia Bu Bhobua uu?» U atsia agie pi ani me: «Ya adje nga engú pindji Bu Bhobua belegu de bini.» ³ Abhomu-o, Polo atsia ayi uo me: «Yi asia la mangua batisimo dho?» U agie pi ani me: «Batisimo bhende gba Djaa ko.» ⁴ Polo atsia apa pi uo me: «Djaa adu abatisa okpala inde adu aziba nadji bua o. Ani atsia adu apa pi okpala na Isalaele me: <Yi bhuka kpala inde ngago pita ma ko.> A akunda napa me Yesu.» ⁵ U adje engú bhomu-o lie, Polo atsia abatisa uo ne 'li Ngamá Yesu. ⁶ Pipita-a, ani a'o 'kpa e pi 'ndji uo, u atsia asia Bu Bhobua. U aholo agama 'ngú bhú odikongu koko di ne nakpokpo 'ngú maka opolofeta . ⁷ Ndu obhosi bhomu-o hana adu masikpe de ndjikpa ne ka bhisi.

⁸ Polo adu ali piko bhú 'ti nadge líli gba Moidje , sunda epe bata, ani du akpokpo 'ngú pindji Nau gba Ebhe-e ne tsulu de. Ani atsia adu amene ne kpéke ngubula me okpala bhuka Yesu. ⁹ Engú bini, okpala koko adu ne kpéke 'ndji. U ayala nabhuka . U atsia adu apa sisiti 'ngú li kute okpala inde adu akpata kpadji gba Yesu-o kala ndu okpala hana. Abhomu-o, Polo a'o ka uo, ani anu ne omukpata-a bhú 'ti balua gba Tulanisi. Oo, ani atsia adu asuno pi uo ndu 'kpí hana. ¹⁰ Ani amene mo-o ngubula kalanga bhisi. Abhomu-o ndu okpala hana na ndu doto na Adjia, omaYuda di ne oGiliki, atsia adje eli gba Ngamá-o.

Engú inde akolo li ongisi na obhosibhosi gba Seva

¹¹ Ebhe adu amene ongamba 'ngú na ngbengbengbe pi okpála bhú Polo. ¹² Kaka-a, okitambala di ne obongo inde atunú lie li kute Polo-o, u adu ago ne di, a'o'o li kute okpála na kuo. Abhomu-o, okpála na kuo ango-o adu akobho, osisiti bua atsia adu di aze bhú uo.

¹³ OmaYuda koko, inde adu anu li obili koko hana ngubula napandja osisiti bua bhú okpála-a, ale di napandja osisiti bua ne 'li Ngámá Yesu. U adu apa pi osisiti bua ango-o me: «Ma aha líli pi yi ne 'li Yesu, inde li Polo ngakpokpo 'ngú gba e me, yi zeze.» ¹⁴ Ongisi na obhosibhosi mananika gba Seva, suka 'ngbé dimandø bini gba omaYuda-a adu amemene moko. ¹⁵ Engú bini, siti bua-a agie pi uo me: «Ma mbila Yesu hana. Ma mbila la di hana me Polo ne da-ie. Ngayi-e, yi la naayi ne oda?»

¹⁶ Abhomu-o, kpála inde li siti bua adu bhú e, ati pi uo ne gbele, angu gba ani ane bhende gba uo-o mane. Ani amene uo sisiti naali. Kaka-a, u atsia aze bhú 'ti ango-o ndumbu di ne oeka li kute o. ¹⁷ Ndu okpála na gudhu na Efeso hana, omaYuda di ne oGiliki, adje engú ango-o. Ndu uo hana adje tsulu naali. Abhomu-o, u atsia adhøø 'li Ngámá Yesu. ¹⁸ Bhiti okpála inde abhuka adu ago ambamba ta osisiti 'ngú inde u amene e ko. ¹⁹ Bhelé bhú ká uo adu obhulu mambengu. U ago ne obhuku gba o-o, u atsia atsulu kala ndu okpála hana. U ako masemase-e lie, u atsia au me a akoto olí falanga kutu ndjikpa bhuluvue. ²⁰ Abhomu-o, ka angu gba Ngámá-a, eli-e adu ayangba, atsia adu akolo kpekpeke.

Tolo akoto bhú ká okpála na gúdhú na Efeso

²¹ Pita ongú bhomú-o, Polo atsia abhundja me ni gulu ondu doto na Makedonia di ne Akai ngú nanú bhú gúdhú na Yelusalema. Aní adú apa me: «Í dú me ma nde akolo oo, a ayo me ma akolo di bhú gúdhú na Loma .» ²² Abhomú-o, aní atima okpála bhisi bhú ká okpála inde adú ateteke anie, Timoté di ne Elasiite, bhú gúdhú na Makedonia. Engú bini, aní atsia adú mbo matá naae bhú ndu doto na Adjia ngábula nedhinga bedi.

²³ Bha li nedhinga bhomú-o, tolo na ngbéngbé atsia akoto bhú gúdhú na Efeso pindji kpadji gba Ngámá Yesu-o. ²⁴ Kpála bini adú oo, a adú 'li aní me Demetiliusi. Aní adú abho djedje kulu eti gba ebhe na øelø Alatemi li teme inde u a'í e me aladja. Okpála na kulu ango-o adú asia tia tété naali.

²⁵ Abhomú-o, aní apo bhúla uo bhú dabili bini ne okpála inde adú amene di ngua kulu ango-o. Aní atsia apa pí uo me: «Ondaise ma, yi mbila ndjindji me ní ngakobho ka kulu inde. ²⁶ Yi ngauu, yi la di ngadjedje, engú li Polo inde-e ngamene e-o. Aní ngapa me oebhe inde li okpála amene e ne 'kpa-a, a ko oebhe de. Aní agbele okpála nganda e bhelé. Aní mene mo-o, bha bini bhú gúdhú na Efeso sii de, engú bini, masikpe de bhú ndu doto na Adjia libhomu. ²⁷ Eli ango-o ti da nasiti bha bini kulu gba ní-e de, engú bini, a ti da nayaka di sa eti gba 'ngbé ebhe na øelø Alitemi. Abhomú-o, li okpála 'ó nadhøø Alitemi, ebhe na øelø inde li okpála na ndu doto na Adjia di ne píla doto libhomu ngadhøø e-o.»

28 Li okpála inde adu oo adje engú bhomu-o lie, u abi 'gú naali. U atsia aholo nasusula me: «Alitemi gba okpála na gudhu na Efeso-o ngbéngbé!» 29 Abhomu-o, tolo aha gudhu libhomu. U aholo Gayusi, ngauo ne Alisitaluka, okpála bhisi na gudhu na Makedonia inde adu adhuku bhú dabili bini ne Polo-o. U atsia anu ne uo bhú holo li bili li okpála apèpèkèbhè bhúla o lie ko. 30 Kaka-a, Polo me ni ngakoto kala ndu okpála hana, engú bini, omukpata atsia ayoko ani. 31 Okpála koko di na ndu doto na Adjia inde adu akunda ani-e, atima eli pi ani me, ngaani makpe-e, ani anú li bili li okpála apèkèkèbhè bhúla o lie de.

32 Li nedhinga ango-o, tolo adu naali. Abhomu-o, okpála dje lio de. Okoko adu asusula ne engú kpi, okoko atsia adu di asusula ne engú koko. Bhelé na uo du ambila ta 'ngú inde u apèkèkèbhè bhúla o ngú e de. 33 Okpála koko bhú ká bhiti okpála bhomu-o, akpokpo pi Alekidjandele inde adu bhú ká uo-o, u atsia adyudyo ani ne akalanu. Abhomu-o, ani a'e 'kpa e bhúlá, ngubula nasuno me ni ngakunda nagama 'ngú kala okpála. 34 Engú bini, li okpála ambila lie me a ko maYuda-a, ndu uo hana aholo asusula bhú dabili bini ngubula nedhinga masikpe de saa bhisi me: «Alitemi gba okpála na gudhu na Efeso-o ngbéngbé!»

35 Ali soso-o, ndombi bini na gudhu ango-o ayoko uo, ani atsia apa me: «Ngayi okpála na gudhu na Efeso-o, ndu okpála hana mbila ndjindji me gudhu na Efeso ngalila 'ti ebhe gba

'ngbé ebhe na ɔɔlɔ Alitemi, di ne kulu ani inde ayie nani abhúlá atsia ati kuto-o. ³⁶ Kpála bini ti da nayayala de. Kaka-a, a ayo me yi 'o bua yi kuto. Yi améne 'ngú bhú holo de.

³⁷ Yi ago ne okpála inde-e ei. Ngauo-o, u zi 'he bhú 'ti ebhe na ɔɔlɔ gba ní-e de. U tsia sobho la di ani de. ³⁸ I dɔ me Demetelisi ne okpála na kulu gba e nde ne engú sɔnda o ne kpála bini-e, a ne oekpí di ne ongámási ngú nakodho 'ngú ango-o. A bhomɔ-o bilí inde a ayo me u nɔ kpokpo 'ngú sɔnda o lie ko. ³⁹ I dɔ me a nde matá ne engú koko inde a ayo me u gama 'ngú lie, ya apókɔbhɔ bhúla ya maka li líli apa lie, ya tsia kpókpo 'ngú tété. ⁴⁰ Atigala bedi me u pa li ní me, ní ngaha kpéke 'ndji pi okpála li 'ngú inde akodho 'kpí naki-o. Padhá de, anga tata li napókɔbhɔ bhúla ní me-e ade. Ní ti la di da nakpokpo 'ngú tété pi okpála ndjindji de.» [⁴¹ *]

20

Polo ayie bhú gɔdhu na Efeso

¹ Li tolo andjia lie, Polo a'i omɔkpata-o, ani atsia ato masi bhú uo. Pipita-a, ani abhana lie pi uo, ani atsia atapa bhú ndu doto na Makedonia. ² Ani agulu ndu doto ango-o, ani ato masi bhú omabhuka ne oeli bhelé. Pipita-a, ani atsia akolo bhú ndu doto gba oGiliki. ³ Oo, ani asi epe bata. Li nedhinga inde ani adɔ akɔnda lie naha 'ngbé

* **19:41** 19:41 Lukuluku inde-e, a bhú obhuku koko na didili u aye e bhú eli na giliki ade. [Pita li ani andjia nakpo 'ngú bhomɔ-o lie, ani atsia aha kpadjí pi okpála.]

zabụ ngú nanụ bhú ndu doto na Silia, aní adje me omaYuda apo bhúla o ngú namene ní sisiti. Abhomụ-o, aní atsia au ndjindji me ní gie líní, amba ní pụ ne abhú ndu doto na Makedonia. ⁴ Okpála inde adụ nani adhụkụ ne aní bhú dabilí bini-e, adụ nani: Sopatolosi, ndílí gba Pilusi, kpála na gụdhụ na Beloya; Alisitaluka ngauo ne Sekundusi, okpála na gụdhụ na Tesalonike; Gayusi, kpála na gụdhụ na Delebe, ne uo ne Timoté; Tisike ngauo ne Tolofime, okpála na ndu doto na Adjia. ⁵ Okpála bhomụ-o agbida kalanụ, u atsia adụ adjeke ya bhú gụdhụ na Tuluasi. ⁶ Engú bini, ngaya-a, ya aha 'ngbé zabụ bhú gụdhụ na Filipoi. Pita anokomia nazụ mapa inde lí levile nde bhú e ade-e , ya atsia anụ abhaka uo bhú gụdhụ na Tuluasi, pita ekpí bhuluvue. Oo, ya asi poso bini.

Polo akpokpo 'ngú gba Ebhe-e bhú gụdhụ na Tuluasi

⁷ Bhú 'kpí kulu madhia tagolo-o,* ya apo bhúla ya ngú nazụ mapa-o. Polo adụ agama 'ngú pí uo, anga aní adụ akunda nanụ pita 'kpí ango-o. Aní atsia agama 'ngú ngengele akolo tutu sukpe. ⁸ Ya apo bhúla ya bhú tina 'ti bhende na abhúlá-o. Oo, oeke adụ bhelé. ⁹ Makombi bini, a adụ 'lí aní me Etikusi, aní adụ lí malilisa. Lí Polo adụ la líe agama 'ngú ngengele-e, aní atí ne ela má kolio! Abhomụ-o, aní atsokodho abhúlá bhú tina 'ti na

* **20:7** 20:7 'Kpí kulu madhia tagolo: U aye bhú obhuku koko me «Ekpí na kalanụ.» Pí omaYuda-a, ekpí na kalanụ-o, a ko 'kpí kulu madhia. La pí ní-e, ekpí na kalanụ-o, a ko 'kpí yinga.

bata-a, ani atsia ati kuto má kpu! U a'e bha ibili ani me ani nde akpi. ¹⁰ Polo akè, ani angumba pí ani, ani aha ani, abi ani sa 'kpa e. Ani atsia apa me: «Yi adjé tsulu de. Ani kpi de.» ¹¹ Pipita-a, Polo agie matá lie abhúlá, ani aha mapa-o, ani agumú, ani atsia azú. Abhomú-o, ani agama matá 'ngú ngengele akolo bhú sikikpi. Pipita-a, ani atsia atapa. ¹² La-a, pí makombi bhomú-o, u anu ne ani me ani nde uu. Engú bhomú-o ateteke okpála naali.

Polo anu bhú gudhu na Milete

¹³ Ya ayie kalanu, ya aha 'ngbé zabu ngú nanu bhú gudhu na Asosa. A bhomú-o bili inde a ayo lie me ya ha Polo bhú 'ngbé zabu-o. Padhá de, anga ani apa pí ya mo-o ngae me, ni anú naani ne 'dhu ni. ¹⁴ Ani ago abhaka ya lie bhú gudhu na Asosa-a, ya aha ani bhú 'ngbé zabu, ya atsia atapa bhú gudhu na Mitilene. ¹⁵ Li ekpí aseke lie, ya ayie oo, ya akolo bhúla kpemè na Kio. Ekpí na bhisi-e, ya akolo bhú kpemè na Samosi. Ekpí na bata-a, ya atsia akolo bhú gudhu na Milete. ¹⁶ Polo abhundja me ni lú bhú gudhu na Efeso de. Padhá de, anga ani du akunda de me ni bhue bhú ndu doto na Adjia ngengele-e de. Ani adu agbene lie ngubula me, i du me nedhinga nde u-o, ni de du bhú gudhu na Yelusalema bhú anokomia na Patekote .

Polo abhana lie pí obhelesi okpála na gudhu na Efeso

¹⁷ Li Polo adu lie bhú gudhu na Milete-e, ani atima okpála bhú gudhu na Efeso me u nu 'i

obhelesi okpála na Dadjua gba Ebhe-o. ¹⁸ U akolo lie de ani-e, ani atsia apa pi uo me: «Yi mbila maka ma adu nadu lie bhú ká yi, nayie li 'kpí ma akolo lie bhú ndu doto na Adjia hana. ¹⁹ Ma amene kulu gba Ngámá me ma nde akè lima ne kuto. Ma adu aku 'gbá, ma atsia adu di adje likabhu ka li omaYuda adu adje lio lie ngú namene ma sisiti-o. ²⁰ Yi mbila hana me ma wo 'he bini inde i ti da nadu pi yi ndjindji-e belegu de bini. Ma akpokpo Bádha Ngali gba Yesu-o. Ma atsia asuno la di pi yi mbámbá bhú ká okpála, ne bhú oeti gba yi-o. ²¹ Ma apa pi omaYuda di ne oGiliki me u dji lio pi Ebhe, amba u bhuka Yesu Ngámá gba ní ko.

²² Mbia inde-e, ma adji bhú gudhu na Yelusalema maka li Bu Bhobua aha líli muma lie ngú namemene ko. Ma mbila de me abháka ma oo ne mangua 'ngú dho-ie de. ²³ Ma ambila bha bini me Bu Bhobua ngapa muma me bhú gudhu bini ne bini-e, tikpu di ne likabhu ngadjeke ma. ²⁴ La-a, mukobho gba ma makpe-e, bhú djila ma ngbéngbé ade. Padhá de, anga ma akunda namene kulu inde li Ngámá Yesu aha e muma-a, akólo bha bini ali soso: nakpokpo Bádha Ngali na bádha bhú 'bu gba Ebhe ko.

²⁵ Ma apu bhú okuti gba yi, ma akpokpo 'ngú pindji Nau gba Ebhe . Engú bini mbia inde-e, ma ambila me yi ú matá ma de. ²⁶ Kaka-a, ma apa pi yi naki me: i du me kpála bini bhú ká yi nde angita-a, a ko matá naama 'ngú de. ²⁷ Padhá de, anga ma akpokpo ndu 'ngú gba Ebhe-e pi yi hana. Ma wo engú belegu de bini. ²⁸ Yi lila

liyi ngayi makpe, di ne ndu piga hana inde li Bu Bhubua a'o e sa 'kpa yi me yi lila e ko. Yi lila Piga gba Ebhe inde ani akala e ne ngute Ndili gba e makpe ko. ²⁹ Padhá de, anga ma ambila ndjindji me pita ma-a, okpála inde maka onute-e alí bhú ká yi. U tsia bhéle piga gba Ebhe-o. ³⁰ Abana bha bhú ká yi makpe-e, okpála koko azé, u adú apa eu, u tsia gbéle omabhuka bhelé nganda o. ³¹ 'E-e! Yi lila liyi, amba yi bhundja la di me, bhú sūnda kalanga bata, sukpe ne ngbikpi, ma ndala li nasuno pi kpála bini ne bini de. Ma adu asuno belegu ne ngula bhú djila ma.

³² Mbía inde-e, ma nga'o yi sa 'kpa Ebhe, di ne eli na bádha bhú 'bu gba ani-o. A ko ani inde ngateteke yi ngubula me yi lu kpekpeke-o. Ani di ne angu ngú naha pi yi obabadha 'ngú inde ani awo e pi ndu obubu okpála gba e hana-o. ³³ Ma du ne gumu tia de. Ma du ne gumu olo de. Ma du di ne gumu bongo gba kpála bini de. ³⁴ Ngayi makpe, yi ambila ndjindji me ma amene kulu ne 'kpa ma ngubula me ngaya ne obi ma-a, ya sia 'he inde ya adu ne gumu e ko. ³⁵ Ma apana pi yi bhú ndu 'ngú hana me a ayo namene kulu ngubula nateteke okpála bhende bhú ndibhili-o. Yi bhundja di eli inde li Ngámá Yesu apa e ngae makpe me: <Djali naali pi kpála inde ngaha 'he ane kpála inde ngasia 'he ko!>>

³⁶ Pita ani apa 'ngú bhomu-o lie, ani atutu lipaku e kuto, ani atsia ayo Ebhe bhú dabili bini ne uo. ³⁷ Ndu uo hana aholo naku 'gbá. U aga ngulu ani. U atsia apa pi ani me, ani nu ndjindji. ³⁸ U adu ne likabhu naali, anga Polo apa pi uo

me u ú matá ni de. Abhomu-o, u atsia anu a'o ani ade 'ngbé zabu-o.

21

Polo atapa bhú gudhu na Yelusalema

¹ Pita ya agbo bhusu ya ne uo lie, ya aha 'ngbé zabu, ya anu bhú kpemø na Kosi. Li ekpí aseke lie, ya akolo bhú kpemø na Lodosi. Ya ayie lie oo, ya atsia anu akolo bhú gudhu na Patala. ² Oo, ya abhaka me 'ngbé zabu bini nde adji bhú ndu doto na Fenisia. Abhomu-o, ya a'u bhúbhú, ya atsia atapa. ³ Ya akolo lie lingo kpemø na Sipelele, ya nde ibili ngauu hana-a, ya a'o káká ne li pápá na gali ngú nanu li pápá na ndu doto na Silia. Ya akolo bhú gudhu na Tile, li bili inde a ayo lie me u pandja 'he bhú 'ngbé zabu-o. ⁴ Ya abhaka la omabhuka lie oo, ya amene ne uo poso bini. Abhomu-o, Bu Bhobua atsia apa pi uo me, u pa pi Polo me ani anú bhú gudhu na Yelusalema de. ⁵ Engú bini, li ekpí gba ya ale lie, ya atsia agbida. Ndu uo hana, ne olisi di ne ongisi gba o-o, anu na'o ya. Ya akoto bhú gudhu-o. Ya akolo lingo 'ngbé 'ngu, ya atutu lipuku ya kuto, ya atsia ayo Ebhe. ⁶ Kala me ya agbo bhusu ya ne uo-o, ya aholo 'kpa uo. Ya anu a'u bhú 'ngbé zabu-o. Abhomu-o, u atsia agie lio agba o.

⁷ Ya ayie bhú gudhu na Tile, ya akodho 'ngbé 'ngu-o, ya atsia akolo bhú gudhu na Potolemaisi. Ya akolo lie oo, ya aholo 'kpa ondaise ya, ya atsia adu ne uo ekpí bini. ⁸ Li ekpí aseke lie, ya aholo ne enú, ya atsia akolo bhú gudhu na Sedjale. Oo, ya ali bhú 'ti gba Filipino, musuno na Bádha Ngali

gba Ebhe, sũka okpála mananika nani inde u abhũ o bhú gũdhũ na Yelusalema ko. Ya atsia adũ agba aní. ⁹ A adũ nani ka aní ne ongisi na olisilisi badha inde i mbila nga nani engú na obhosi de. U adũ nani akpokpo 'li Ebhe pi okpála.

¹⁰ Ya adũ oo ngũbula ekpí bhelé. Li nedhinga ango-o, polofeta Agabusi ayie bhú ndu doto na Yudaya atsia ago oo. ¹¹ Aní ago abhaka ya. Aní abhulu ekpú na ludu Polo. Aní agbigbite 'kpa e di ne 'dhũ e ne di. Do aní de me: «Bu Bhobua apa me: <Bhulũ ekpú inde-e, bhú gũdhũ na Yelusalema-a, omaYuda agbigbite bhadi aní moko, u tsia pú aní pi ogandji okpála .>» ¹² Ya adje engú bhomũ-o lie, ngaya, di ne omabhuka na gũdhũ na Sedjale-e, ya akikiliki liya pi Polo me aní anú bhú gũdhũ na Yelusalema de. ¹³ Engú bini, Polo atsia agie me: «Yi ngamene bhomũ-o ní? Yi ngaku 'gbá, di ne nangbingi bua ma lie mo-o! Ma bha bini bedhe ade ngũbula me u mbimbi ma ne ekpũ, engú bini, ma bedhe ngũbula me ma kpi bhú gũdhũ na Yelusalema ngũbula 'li Ngámá Yesu.» ¹⁴ Ya ale la nadji mabhundja gba aní-e lie pima-a, ya tsia zĩ kekele tété de. Ya apa bha ibili me: «A ayo me Ngámá mene maka aní akũnda lie ko!»

¹⁵ Pita ekpí ya amene e li bili bhomũ-o, ya aleke liya. Abhomũ-o, ya atsia agbida bhú gũdhũ na Yelusalema. ¹⁶ Omũkpata koko na gũdhũ na Sedjale anũ bhú dabili bini ne ya. U anũ a'o ya gba kpála bini inde a ayo me ya adũ gba e-o. A adũ 'li aní me Menaso, kpála na kpõmõ na Sipele, sũka omũkpata na kalanũ ko.

Polo anu natsia obhelesi okpála bhú gudhu na Yelusalema

¹⁷ Ya akolo lie bhú gudhu na Yelusalema-a, omabhuka asia ya ne djali. ¹⁸ Li ekpí aseke lie, Polo anu bhú dabili bini ne ya agba Djaki. Oo, ndu obhelesi okpála hana na Dadjua gba Ebhe-e, atsia apokobhe bhúla o. ¹⁹ Polo aholo 'kpa uo. Abhomu-o, ani atsia akpokpo ndu 'ngú hana bini ne bini maka li Ebhe adu amemene lie bhú kulu gba ani bhú ká ogandji okpála ko. ²⁰ Li u adje lie-e, u atsia adhögö Ebhe. Pipita-a, u atsia apa pi ani me: «Ndai ya, mu ngauu! A ko omaYuda ketö ne ketö inde abhuka Ebhe, ndu uo hana agbite lio li líli. ²¹ La-a, u adje li 'ngú gba mu-o me, mu ngasuno pi ndu omaYuda hana inde ngadulu bhú ká ogandji okpála me, a ayo me u 'o nakpata líli gba Moidje-o. U adje di me mo opa di pi uo me, u 'o nato ongisi gba o-o bhú gandja, amba u 'o di nakpata dasundu gba omaYuda-o. ²² A ayo me ya mene pi? A na paká me, u adjé madje me mo okolo si.

²³ Mene bhende ya apá e pi mu ko. A ka ya si ne obhosi badha inde asili ndjinga me, o aha lio pi Ebhe. ²⁴ Ha uo, yi nu ne uo, yi vulu liyi ngubula me yi kolo bubu kala Ebhe, amba mu ha tia ngubula me u ka 'ndji uo. Abhomu-o, li ndu okpála hana tsia mbíla me engú inde u apa e li mu-o, a ko kukulu 'ngú de. Engú bini ngamu di-e, mu ngakpata líli gba Moidje ko. ²⁵ La pi ogandji okpála inde abhuka-a, ya aye pi uo líli gba ya-o: u 'o nazu so 'nu inde u abhölö e pi oebhe na eu-o ma'o. U 'o nazu ngute di ne so 'nu inde akpi ne

ngute bhú e hana, amba u 'o nakunda olisi di ne obhosi ngangá ma'o.»

²⁶ Abhomu-o, li ekpí aseke lie, Polo abha obhosi ang-o, ani anu avulu lie ne uo bhú dabili bini ngubula me o kolo bubu kala Ebhe. Pipita-a, ani ali bhú 'ngbé 'ti Ebhe gba omaYuda, ani atsia a'o ekpí inde li mavulu ang-o andjia lie, u tsia bhéle enu pi Ebhe ngubula ndu uo hana bini ne bini.

U aholo Polo bhú 'ngbé 'ti Ebhe gba omaYuda

²⁷ A akolo lie masikpe de me oekpí mananika-a ndjia, omaYuda koko na ndu doto na Adjia au Polo bhú 'ngbé 'ti Ebhe gba omaYuda. Abhomu-o, u ato siti 'ngú bhú 'ndji ndu okpála hana. U atsia aholo ani. ²⁸ U adu asusula me: «Ngayi omaɓsalaele-e, yi go teteke ya! Yi tsia nga kpála inde ngasuno ne ndu bili hana pi ndu okpála hana me, u yala omaɓsalaele, u yala líli gba Moidje, di ne 'ngbé 'ti Ebhe gba omaYuda-o. Ani amba belegu oGiliki bhú 'ngbé 'ti Ebhe. Abhomu-o, ani atsia asiti di bili na bubu ang-o.»

²⁹ (U adu apa mo-o, anga kalanu-o, u au Tolofime, kpála na gudhu na Efeso, bhú dabili bini ne Polo abhú gudhu. Kaka-a, u adu abhundja me Polo ato ani bhú 'ngbé 'ti Ebhe gba omaYuda.)

³⁰ U aholo amene tolo bhú gudhu libhomu. Abhomu-o, okpála ayie ne ndu bili hana, u ago apəkəbhə bhúla o. U aholo Polo, u agbele ani akilidjo, u atsia anini kolo obhoti na 'ngbé 'ti Ebhe gba omaYuda-o. ³¹ Li u adu agili nabhəle Polo lie, ngali ang-o atsia akolo li 'ngbé ngámá gba osudha na gudhu na Loma me okpála bhú

gudhu na Yelusalema libhomu ngazi tolo. ³² Kolo má gala me-e, ani abha ongámási gba osudha di ne osudha, ani anu ne uo li bili li okpála adu azi tolo lie-o. U au 'ngbé ngámá di ne osudha-a lie, u atsia a'o nabhi Polo. ³³ Abhomu-o, 'ngbé ngámá-a adyudyo lie de Polo. Ani me u holo ani, ani atsia aha líli me u gbigbite ani ne gbindjili bhisi. Pipita-a, ani ayi me: «A ko naae da, ani amene la di ni?» ³⁴ Bhú ká bhiti okpála bhomu-o, okpála adu asusula ne engú ngangá, u dje lio de. Li tolo adu lie naali-e, 'ngbé ngámá-a tsia dje ta 'ngú ango-o de. Abhomu-o, ani atsia aha líli me u nu ne Polo búhú 'ti inde li osudha nalila gudhu adu lie ko.

³⁵ Ani akolo lie li ngba 'ti-e, osudha atsia abi ani ka li bhiti okpála bhomu-o adu amene ani lie sisiti-o. ³⁶ Padhá de, anga ndu uo hana adu akpata ani. U atsia adu atu 'ue me u bhølo ani.

Polo akpokpo 'ngú gba e-o

³⁷ Nedhinga u adu akunda nato Polo lie abhú 'ti-e, Polo apa pi 'ngbé ngámá-a me: «Mu ti da naziba uu me ma pa mbo engú pi mu?» 'Ngbé ngámá-a atsia ayi ani me: «Mu mbila eli gba oGiliki-e hana? ³⁸ A ko ndi mu di maEdjipeto inde ato kpéke 'ndji búhú okpála sunda 'kpí inde-e? Ani atsia anu di ne okpála ketø badha búhú 'gu-o?» ³⁹ Abhomu-o, Polo agie me: «Ngama-a, ma ne maYuda. U azu ma búhú gudhu na Talasi búhú ndu doto na Silisia. Ma ne kpála na gudhu na padhá padhá ade. Kikiliako, ha kpadji mu ma, ma gama 'ngú pi okpála.» ⁴⁰ 'Ngbé ngámá-a atsia aziba pi ani. Abhomu-o, Polo alu li ngba 'ti-o,

ani amene 'kpa e me ni akunda nagama 'ngú pi okpála. Ndụ okpála hana andjili má bulu! Abhomu-o, Polo aholo nagama 'ngú pi uo bhú eli gba omaYuda me:

22

¹ «Odyi ma, di ne ondaise ma, yi dje engú inde ma adji apa e pi yi mbia inde-e ndjindji, amba yi mbila me ma mene 'ngú bhomu-o de.» ² Li u adje lie me ani ngagama 'ngú pi o bhú eli gba omaYuda-a, u atsia andjili la matá má bulu! Polo atsia apa me: ³ «Ngama-a, ma ne maYuda. U azu ma bhú gụdhụ na Talasi, bhú ndu doto na Silisia. Ma abhele bhú gụdhụ na Yelusalema inde. Mụsuno gba ma Gamaliele asuno nambila lílì gba onguo ogbi ní-e mụma ndjindji. Ma aha nani lima pi Ebhe ne bua ma bini maka ndụ yi hana yi ngamemene lie naki ko.

⁴ Ma adụ ato mbolo li okpála inde adụ akpata kpadji gba Ngámá-o, ma atsia adụ agili nabhili uo. Ma azụmụ obhosi di ne olisi, ma atsia amba uo bhú tikpụ. ⁵ Bhele kpála gba odimandọ gba Ebhe di ne obhelesi okpála mbila ndjindji me ma ngapa e kụkụlụ 'ngú. U aha belegụ obalụa mụma ngụbula me ma nụ ne di pi ondaise ní inde bhú gụdhụ na Damasi. Ma anụ oo me ma holo omabhuka inde oo, ma gbigbite uo ne gbindjili, amba ma mba uo bhú gụdhụ na Yelusalema ngụbula me u mene uo sisiti.»

*Polo akpokpo maka ani adji bua e lie ko
(Tsia bhú Kul. 9:1-19, 26:12-18.)*

⁶ «Abhomu-o, ma adu lie li kpadji-e, masikpe de nakolo bhú gúdhú na Damasi de tulukpe-e, kolo me-e, zi 'kpí na kpekpeke ayie abhúlá, a ago asa ma ngbalina. ⁷ Ma agú 'i ma kuto má gbwúe! Ma atsia adje eli bini inde apa muma me: <Saulo, Saulo, mu ngato mbolo li ma ngú ni?> ⁸ Abhomu-o, ma atsia agie me: <A ko mu da, Ngámá?> Aní atsia agie muma me: <A ko ma Yesu, kpála na kuti na Nadjaleta, inde mu ngato mbolo lie ko.> ⁹ Okpála inde adu bhú dabili bini ne ma-a, au zi 'kpí ango-o. Engú bini, u dje 'li kpála inde adu agama 'ngú muma-a de. ¹⁰ Abhomu-o, ma atsia ayi matá me: <Ngámá, a ayo la me ma mene pí?> Ngámá agie muma me: <Yie bhúlá, nu bhú gúdhú na Damasi. Oo, u apá pí mu ndu 'ngú hana inde li Ebhe akúnda me mu mene e ko.> ¹¹ La-a, ma du au 'kpí ka kpéke zi 'kpí bhomu-o lie de-e, okpála inde adu bhú dabili bini ne ma-a, aholo 'kpa ma, u atsia anu ne ma bhú gúdhú na Damasi.

¹² Kpála bini adu nani oo, a adu 'li aní me Anania. Aní adu akpe Ebhe, aní atsia adu di akpata líli gba ní-e ndjindji. Ndu omaYuda hana na gúdhú na Damasi adu apa 'ngú gba ani-e ndjindji. ¹³ Aní ago natsia ma. Aní akolo lie de ma-a, aní atsia apa muma me: <Ndai ma Saulo, u matá 'kpí uu!> Bha li nedhinga bhomu-o, djila ma abhulu, ma atsia au aní. ¹⁴ Abhomu-o, aní atsia apa muma me: <Ebhe gba onguo ogbi ní abhu nani mu didili ngubula me mu mbila engú inde aní akúnda e-o. Aní abhu mu ngubula me mu mbila Kpála inde ngbingbili-o, amba mu dje di 'li aní makpe. ¹⁵ Padhá de, anga pí aní-e,

mo odú akpokpo onǵú gba aní bhende mo ou e, di ne bhende mo odje e pí ndu okpála hana. ¹⁶ Mbia inde-e, mu matá ngadjeke ní? Yie bhúlá, sia batisimo, mu yo Ebhe, amba aní 'e siti 'ngú gba mu ko.>

Polo akpokpo maka li Ebhe atima ani lie agba ogandji okpála-o

¹⁷ Abhomu-o, ma agie lima bhú gudhu na Yelusalema. Ekpí bini, ma adu ayo Ebhe bhú 'ngbé 'ti Ebhe gba omaYuda, ma atsia au engú maka loto. ¹⁸ Ma au Ngámá, aní atsia apa muma me: <Yaka! Koto bhú gudhu na Yelusalema má gala, anga okpála na gudhu inde-e, u zíba engú gba ma inde mo opá e pí uo-o de.> ¹⁹ Abhomu-o, ma atsia apa me: <Ngámá, u mbila hana me ma adu nako nanu bhú oti nadjé líli gba Moidje , ma adu aholo okpála inde abhuka mu-o. Ma adu amba uo bhú tikpu, ma atsia adu di abhi uo ne fimbo. ²⁰ Nedhinga u adu abhelo Etieni, kpála nakpokpo Bádha Ngali gba mu-o lie, ma adu di oo. Ma aziba okpála inde adu abhelo ani-o. Ma atsia adu alila obongo gba uo-o.> ²¹ Abhomu-o, Ngámá atsia apa muma me: <Nunu, anga ma atima mu tsutsu agba ogandji okpála .>>

Polo apa me, ni ne kpála na gudhu na Loma

²² Bhiti okpála bhomu-o adu nga bha nadjé aní akolo li engú inde aní apa e bhomu-o. Abhomu-o, u atsia aholo asusula me: «Yi bhelo kpála bhomu-o mabhelo! Aní ti da nadye píla doto de!» ²³ U adu asusula kpekpeke. U adu ape obongo gba o, u atsia adu abala ndju doto ne abhúlá.

²⁴ Abhomu-o, 'ngbé ngámá gba osudha aha líli me u to Polo abhú 'ti gba osudha. Aní atsia apa me u bhi aní ne fimbo, amba aní pa ta 'ngú inde lí okpála ngasusula lie me u mene aní sisiti-o. ²⁵ Lí u agbigbite aní lie ne ekpú ngubula nabhi aní ne fimbo-o, abhomu-o, aní atsia apa pí ngámá gba osudha inde adu oo me: «A ayo bha ndjũ uu me, yi bhi ndili na kuti na Loma ne fimbo me, u nde kodho nga 'ngú gba ani-e di?»

²⁶ Lí ngámá bhomu-o adje engú lí Polo ayi e lie, aní atsia anu abhaka 'ngbé ngámá gba osudha-o. Aní atsia ayi aní me: «Mo oméne pí, anga kpála bhomu-o, a ko ndili na kuti na Loma!» ²⁷ 'Ngbé ngámá-a ago abhaka Polo, aní atsia ayi aní me: «Pa nga muma, mu ne ndili na kuti na Loma na paká?» Polo atsia agie pí aní me: «Hení, a na paká.» ²⁸ Abhomu-o, 'ngbé ngámá-a atsia apa me: «Ma aha nani tia bhelé ngubula me ma kolo kpála na kuti na Loma.» Polo atsia apa naae me: «Ngama-a, u azu ma kpála na kuti na Loma.» ²⁹ Kolo má gala me-e, okpála inde i di me bhi aní ngubula me aní gama 'ngú-o, u atsia atsambala de aní. Abhomu-o, 'ngbé ngámá gba osudha-a aholo adje tsulu, lí aní ambila lie me ní aha líli ngani me u gbigbite ndili na kuti na Loma-o.

Polo kala Libi okpála natsia 'kpí lí 'ngú gba omaYuda

³⁰ Abhomu-o, 'ngbé ngámá gba osudha-a adu akunda me, ní mbila kukulu ta 'ngú inde lí omaYuda asungula Polo lie pí ongámási-o. Kaka-a, lí ekpí aseke lie, aní aha líli me u bhuhulu Polo, di me ongbengbe odimandø gba Ebhe , di

ne Libi okpála natsia 'kpí li 'ngú gba omaYuda pøkøbhe bhúla o. Pípita-a, aní ago ne Polo, aní atsia a'o aní kala uo.

23

¹ Abhomu-o, Polo atsia Libi okpála natsia 'kpí li 'ngú gba omaYuda ne kpéke djila. Do aní de-e: «Ondaise ma, nakolo pí mbia inde-e, ma adhuku kala Ebhe ndjindji.» ² Engú bini, bhele kpála gba odimandø Anania aha líli pí okpála inde adu de aní-e me u su 'bhø aní. ³ Abhomu-o, Polo atsia apa pí aní me: «Ebhe asú mu ngae, ngamu kpála inde maka pabu 'ti inde u ato embú lie! Mo odu oo ngú nakodho 'ngú gba ma-a maka líli apa lie. Engú bini, mo ogumu líli anga mo opa me u su ma!» ⁴ Abhomu-o, okpála inde adu de Polo atsia apa pí Polo me: «Mu ngasobho bhele kpála gba odimandø gba Ebhe!» ⁵ Polo agie me: «Ondaise ma, ma mbila igini de me a ko bhele kpála gba odimandø gba Ebhe-e de. Padhá de, anga Bhuku gba Ebhe-e apa me: «Mo osóbho ngámá gba okpála na doto gba mu-o de.†»»

⁶ Lí Polo ambila la nani lie me bhú ká okpála inde apo bhúla o bhomu-o, okoko adu oSadukai, okoko adu omuFalisai-e, aní atsia asula bhú ká uo me: «Ondaise ma, ma ne muFalisai, ndili gba omuFalisai. I du me u nde nga'o 'ngú pí ma me-e, a ko anga ní ne 'to ní me okpála inde amu-o, azúku mazuku.» ⁷ Lí aní apa 'ngú bhomu-o lie, omuFalisai ne oSadukai aholo natsi sunda

† 23:5 23:5 Tsia bhú Eki. 22:27.

o. Abhomu-o, okpála atsia agbo bhusu o bhisi. ⁸ (Padhá de, anga oSadukai ziba nani naao de me okpála azúku mazuku-o de. U atsia apa di nani matá me andjelu ade, bua di ade. Engú bini, omuFalisai atsia aziba nani naao ndu 'ngú bhomu-o hana.) ⁹ Abhomu-o, tolo atsia akolo naali. Omusuno na líli koko inde adu bhú ká omuFalisai-e ayie bhúlá, u atsia apa ne angu hana me: «Ya u siti 'ngú bhú kpála inde-e belegu de bini. A mana mugito me andjelu bini, i du di-e bua, agama 'ngú pi ani ngae!»

¹⁰ Li okpála adu alo 'bhe lie sunda o naali-e, 'ngbé ngámá gba osudha-a aholo adje tsulu me u adji adolo Polo. Kaka-a, ani aha líli pi osudha-a me, u ke, u nu ha Polo bhú ká uo, amba u gie ani abhú 'ti gba osudha inde ngalila gudhu-o.

¹¹ Sukpe-e, Ngámá akoto li Polo, ani atsia apa pi ani me: «Atou! Padhá de, anga maka mo okpokpo 'ngú gba ma lie bhú gudhu na Yelusalema-a, a ayo bhadi me mu nu kpokpo bhú gudhu na Loma moko.»

OmaYuda adje lio ngú nabhelo Polo

¹² Li ekpi aseke lie, omaYuda adje lio pindji Polo, u atsia atu silika me o zu bha bini 'he, li o ndji la bhadi 'he bhe nandji mandji-e me, o nde abhelo bha bini ani kalanu. ¹³ Okpála inde nani adje lio bhomu-o ane nani ndjikpa badha mane. ¹⁴ U anu abhaka ongbengbe odimandø di ne obhelesi okpála, u atsia apa pi uo me: «Ya atu silika me ya azu bha 'he me ya nde abhelo Polo kalanu. ¹⁵ Mbia inde-e, a ayo me ngayi ne Libi okpála natsia 'kpi li 'ngú gba omaYuda-a, yi

yo ka 'ngbé ngámá gba osudha-a me, ani go ne Polo kala yi si. Yi mene mugito me yi akunda atsia 'kpí li engú gba ani-e ndjindji. La pi ya-a, ya bedhe ngú nabhøle ani me ani nde kolo nga de.»

¹⁶ Engú bini, ndili na bhobhoko gba ndai Polo na øøle-o adje engú ango-o. Ani anu, ani ali bhú 'ti gba osudha inde ngalila gudhu-o. Ani atsia apa pi Polo. ¹⁷ Abhomu-o, Polo a'i suka ongámási gba osudha-o. Do ani pi ani me: «Nu ne makombi inde-e pi 'ngbé ngámá gba osudha-o. Padhá de, anga ani ne engú napapa pi ani.»

¹⁸ Ngámá gba osudha-a aha ani, ani anu ne ani pi 'ngbé ngámá gba osudha-o. Ani atsia apa me: «Bhulu 'kpú Polo a'i ma, ani atsia ayo ka ma me, ma go ne makombi inde-e pi mu. Padhá de, anga ani ne engú napapa pi mu.»

¹⁹ Abhomu-o, 'ngbé ngámá gba osudha-a aha 'kpa makombi-o. Ani anu ne ani ne li ngongo, ani atsia ayi ani me: «Mo okunda napa muma mangua 'ngú dho?» ²⁰ Ani atsia apa me: «OmaYuda adje lio me, o yo ka mu me ha Polo, amba mu go mambi ne ani kala Libi okpála natsia 'kpí li 'ngú gba omaYuda-o. U améne mugito me u ngakunda atsia 'kpí li 'ngú gba ani-e ndjindji.

²¹ Engú bini, mo obhúka uo de. Padhá de, anga okpála nane ndjikpa badha bhú ká uo, adje lio ngú namene ani sisiti. U atu silika me o zú bha bini 'he, li o ndjí la bhadi 'he bhe nandji mandji-e me, o nde abhøle bha bini Polo kalanu. Mbia inde-e, uo bedhe. U ngadjeke bha maka mo opá lie ko.» ²² 'Ngbé ngámá gba osudha-a apa pi

makombi angoo me: «Mo opá pí kpála bini de me, ni apa engú inde-e muma apa-a de.» Pipita-a, 'ngbé ngámá gba osudha-a atsia agie ani sidi.

U atima Polo bhú gudhu na Sedjale

²³ Pipita-a, 'ngbé ngámá gba osudha-a a'i ongámási na sudha gba e-e bhisi. Ani atsia apa pí uo me: «Yi po bhúla osudha kámá bhisi, di ne obhende ndjikpa mananika inde adhudhuku pí 'ngbu opunda, amba yi po la di bhúla obhende na mandambi-e kámá bhisi. Ndu yi hana yi du bedhe ngú nanu bhú gudhu na Sedjale tagolo bhú saa na odukpabini. ²⁴ Yi leke di punda ngú nabi Polo. Yi mene me ani kolo li bilí li ngámá Felikisi nde lie ndjindji me ehe bini nde mene ani de.»

²⁵ Abhomu-o, ani atsia aye balua me:

²⁶ «Kolode Lisiasi apa me, ni yi Felikisi, ngámá na asasaua, mayi. ²⁷ OmaYuda aholo nako kpála inde ma atima e pí mu inde-e ngao. U adu akunda nabhelo ani. La-a, ma adje lie me a ko ndili na kuti na Loma-a, ngama ne osudha gba ma-a, ya atsia agbulu ani ka uo. ²⁸ Maka ma adu akunda nambila ta 'ngú inde u aholo ani ngú e lie, ma atsia anu ne ani kala Libi okpála natsia 'kpí li 'ngú gba uo-o. ²⁹ Ma au me, u aholo ani pindji ongú inde atsia líli gba uo-o. La-a, ma u ani ne engú bini inde u ti da nabhelo ani, di ne bhende u ti da naholo ani ka e de. ³⁰ Li u apa muma lie me u adu agili nabhelo ani-e, ma atsia atima ani pí mu kolo má gala! Ma atsia apa di pí okpála inde a'o

'ngú pí ani-e me, u nṁ kpokpo 'ngú gba ani-e pí mṁ.»

³¹ Abhomṁ-o, osudha-a atsia amene maka li 'ngbé ngámá gba uo apa pí uo lie ko. U aha Polo, u atsia anṁ bha ne ani sukpe bhomṁ bhú gudṁ na Atipatili. ³² Li ekpí aseke lie, osudha bhende adṁkṁ ne 'dṁ o agie lio li bili li osudha nalila gudṁ-o adudṁ lie ko. U atsia a'o obhende adṁ adṁkṁ pí 'ngbṁ opunda-a me, u nṁ ne Polo. ³³ U akolo lie bhú gudṁ na Sedjale-e, osudha-a aha balṁa pí ngámá na ndu doto ango-o. U atsia a'o di Polo sa 'kpa ani. ³⁴ Abhomṁ-o, ngámá-a atanga balṁa-o. Aní atsia ayi me Polo ne kpála na ndu doto bhedho. Aní adje la lie me a ko kpála na ndu doto na Silisia-a, ³⁵ ani atsia apa pí ani me: «Ma adjé engú gba mṁ-o me okpála inde yi nde ne o bhú 'ngú-o nde akolo.» Abhomṁ-o, ani atsia aha líli me u lila Polo bhú eti gba 'ngbé ngámá Elode. *

24

OmaYuda agbe Polo kala ngámá Felikisi

¹ Pita ekpí bhuluvue, bhele kpála gba odi-mandṁ Anania akolo bhú gudṁ na Sedjale, bhú dabilí bini ne obhelesi okpála koko di ne avuka bini inde adṁ 'li e me Teletulusi. U atsia ato siti 'ngú ne 'li Polo pí Felikisi, ngámá na ndu doto ango-o. ² U a'i Polo. Abhomṁ-o, Teletulusi atsia aholo akpokpo lí ani me: «Ngámá na asasaua,

* **23:35** 23:35 Eti gba 'ngbé ngámá Elode: A adṁ nani bhú Sedjale. Elode Ngbéngbé ayiki nani ngae. Ongámási na Loma atsia adji nani dabilí nadṁ ka o tété.

Felikisi, mo oto guo 'ngú bhú ndu doto inde-e ngamu. Mu di aleke ongu bhelé bhú doto gba ya ne imbilangú gba mu-o. ³ Ndu 'kpí hana di ne ndu bili hana, ngámá na asasaua, Felikisi, ya ngagie heni ngú ndu 'ngú bhomu-o hana. ⁴ Engú bini, ma kúnda nabhèlè nedhinga gba mu-o de. Kaka-a, ma ayo ka mu me dje nga mbo ya bedi ne bádha bua.

⁵ Ya au me kpála inde-e, a ko kpála na mugwe. Aní ngato kpéke 'ndji bhú 'ndji ndu omaYuda hana píla doto libhому. A ko la di ngámá na Dadjua bini na Ebhe gba okpála na kuti na Nadjaleta. ⁶ Aní ale belegu nasiti 'ngbé 'ti Ebhe gba omaYuda-o. Abhому-o, ya atsia aholo aní. [Ya akúnda nako me kodho 'ngú gba ani-e maka lí lí gba ya apa lie-o. ⁷ Engú bini, Lisiasi, 'ngbé ngámá gba osudha-a, atsia ayoko. Aní atsia agbulu ani ka ya. ⁸ Pipita-a, ani atsia aha lí lí pí ya me ya go ne ani kala mu.] I du me mu nde ayi ani ngamu makpe-e, mu tsia mbíla me ndu 'ngú hana inde ya apa e lí ani-e, a ko kukulú 'ngú.» ⁹ OmaYuda atsia aziba di ongu ango-o. Do uo me: «A ko kukulú 'ngú.»

Polo akpokpo 'ngú gba e kala ngámá Felikisi

¹⁰ Abhому-o, ngámá Felikisi amene 'kpa e pí Polo me ani kpokpo 'ngú gba e-o. Polo atsia apa me: «Ma mbíla ndjindji me, ngubula kalanga bhelé-e, mu ngakodho 'ngú gba ya okpála na kuti inde-e ngbingbili. Kaka-a, ma ne djali naali ngú nakpokpo 'ngú gba ma-a pí mu. ¹¹ Mu tí da nambíla bha ngamu makpe me ane nga ekpí ndjikpa ne ká bhisi de maka ma anu nako lie

bhú gũdhũ na Yelusalema ngú nadhөгө Ebhe-o. ¹² Kpála bini bhaka ma namene kpekebhe ne kpála bini na 'ngbé 'ti Ebhe gba omaYuda-a de. Kpála bini bhaka la di ma nato kpéke 'ndji bhú 'ndji okpála bhú 'ti nadjе líli gba Moidje , di ne li kpadji de.

¹³ Okpála ago ne ma kala mũ inde-e ne engú bini ade inde i ti da nasuno me engú inde u ngapa e li ma inde-e, a ko kũkũlũ 'ngú. ¹⁴ Ma aziba kala mũ si me ma ngakpata kpadji na mbia inde ngauo, u ngau e me a sisiti-o. La-a, ma ngadhөгө Ebhe gba onguo ogbi ní. Ma la di ngabhuka ndũ 'ngú inde u aye e bhú obhuku na líli di ne bhe gba opolofeta-a hana. ¹⁵ Ma ne nabhuka bhú Ebhe bhadi maka uo me, okpála na ngbingbili di ne obhende ngbingbili ade-e azúku mazuku. ¹⁶ Kaka-a, ma ngamene ndũ 'kpí hana ne kpéke me, bua ma dũ ndjindji kala Ebhe, di ne kala okpála.

¹⁷ Ma dũ lie de bhú gũdhũ na Yelusalema ngubula kalanga bhelé-e, ma atsia agie lima oo ngú nateteke obhũlũ ndibhili na doto gba ma-a ne tia, di ne naha makiso gba ma-a pi Ebhe. ¹⁸ Kaka-a, u abhaka ma bhú 'ngbé 'ti Ebhe gba omaYuda me, ma nde avũlũ lima ngú nakolo bubu kala Ebhe avũlũ. Ma bha ká okpála de. Ma to la di kpéke 'ndji bhú 'ndji okpála de. ¹⁹ OmaYuda koko bhú ká obhende ayie bhú ndu doto na Adjia, adũ oo. A ayo nako me u gbe ma kala mũ ngao, i dũ me u nde ne engú li pápá gba ma-o. ²⁰ I dũ mo-o de-e, a ayo me okpála inde si-e suno siti 'ngú inde u au ma ne e, nedhinga

inde u agbe nako ma lie kala Libi okpála natsia 'kpí li 'ngú gba omaYuda-o .

²¹ Padhá de, anga ma amene bha koli 'he bini. Ma apa kpekpeke kala uo me: <Yi agbe naki ma kala yi ngú nakpokpo 'ngú anga ma abhuka me okpála inde amu-o, azúku mazuku!>» ²² La-a, pi ngámá Felikisi-e, ani adu ambila kpadji gba Yesu-o ndjindji. Abhomu-o, ani agie engú angu-o me ni akódho sisi. Ani atsia apa pi uo me: «Ma akódho 'ngú gba yi-e, li nedhinga li 'ngbé ngámá gba osudha Lisiasi agó lie ko.» ²³ Ani atsia aha líli pi ngámá gba osudha-a me u lila Polo, kpála na 'kpú-o, malila. Engú la bini, u 'o ani me ani du mbo bhú ngu e. U ayóko di omaha ani ngú nateteke ani de.

U agbe matá Polo kala ngámá Felikisi ne Dulusile

²⁴ Pita mbo ekpí bedi-e, ngámá Felikisi ago ne wala e Dulusile. Òlè angu-o adu maYuda. Ngámá Felikisi atima okpála me u nu 'i Polo. Abhomu-o, ani atsia adje engú li Polo akpokpo e pindji nabhuka Yesu Kilisito-o . ²⁵ Pipita-a, Polo aholo akpokpo lele maka a ayo lie nadu ngbingbili , ne nane gumu kute di ne me ekpí koko akólo makolo, ekpí inde li Ebhe akódho 'ngú gba okpála lie ko. Abhomu-o, ngámá Felikisi aholo adje tsulu. Ani atsia apa me: «Mbia inde-e, mu ti da nanu. I du me ma nde asia nedhinga-a, ma tsia 'í matá mu.» ²⁶ Ani adu di ne 'to e me ni asia tia ka Polo. Kaka-a, ani adu a'i Polo piko ngú nakpokpo 'ngú ne ani.

²⁷ Pita kalanga bhisi-e, Polosiusi Fesitusi akolo ngámá bhú da ngámá Felikisi. Engú bini, ngámá Felikisi a'o ká Polo bhú tikpɛ, anga anɪ adu amene me omaYuda u ni ndjindji.

25

Polo ayo me 'ngbé ngámá Kaisala kodho 'ngú gba ni-e ngae

¹ Li ngámá Fesitusi akolo lie bhú ndu doto ango-o, pita 'kpí bata-a, anɪ ayie bhú gɔdɔ na Sedjale, anɪ atsia anɔ bhú gɔdɔ na Yelusalema.

² Ongbengbe odimandɔ , di ne ongámási gba omaYuda-a , ago kala anɪ. U atsia ato siti 'ngú ne 'li Polo pi anɪ. U akikiliki lio pi anɪ me, ³ anɪ ziba pi o me o nɔ ne Polo bhú gɔdɔ na Yelusalema. U adje lio me, li o kolo li kpadji-e, o de bhɔlɔ anɪ.

⁴ Engú bini, ngámá Fesitusi agie pi uo me: «Bili na tikpɛ gba Polo-o, a ko Sedjale. La-a, ngama makpe-e, ma adji bhadi oo mbia inde.» ⁵ Anɪ atsia apa matá me: «A ayo me ongbengbe okpála gba yi-e nɔ bhú dabili bini ne ma. I dɔ me kpála bhomɔ-o nde amene siti 'ngú-o, u de kpokpo oo ko.»

⁶ Ngámá Fesitusi amene agba uo ekpí nayie bhú madjina masikpe de nakolo bhú ndjikpa. Pipita-a, anɪ atsia agie lie bhú gɔdɔ na Sedjale. Li ekpí aseke lie, anɪ atsia anɔ li bili nakodho 'ngú-o. Abhomɔ-o, anɪ atsia aha líli me u go ne Polo. ⁷ Li Polo ago lie, omaYuda inde ayie bhú gɔdɔ na Yelusalema-a, asa lio deno anɪ. Abhomɔ-o, u aholo apa osisiti 'ngú na ngbengbengbe li anɪ bhelé bhelé. La-a, u dɔ

ambila nakpokpo ta onǵú ang-o de, anga a adu eu. ⁸ Abhomu-o, Polo atsia aholo nakpokpo 'ngú gba e me: «Ma mene siti 'ngú bini de. Ma gamu líli gba omaYuda-a de. Ma siti 'ngbé 'ti Ebhe gba omaYuda-a de. Ma mene la di siti 'ngú li 'ngbé ngámá Kaisala de.» ⁹ Ngámá Fesitusi adu amene me omaYuda u ni ndjindji. Kaka-a, ani atsia ayi Polo me: «Mo kunda nanu bhú gudhu na Yelusalema, ngubula me u kodho 'ngú gba mu-o kala ma oo?»

¹⁰ Engú bini, Polo agie me: «Ma alu e bhú ndende gba 'ngbé ngámá Kaisala-o. A ayo me u kodho 'ngú gba ma-a bha si. Ma mene siti 'ngú li omaYuda belegu de bini. Ngamu makpe-e, mo ombila 'ngú tété ndjindji. ¹¹ I du me ma nde atu 'ngú, i du di me ma nde amene siti 'ngú inde ayo me u bhelø ma ka e-e, ma yala nakpi de. Engú bini, i du la me, kukulu 'ngú nde bhú ká onǵú inde u ngapa e li ma ade-e, kpála bini ti da natse 'kpa li ma pi uo de. Ma ayo me 'ngbé ngámá Kaisala kodho bha 'ngú gba ma-a ngae.»

¹² Abhomu-o, pita li ngámá Fesitusi agama 'ngú ne obhelesi okpála gba e lie, ani atsia apa me: «Mo oyo lie me 'ngbé ngámá Kaisala kodho bha 'ngú gba mu-o ngae, mo onú agba ani.»

Polo akpokpo 'ngú gba e kala 'ngbé ngámá Agilipa

¹³ Pita mbo oekpi, 'ngbé ngámá Agilipa ne ndai e na øelø Belenise, akolo bhú gudhu na Sedjale. U anu natsia ngámá Fesitusi. ¹⁴ U asi oo mbo ekpi bhelé. Abhomu-o, ngámá Fesitusi atsia akpokpo 'ngú gba Polo pi 'ngbé ngámá Agilipa me: «Kpála

bini bhú tikpɛ si, ngámá Felikisi a'o nani ka ani ngae. ¹⁵ Ma anɛ nako lie bhú gudhɛ na Yelusalema-a, ongbengbe odimandɛ gba Ebhe di ne obhelesi okpála gba omaYuda-a, ato siti 'ngú ne 'li ani mɛma. U atsia apa mɛma me, ma 'o 'ngú pí ani. ¹⁶ Ma agie pí uo me: «Agba ya okpála na Loma-a , kala me u 'o 'ngú pí kpála-a, ayo me u dulɛ ngaiza kala ongámási ne okpála inde agbe ani kala uo-o bhú dabili bini. Ani kpokpo 'ngú gba e ngú nagbegbe lie bhú 'ngú ango-o ko.»

¹⁷ Ya atsia ago si ne uo bhú dabili bini. Ma djeke de, li ekpí aseke lie, ma aha líli me u go ne kpála ango-o kala ma li bili nakodho 'ngú-o. ¹⁸ Okpála inde ato siti 'ngú li ani pí ongámási-e ago. Engú bini, ma u siti 'ngú inde u asungula ani pí ongámási ngú e maka bhende ma adɛ abhundja e de. ¹⁹ La-a, u adɛ amene kpekebhe pindji 'ngú na Ebhe gba o di ne pindji 'ngú gba kpála bini inde 'li e me Yesu. Padhá de, anga kpála ango-o akpi, engú bini, Polo la ngapa me ani ɛɛ.

²⁰ Mɛma-a, ma mbila 'ngú ma akódho e li ngua 'ngú bhomɛ-o de. Kaka-a, ma ayi Polo atigala ani zíba nanɛ bhú gudhɛ na Yelusalema, amba u kodho 'ngú gba ani-e oo. ²¹ Engú bini, Polo ayo me 'ngbé ngámá na gudhɛ na Loma kodho bha engú gba ni-e ngae. Abhomɛ-o, ma atsia aha líli me u lila ani bhú tikpɛ akolo li 'kpí ma atíma ani lie pí 'ngbé ngámá Kaisala ko.» ²² 'Ngbé ngámá Agilipa atsia apa pí ngámá Fesitisi me: «Ngama di-e, ma akunda nga di me ma dje kpála ango-o.» Ngámá Fesitisi atsia agie pí ani me: «Mo odjé ani

mambi.»

²³ Abhomu-o, li ekpí aseke lie, 'ngbé ngámá Agilipa ne Belenise ago bhú asasaua ne bhiti okpála. U ali bhú 'ti nakodho 'ngú bhú dabili bini ne ongámási gba osudha di ne ongbengbe okpála na gudhu-o. Ngámá Fesitusi atsia aha líli me u go ne Polo. ²⁴ Pipita-a, ngámá Fesitusi atsia apa me: «'Ngbé ngámá Agilipa di ne ndu yi okpála hana inde bhú dabili bini ne ya si-e, yi tsia nga kpála inde. Ndu omaYuda hana ago akpokpo 'ngú gba ani-e muma. U abhaka ma bhú gudhu na Yelusalema, u atsia ago belegu ei ne nasusula me: <A ayo me u bhelø ani!»

²⁵ Muma-a, ma u siti 'ngú inde ayo me u bhelø ani ka e de. La-a, ani ayo lie me 'ngbé ngámá na Loma kodho bha 'ngú gba ni-e ngae, ma atsia aziba me ma tima ani pi ani. ²⁶ Ma mbila engú inde ma ti da naye e pi 'ngbé ngámá li engú gba ani-e de. Kaka-a, ma agbe ani kala yi, la ndju makpe kala mu, 'ngbé ngámá Agilipa. Yi ani, amba ma sia engú inde ma ayé e ko. ²⁷ Padhá de, anga a ko muma engú na ngingi me, ma tima kpála na tikpu pi 'ngbé ngámá Kaisala me, ma nde suno ta 'ngú inde u aholo ani ngú e pi ani de ko.»

26

Polo akpokpo 'ngú gba e kala 'ngbé ngámá Agilipa

¹ 'Ngbé ngámá Agilipa atsia apa pi Polo me: «Mu ti da nakpokpo 'ngú gba mu-o.» Abhomu-o, Polo a'e 'kpa e, ani atsia akpokpo 'ngú gba e

me: ² «'Ngbé ngámá Agilipa, naki-e, ma ne djali naali ngubula nakpokpo 'ngú gba ma kala m̄ li nd̄ 'ngú hana inde li omaYuda apa e li ma ko. ³ Padhá de, anga m̄ mbila dasund̄ di ne kpekebhe gba omaYuda hana. Kaka-a, ma ayo ka m̄ me, dje nga mbo ma ne 'ndjá bua.

⁴ Nd̄ omaYuda hana mbila mukobho gba ma-a ndjindji nayie li nedhinga ma ad̄ lie makombi-o. U mbila maka ma ad̄ akobho lie bhú ká okpála na doto gba ma di ne bhú ḡdh̄ na Yelusalema ndjindji. ⁵ U ambila nani ma didili. U ti da napapa ngao, i d̄ me u nde akunda-o. Ma d̄ nani ne s̄ka om̄Falisai inde ad̄ alila líli nadhөгө Ebhe gba ní-e ndjindji-o. ⁶ La mbia inde-e, u agbe ma li bili nakodho 'ngú-o anga ma ne 'to ma 'to engú inde li Ebhe apa nani kalan̄ me ni améne e p̄i onguo ogbi ní-o. ⁷ Okpála na piga ndjikpa ne ká bhisi gba ní-e, nga'o 'to o me engú ango-o améne lie mamene. Ka 'ngú ango-o, u ngamene kulu kpekpeke p̄i Ebhe, sukpe ne ngbikp̄i. 'Ngbé ngámá Agilipa, ngama di-e, ma bhadi ngabhuka moko. Kaka-a, omaYuda atsia ato siti 'ngú ne 'li ma p̄i ongámási. ⁸ Ka ni ngayi omaYuda, yi ti da nabhuka lie de me, Ebhe azúku okpála inde amu-o mazuku-o?

⁹ Ngama makpe, ma ad̄ abhundja nani me, ma mene ne kpéke me okpála abhúka Yesu, kpála na kuti Nadjaleta de. ¹⁰ A ko engú inde ma amene di-e bhú ḡdh̄ na Yelusalema ko. Ongbengbe odimandө aha kpadji m̄ma ngao. Ma amba omabhuka bhelé bhú tikp̄. U ad̄ akodho 'ngú gba uo lie me u bhili uo, ma atsia

adu aziziba. ¹¹ Ma adu apu piko bhú oti nadje líli gba Moidje-o . Ma adu amene uo sisiti ngabula me u sobho Yesu. Bhú nabi 'gú gba ma-a, ma adu belegu nakpata uo bhú ogudhu gba ogandji okpála .»

Polo akpokpo maka ani adji bua e lie-o

¹² Kaka-a, ekpí bini ma adu anu bhú gudhu na Damasi. Ongbengbe odimandə aha angu muma, u atsia atima ma oo. ¹³ Li kpadji-e, bhú nedhinga na tulukpe-e, 'ngbé ngámá Agilipa, ma au zi 'kpí ayie abhúlá. Zi 'kpí ango-o adu kpekpeke naali ane zi ela mane. Zi 'kpí ango-o aholo aziga ma ngbalina bhú dabili bini ne okpála inde ya adu ne o ko. ¹⁴ Ndu ya hana, ya atuko kuto má dhululu! Abhomu-o, ma atsia adje eli bini apa muma bhú eli gba omaYuda me: «Saulo, Saulo, mu ngato mbolo li ma ka ni? Mu ngaha likabhu pi mu makpe maka enu inde atu lie li ndula gba mulila gba e-o.» ¹⁵ Ma atsia ayi me: «A ko mu da, Ngámá?» Abhomu-o, Ngámá atsia agie muma me: «Ngama-a, ma ne Yesu inde mu ngato mbolo lie ko.

¹⁶ Engú bini, yie bhúlá, amba mu lu malu. Padhá de, anga ma akoto li mu ngabula me mu kolo kpála na kulu gba ma-o. Mo okpokpo pi okpála me mo ou ma naki. Mo okpokpo di matá pi okpála ndu 'ngú hana inde ma asúno e pi mu sidi ko. ¹⁷ Ma alila mu ka omaYuda di ne ogandji okpála inde ma atima mu agba o-o. ¹⁸ Mo obhulu djila uo, u zé bhú biti, u tsia lí li zi 'kpí. U dú matá sa líli gba Satana de. Engú bini, u adjí ibili

lio pi Ebhe. I du me u nde abhuka ma-a, u tsia sia nambu li siti 'ngú gba o-o. U tsia dú la di bhú dabilì bini ne okpála na bububu gba Ebhe-o.»

Polo akpokpo 'ngú pindji engú inde ani amene e-o

¹⁹ «Kaka-a, 'ngbé ngámá Agilipa, nayie li nedhinga bhomu-o, ma yala titima na engú ma au e inde ayie ka Ebhe-e de. ²⁰ Engú bini, ma akpokpo ngaiza pi okpála na gúdhú na Damasi, ne okpála na gúdhú na Yelusalema, ne okpála na ndu doto na Yudaya libhому, la di ne pi ndu okpála hana na gandjigandji. Ma akpokpo pi uo me: <Yi dji bua yi, amba yi gie liyi li pápá gba Ebhe.> La matá di me: <Yi mene bádha kulu inde asúno me yi adjì bua yi kúkulu.> ²¹ Ka 'ngú ango-o, omaYuda aholo ma bhú 'ngbé 'ti Ebhe gba omaYuda, u di me bhøle ma. ²² Engú bini, Ebhe alila ma nakolo pi naki. Padhá de, anga ma ngakpokpo engú gba Yesu-o pi ndu okpála hana, pi ongisi di ne pi obhelesi okpála. Ma pa 'ngú koko de, bha bini bhende li opolofeta di ne Moidje apa nani e me akólo makolo-o. ²³ U apa nani me Masiya azú likabhu, ani tsia dú kpála na bini inde azúku bhú ká okpála inde amu-o. Ani akpókpo pi ndu okpála na piga gba ní-e hana di ne pi ogandji okpála ngali na zi 'kpí na mukobho.»

Eli gba Polo ale nagbele bua 'ngbé ngámá Agilipa

²⁴ Li nedhinga li Polo adu akpokpo 'ngú gba e lie, ngámá Fesitusi atsia asula me: «Polo, mu ne bhulu pele! Balua mo omene e naali-e ato

bhú djila mü pele!» ²⁵ Abhomu-o, Polo atsia agie pi ani me: «Ngámá Fesitisi, ma ne bhulu pele ade. Engú inde ma ngapa e, a ko 'ngú na kukulu di na imbilangu. ²⁶ 'Ngbé ngámá Agilipa mbila ndu 'ngú bhomu-o hana ndjindji. Kaka-a, ma ngakpokpokpo pi ani ne tsulu ade. Ma aziba me ani mbu li susuka bini de. Padhá de, anga ndu 'ngú bhomu-o hana mene lie bhú pepe de. ²⁷ 'Ngbé ngámá Agilipa, mo obhuka engú inde li opolofeta apa e uu? Ma ambila me mo obhuka!»

²⁸ Abhomu-o, 'ngbé ngámá Agilipa ayi Polo me: «Mo obhundja naamu me ni ti da nadi ma makilisito bhú nedhinga bedi mo-o?» ²⁹ Polo atsia agie me: «Belegu i du ngubula nedhinga bedi, belegu i du di ngubula nedhinga bhelé-e, ma ngayo Ebhe bha ngubula mü kpi mü kpi ade. Engú bini, ma ngayo Ebhe ngubula ndu yi okpála hana inde ngadje ma li 'kpí na naki. Ma ngayo Ebhe ngú yi me, yi kolo di maka ma nde lie, naneke bha bini ogbindjili inde bhú 'kpa ma inde.»

³⁰ Abhomu-o, 'ngbé ngámá Agilipa, ne ngámá Fesitisi, ne Belenise di ne ndu okpála hana inde adu bhú dabili bini ne uo-o, ayie bhúlá. ³¹ U agbe lio ne li ngongo, u atsia akpokpo sunda o me: «Kpála inde-e mene siti 'ngú bini de inde ayo me, u to ani bhú tikpu di me u bhøø ani ka e-o.» ³² 'Ngbé ngámá Agilipa apa pi ngámá Fesitisi me: «I dú me kpála inde-e yó nako de me 'ngbé ngámá Kaisala kodho bha 'ngú gba ni-e ngae de-e, mü de agbe ani bhú tikpu agbe .»

27

U atima Polo bhú gũdhũ na Loma

¹ Li u apa lie me ya nũ bhú doto na Itali bhú 'ngbé zabũ-o, u atsia aha Polo di ne okpála koko na tikpũ-o pĩ ngámá bini gba osũdha. A adũ 'li anĩ me Djuliusi. Anĩ adũ ngámá pí 'ndji libi osũdha inde u adũ a'i o me «Osũdha gba 'ngbé ngámá Kaisala-o .» ² Ya aha 'ngbé zabũ na gũdhũ na Adalamite. 'Ngbé zabũ ango-o adũ anũ li pápá li obili li ozabũ alũlũ lie bhú ndu doto na Adjia-o. Abhomũ-o, ya atsia agbida. Kpála bini na gũdhũ na Tesalonike, bhú ndu doto na Makedonia, anũ bhú dabili bini ne ya. A adũ 'li anĩ me Alisitaluka.

³ Li ekpĩ aseke lie, ya akolo bhú gũdhũ na Sidona. Djuliusi adũ ne bádha bua li pápá gba Polo. Abhomũ-o, anĩ atsia aha kpadji pĩ Polo me anĩ nũ agba obi e, amba u teteke anĩ ne oehe inde anĩ nde ne gumũ e-o. ⁴ Ya yie lie oo, ya apũ lingo kpemø na Sipele, anga anvi adũ akũnda nagie ya ne sidi. ⁵ Ya agulu 'ngbé 'ngu inde lingo ndu doto na Silisia di ne Pamifilia ko. Abhomũ-o, ya atsia akolo bhú gũdhũ na Mila bhú ndu doto na Lisia. ⁶ Oo, ngámá gba osũdha-a abhaka 'ngbé zabũ bini na gũdhũ na Alekidjandili me a nde adji bhú doto na Itali, anĩ atsia abu ya bhúbhú.

⁷ 'Ngbé zabũ-o adũ adhũkũ bhũbhũkũ naali. Kaka-a, ya amene 'kpĩ bhelé, ya atsia adje likabhu naali ngũbula nakolo lingo gũdhũ na Sinide. La ya ale lie nanũ li pápá bhomũ-o pima ka anvi-e, ya atsia apũ lingo doto na Salamone inde ali ne abhú 'ngu bhú kpemø na Kelete ne asagø-o. ⁸ Ya adhũkũ má tili tili lingo kpemø-o,

ya atsia akolo li bili inde u a'i e me «Babadha ngo 'gø», masikpe de gũdhũ na Ladje.

⁹ Abhomũ-o, da nadhũkũ bhú 'ngbé zabũ-o atsia akolo sisiti, masikpe de namu ka okpála. Padhá de, anga nedhinga na anokomia natse 'zũ na epe na odukpabini-e adũ me a nde ane. Kaka-a, Polo atsia apa pĩ uo me: ¹⁰ «Ondaise ma, ma ngau me enú inde-e adú sisiti. 'Ngbé zabũ ne oehe inde bhũbhú-o asíti masiti, abana nganí makpe-e, ní akólo masikpe de namu.»

¹¹ Engú bini, ngámá gba osũdha adũ aziba naae naali mabhundja gba kpála inde adũ adjele 'ngbé zabũ-o, di ne bhe gba bhũlũ 'ngbé zabũ-o. Anĩ tsia ziba bhe gba Polo-o de. ¹² Matá di-e, kuti angoo ti ne nabhue bhũbhú bhú nedhinga na zini de. Abhomũ-o, masikpe de ndũ okpála hana inde adũ bhú 'ngbé zabũ-o atsia apa me o yie oo mayie. U adũ akũnda di me, i dũ me o nde ne ngasa-a, o de kolo bhú gũdhũ na Fenikisi. A ko sũka gũdhũ na ngo 'ngu na kpømø na Kelete. A ngatsia 'kpĩ ne li pápá na sũnda yoyoko ne akati, di ne sũnda abebe ne akati. U adũ akũnda me o kolo oo ngũbula me nedhinga na zini-e kodho 'kpĩ me o nde oo ko.

Anvi na kpekpeke ape pí 'ngu

¹³ Abhomũ-o, anvĩ na bhũbhũkũ aholo nape nayie ne li pápá na yoyoko. U atsia aziba me mabhundja gba o-o akódho 'kpĩ ndjĩndji. U agbe kalase inde u agbite e li 'kpú ngú nalũ ka 'ngbé zabũ-o bhú 'ngu, u atsia aholo akpangba ngo kpømø na Kelete. ¹⁴ Kolo pĩta nedhinga bedi-e, anvĩ na kpekpeke inde u a'i e me «Elakele»,

ayie bhú kp̄m̄, atsia aholo nape. ¹⁵ Anvi angoo aholo atumba 'ngbé zabu-o. Da napa me 'ngbé zabu-o lu kakala-a adu kpekpeke. Abhomu-o, ya atsia a'o me 'ngbé zabu-o nu ibili bha ne ya li pápá inde li anvi adu atumba ya lie ko.

¹⁶ Ya akolo lingo mboye kp̄m̄ u a'i e me Kauda inde alila mbo ya bedi ka anvi-o. Abhomu-o, ya atsia amene ne kpéke ngú nagbili mboye kóké-o ne bhúlá. ¹⁷ U aha, u ato bhú 'ngbé zabu-o. Pipita-a, u agbigbite ngo 'ngbé zabu-o hana ne ekpú ngú nalilila. U adu la lie ne tsulu me 'ngbé zabu anu atu lie li sike, i tsia bála o lingo doto na Libi de-e, u a'e bongo inde pí 'ngbu 'ngbé zabu-o, u atsia a'o me anvi du ibili adyudyo o ngae. ¹⁸ Li ekpí aseke lie, anvi adu bha adyiki 'ngbé zabu-o ne ya kpekpeke. Kaka-a, u atsia aholo apandja oehe inde adu bhúbhú-o, ababala bhú 'ngu. ¹⁹ Bhú 'kpí na bata-a, okpála na kulu ngao makpe-e, u abha oehe inde nadjele 'ngbé zabu-o, u atsia abala bhú 'ngu. ²⁰ Sunda 'kpí bhelé, ya u ela de. Ya u di oikupala de. Anvi adu bha nape kpekpeke. Ya du matá ne 'to ya de me ya akóbho makobho-o de.

²¹ Okpála inde adu bhú 'ngbé zabu-o zu 'he de ngubula 'kpí bhelé. Abhomu-o, Polo ayie bhúlá, ani alu bhú ká uo. Ani atsia apa me: «Ondaise ma, i dú nako me yi djé ma uu me ní ayie bhú kp̄m̄ na Kelete de-e, ní de sia ngua likabhu inde-e de. Oehe-e de siti la di-i de. ²² La mbia inde-e, yi sia kpéke bua. Padhá de, anga suka yi bini kpí-i de, engú bini, asíti bha bini ne 'ngbé zabu-o. ²³ Sukpe na naki-e, Ebhe inde ma nde

ne bali gba e-e, ma nde la di ngamene kulu pi e-e, atima andjelu gba e m̄ma. ²⁴ Anì atsia apa m̄ma me: <Polo, mo odjé tsul̄u de. A ayo me m̄u kpokpo 'ngú gba m̄u-o kala 'ngbé ngámá Kaisala. Kaka-a, Ebhe bhú bádha bhú 'bu gba e akóbho m̄u di ne okpála inde yi nde ngadhólo bhú dabil̄i bini ne o bhú 'ngbé zab̄u-o.> ²⁵ Ka 'ngú ango-o, ondaise ma, atou! Padhá de, anga ma ngabhuka me, Ebhe améne maka anì apa lie m̄ma ko. ²⁶ Engú bini, 'ngbé zab̄u anú at̄u lie ne ní lingo kp̄m̄o bini.»

²⁷ Sukpe na ekp̄í na ndjikpa ne ká badha, anvi ad̄u adyudyo 'ngbé zab̄u-o ne ya pí 'ngbé 'ngu inde 'li e me Adiliatike.* Abhom̄u-o, tutu sukpe-e, okpála nadjele 'ngbé zab̄u-o abhundja naao me ya akolo dengo 'ḡo. ²⁸ U aha ekp̄í inde u agbite tili 'he li 'ndj̄i e, u abhike bhú 'ngu. U atsia au me engu-o tsutsu metele ndjikpa bata ne ká mananika. U adyudyo mbo līo ne kalan̄u masudha, u atsia abhike matá bhú 'ngu. U au me engu-o tsutsu metele ndjikpa bhisi ne ká madj̄ina.

²⁹ U ad̄u adje tsul̄u me 'ngbé zab̄u-o atú lie li oteme de. Kaka-a, u atsia abala okalase badha inde u agbigbite e li okp̄u-o bhú 'ngu ne akele 'ngbé zab̄u-o, ngubula me al̄u bhú da e bini. U atsia ad̄u ne ḡum̄u me ekp̄í seke bhado má gala! ³⁰ Okpála nadjele 'ngbé zab̄u-o ad̄u aḡil̄i kpadj̄i ngú nakpe. Abhom̄u-o, u agbe mboye kéké-o, u

* **27:27** 27:27 Adiliatike: 'Ngbé 'ngu ango-o s̄unda doto na Itali ne bhende gba oGiliki. U aye bhú obhuku koko me «'ngbé 'ngu na Meditelani».

abhike pí 'ngu. U amene mụgito me u adji abala okalase inde u agbigbite e li 'kpụ-o, ngú nalụ ka 'ngbé zabụ-o ne akala zabụ-o. ³¹ Polo atsia apa pì ngámá gba osudha di ne pì osudha-a me: «Lì okpála inde-e dụ bhú 'ngbé zabụ-o de-e, yi tì da nakobho de.» ³² Abhomụ-o, osudha-a atsia atsotsolo okpụ na mboye kóké-o, atsia atapa.

³³ Kala me ekpí seke-e, Polo ayo ka ndụ okpála hana me u zụ 'he. Anì atsia apa pì uo me: «A ko nakì ekpí ndjikpa ne ká badha, yi ngadjeke. Yi ngasi gumụ. Yi le kụ 'he belegụ de bini. ³⁴ Kaka-a, ma ayo ka yi me yi zụ 'he. Padhá de, anga yi ne gụgumụ ngubula me yi kobho. Kpála bini bhú ká yi kpí-i de.» ³⁵ Pita anì apa lie mo-o, anì aha mapa, anì agie heni pì Ebhe bhú ká djila ndụ okpála hana. Pipíta-a, anì agumụ mapa-o, anì atsia aholo nazuzụ. ³⁶ Abhomụ-o, ndụ uo hana asia kpéke bua, u atsia aholo di nazụ 'he. ³⁷ Bhú 'ngbé zabụ-o, ya adụ hana okpála kámá bhisi ndjikpa mananika ne ká madhia.† ³⁸ U a'u'u lie, u atsia abala ngano bhú 'ngu ngubula me 'ngbé zabụ-o kolo yayaka.

'Ngbé zabụ-o alinda bhú 'ngu

³⁹ Lì ekpí aseke lie, okpála nadjele 'ngbé zabụ-o mbila de me o bhú mangua doto dho-ie de. Engú bini, u au ngo 'gò di ne sike. U atsia abhundja me o tì da nadyudyo 'ngbé zabụ-o li bili angoo. ⁴⁰ U abhubhulu okalase-o, u atse 'kpa tété bhú 'ngu. U abhubhulu di ekpú na oehe inde

† 27:37 27:37 Kámá bhisi ne ndjikpa mananika ne ká madhia: U aye bhú obhuku koko me «kámá bhisi ne ndjikpa mananika ne ká bhuluvue.»

adu amene me 'ngbé zabu-o dhuku-o. Pipita-a, u abhulu bongo inde li bhúla 'ngbé zabu-o ngubula me anvi holo nadyudyudo. Abhomu-o, u atsia aholo nanu ne li pápá na ngo 'gø. ⁴¹ Engú bini, 'ngbé zabu-o anu atu lie li 'ta sike, li bili inde li engu ngago lie ne ndu pasu bhisi hana-o. Bhúla 'ngbé zabu-o adha bhú 'ta sike-o, a ale adula lie pima. Tabhu tabhu-o atsia agumu. Padhá de, anga engu-o atu lie tété kpekpeke.

⁴² Osudha adu akunda nabhili okpála na tikpu-o, amba suka uo bini akpé ne akango de. ⁴³ Engú bini, ngámá gba osudha-a adu akunda nakobho Polo. Abhomu-o, ani ayoko uo me u améne mo-o de. Ani atsia aha líli pí okpála bhende ambila nati akango me u bala bhú 'ngu kalanu, amba u ze apí 'gø. ⁴⁴ Okpála koko akpáta uo sidi me u nde ahoholo lío lí opalangi di ne opapala 'he na 'ngbé zabu-o. Abhomu-o, ndu uo hana atsia akolo apí 'gø ndjindji.

28

Polo bhú kpemø na Malete

¹ Pita ya akobho lie, ya atsia adje me a 'li kpemø ango-o me Malete. ² Okpála na kpemø ango-o asia ya ndjindji. Li ebha aholo adhi lie, zini aholo amene ya. Abhomu-o, u akpo djua má tu tu tu! Ya atsia ago adulu ndu ya hana dede. ³ Polo akuo 'i 'wa, ani abu bhú djua. Engú la bini, mbuma akoto bhúbhú ka wowo djua, ani atsia adhedhe li 'kpa ani. ⁴ Li okpála na kpemø ango-o au lie me kpulu adhedhe li 'kpa ani mo-o, u atsia apa sunda o me: «Kpála inde-e bha ndju

ne bhulɔ nabhelɔ kpála kukulɔ. Padhá de, anga belegu ani akobho lie bhú 'ngu-o, Ebhe inde 'li e me ngbili 'ngú ziba de me ani dɔ bhú mukobho-o de.»

⁵ Engú bini, Polo adyiki 'kpa e, kpulɔ-o atsia ati bhú djua, ehe bini mene ani de. ⁶ La-a, u adɔ adjeke me 'kpa ani adji asíka di ne me ani atí kuto ne nakpi ka e bini. U adjeke ngengele, u au la lie me ehe bini mene ani de-e, u adji mabhundja gba o-o. U atsia apa me: «A ko ebhe!»

⁷ Ngámá na kpɔmɔ inde adɔ 'li e me Pubiliusi adɔ ne kuti gba e na ngbéngbé de bili ang-o-o. Ani asia ya ndjindji, ya atsia asi agba ani ekpí bata.

⁸ Bhú nedhinga bhomɔ-o, 'dyi Pubiliusi adɔ ne kuo pí mako. Ani adɔ ne bandji, ani atsia adɔ di agie ngute. Abhomɔ-o, Polo anɔ natsia ani. Ani ayo Ebhe pí ani. Ani a'o 'kpa e pí 'ndji ani. Ani atsia akobho ani. ⁹ Pipita-a, okpála koko inde adɔ ne kuo bhú kpɔmɔ bhomɔ-o, ago di nabhaka ani, ani atsia akobho uo. ¹⁰ U adhɔgɔ ya naali. Nedhinga nayie ka ya oo, u aha ndɔ 'he hana inde a ti ne ya ngɔbula kpadji-e pí ya.

Polo akolo bhú gɔdhɔ na Loma

¹¹ Pita epe bata-a, ya a'ɔ bhú 'ngbé zabɔ na Alekidjandili. A adɔ 'li 'li me «Diosikulese.*» Nedhinga na zini ane nani 'ngbé zabɔ ang-o-o bhú kpɔmɔ oo. ¹² Ya akolo lie bhú gɔdhɔ na Silakusi, ya asi oo ekpí bata. ¹³ Ya ayie oo, ya

* **28:11** 28:11 Diosikulese: A ko nani oebhe obhukosi inde li oGiliki adɔ aha o maka oebhe gba o. Okpála nadhuku bhú 'ngu aha nani uo maka oebhe inde adɔ alila o ko.

aholo nakpangba ngo 'ngu, ya atsia akolo bhú gúdhú na Ledjio. Li ekpí aseke lie, anvi ayie ne li pápá na yoyoko, aholo nape. Abhomú-o, pita 'kpí bhisi-e, ya atsia akolo bhú gúdhú na Pudjole. ¹⁴ Bhú gúdhú ango-o, ya abhaka ondaise ya omabhuka oo. U atsia ayo ka ya me ya dú mbo ne o ngubula poso bini. Abhomú-o, ya atsia anú bhú gúdhú na Loma . ¹⁵ Ondaise ya na gúdhú na Loma adje me ya akolo. Kaka-a, u ago akolo bhú gúdhú inde 'li e me Daposo na Apiusi, di ne bhende 'li e me Oeti Bata, ngú nakə lio ne ya. Li Polo au uo lie, ani agie heni pí Ebhe, ani atsia asia kpéke bua. ¹⁶ Abhomú-o, ya akolo bhú gúdhú na Loma. U aha dabili pí Polo kpi bhú dabili bini ne sádhá inde adú atsia 'kpí li ani-o.

Polo akpokpo 'ngú gba e bhú gúdhú na Loma

¹⁷ Abhomú-o, pita ekpí bata-a, Polo a'i ongámási gba omaYuda inde ngadulu bhú gúdhú na Loma-a agba e. U apo bhúla o lie, ani atsia apa pí uo me: «Ondaise ma, ma mene okpála na kuti gba ní-e sisiti de. Ma siti la di dasundu gba ongu ogbi ní-e de. Abana mo-o, u aholo ma bhú gúdhú na Yelusalema, u atsia apú ma pí okpála na gúdhú na Loma. ¹⁸ U ayiyi ma li ongú. Engú bini, u u ma ne engú bini inde u ti da nabhəle ma ka e de. Kaka-a, u adú akúnda me o tse 'kpa li ma. ¹⁹ La li omaYuda ayala lie, ma atsia au ndjindji me 'ngbé ngámá Kaisala kodho 'ngú gba ma-a ngae. Engú la bini, ma dú akúnda na'o 'ngú pí okpála na kuti gba ma-a de. ²⁰ Kaka-a, ma akúnda nako me ma u yi, amba ní gama

la di 'ngú ne yi. Padhá de, anga u agbite ma ne gbindjili inde-e kabula kpála inde li omafsalaele nde ne 'to o me Ebhe atíma e-o.»

²¹ U agie pi ani me: «Ya sia balua bini nayie bhú ndu doto na Yudaya inde akpokpo 'ngú pindji 'ngú gba mu-o de. Suka ondaise ya bini yie oo go ei de ne engú gba mu, di go kpokpo 'ngú na sisiti li kute mu de. ²² Engú bini, ya akunda me kpokpo nga bha ngamu makpe, engú inde mu ngabhundja e ko. Padhá de, anga ya ambila me ne ndu bili hana, okpála ngapa 'ngú sisiti li libi okpála gba mu-o.»

Polo akpokpo Bádha Ngali pi omaYuda na gudhu na Loma

²³ Abhomu-o, omaYuda a'o matá ekpi bini ngú nakə lio ne Polo. Li 'kpi ang-o, u ago bhelé naali li bili inde ani adu asi lie ko. Nayie kəkpí nakolo tagolo-o, Polo adu akpokpo 'ngú pi uo pindji Nau gba Ebhe-o . Ani adu amene ne kpéke me u ziba Yesu. Bhú nakpokpo 'ngú ang-o, ani adu atanga pi uo líli gba Moidje di ne obhuku gba opolofeta . ²⁴ Okpála koko aziba engú inde ani akpokpo e-o. Engú bini, okoko tsia bhuka de. ²⁵ Abhomu-o, u agbo bhusu o me u nde dje lio sunda o de. Polo atsia apa bha pi uo me: «Engú nani inde li Bu Bhobua apa e bhú 'li polofeta Isaya pi onguo ogbi yi-e, a ko kukulu 'ngú! ²⁶ Ani apa nani me: <Nu pa pi okpála bhomu-o me: Yi adjé 'kpi ndjindji, engú la bini, yi mbíla tata-a de.

Yi atsia 'kpi ndjindji, engú la bini, yi ú 'kpi de.

27 Padhá de, anga bua uo akolo maka teme.

U anini 'dje o, u agbagba djila o,
ngubula me, djila o aú 'kpí de,

'dje o adjé 'kpí de,

imbilangu gba o-o ambíla tata-a de,
u adjí bua o de,

amba ma akóbho uo de. Ebhe apa mo-o.†»

28 Do Polo matá me: «Yi mbíla me, Ebhe atima ngali na mukobho gba e pí ogandji okpála . Ngauo di-e, u adjé madje.» [29 Lí u adje engú inde lí Polo apa e lie, omaYuda atsambala me u nde ngamene kpekebhe sùnda o kpekpeke.]

30 Abhomu-o, Polo asi kalanga bhisi libhomu bhú eti inde ani adu nadu bhú e me ani nde ngaha pí bhuhulu-o falanga ko. Oo, ani atsia adu asia ndu okpála hana inde adu ago atsia ani-o. 31 Ani adu akpokpo ngali Nau gba Ebhe, di ne nasuno ne angu hana engú gba Ngámá Yesu Kilisito-o . Ehe bini ni kpadji pí ani de.

† 28:27 28:26-27 Tsia bhú Iša. 6:9-10.

Gandja na Mbia
Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 3 Mar 2023 from source files
dated 29 Jan 2022

6b4904fb-f8ce-5931-8218-7cee8914232c